

# Kyaamz Lukas

## Seun teungz mony reu ma

**1** Khunz Theophilus aez, ceun ihz tang heungz keui khatz phawmz taemz maaiz mok lawng an keunyz truz peur lah<sup>2</sup> ehz. Keuh taemz tawiz an ihz awlz tawiz tuhز keutz ngaai boh ihz rawz plaез reu oiz rak ehz nahz lawng an diz thaz meuz<sup>3</sup> seun teungz ne, ohz kaw caet yawt rak rak<sup>4</sup> hacz aamz thaz meuz seun teungz rae, ohz thaang rak seum taemz mok aez mih nahz, aez mih mas rak rak an mih a wa sawnz leh keui.

## Yohn tahz teuk sruz ngaz keut

<sup>5</sup> Co khunz Herot upz peung prih Yio ne maang saangz longz hawkz mus hnhz daz Sekhariah, an naeh tuhз cumz ceu beunz Abiyah. Mus yah hnhz daz Elisabet, hnhz<sup>6</sup> kaw naeh kheuz Aaron. Kaar tahz yah naeh ihz keu sangz aacz ngaai Phraz Pen Caoh, cih tawiz sinz boh traz Phraz Cen<sup>7</sup> Cen thanz paw nam maang ti nae. Elisabet naeh keun nyah manz rae kaar nam maang kuanz, kaar a wa thao tang keu aarz.<sup>8</sup> Naeh seu seu ngihz maen meuz cumz<sup>9</sup> Sekhariah cih kaanz tuhз wat ne, klaез ceu kawк hnhz tucz naam sa hawm tawz khrengz tuhз wat Phraz Pen Caoh, tawiz<sup>10</sup> thungz caam saangz longz. Meuz phangz hnhz tucz naam sa hawm ne ihz keui suz

<sup>11</sup> tawngz boh thaz nawk. Meuz diz luat teu maan kaang raaоз Phraz Cen Cen paw truz ceng plaез hnhz nahz, plaakz takz kaaiz<sup>12</sup> khrengz tucz naam sa. Meuz Sekhariah awlz hnhz ne rawhз khranz rawhз doz.<sup>13</sup> Keuiz daz teu maan kaang raaоз daz hnhz nahz, “Yak doz raez, Sekhariah! Phraz Pen Caoh a wa ngarz mih suz tawngz. Yah mih Elisabet ngaz maang kuanz keur meh, mih<sup>14</sup> bawnz peuk mus hnhz Yohn. Meuz hnhz keut ne mih kaw ngaz pyaw, ihz keui kaw<sup>15</sup> ngaz seuz. Kuanz mih ngaz penz kuanz mawh myaat aacz ngaai Phraz Cen Cen. Hnhz nam tiangz omz seu pit boh meoz cawc, neuk tang Khuanz Seu Ngamz thaz meuz yeung naeh tuhз klungz mah daehz.<sup>16</sup> Hnhz ngaz aacz plaak plaai kheuz Israel keui truz cu Tahz daehz Phraz Pen Caoh.<sup>17</sup> Hnhz lan aacz Caoh Phraz ceun khuanz boh taanz khoz ihz taangz phraz Eliyas. Hnhz ngaz cih aez paz boh kuanz teur maen mial daehz, ihz nam teuk ngarz keui aez waaiz mial tuhз pinya reung dengz keu sangz rae aez ihz raenz peun tan mok meuz Phraz Pen Caoh truz.”<sup>18</sup> Sekhariah kaw daz teu maan kaang raaоз nahz, “Ohz cih seu naez caang mas lawng an ni? Ohz kaw a wa thao, yah ohz kaw a wa cahz.”<sup>19</sup> Teu maan kaang raaоз daz, “Ohz naeh Kabriel, ohz ceng aacz ngaai Phraz Pen Caoh, Phraz Pen Caoh puhz ohz truz lao

<sup>20</sup> mih nahz reu oiz rak an ni. Mih nam yum mony reu ma an ohz lao. Kawp ceun diz seu ni mih ngaz ahz taw phraeoz penz truz lawng an ni. Keuiz daz an ohz lao ne meuz kraao a wa phraeoz kaw ngaz penz.”

<sup>21</sup> Meuz ceun diz ihz keui ngawm Sekhariah, sangz tang hnhz moh tuhz wat ceu nawhz <sup>22</sup>baaiz. Meuz hnhz lae truz ne hnhz nam caang upz rae, ihz keui kaw mas hnhz a wa awlz pyatik tuhz wat. Hnhz plaez keuh nahz tihz daehz, nam caang upz hawkz hawkz.

<sup>23</sup> Kraao hnhz cih kaanz tuhz wat a wa peun <sup>24</sup>ne, hnhz weng moh lang kaang. Nam paw moh ceu nawhz, yah hnhz keun meur rae nam lae thaz nawk kaang hanz kiarz ne, <sup>25</sup>hnhz daz mial daehz, “Seu ni Phraz Cen Cen yawt ohz, leh thengz an nam rak kaai ohz.”

### Lawng Tahz Yesuhz ngaz keut

<sup>26</sup> Meuz Elisabet keun meur bawnz tualz kiarz ne, Phraz Pen Caoh phuhs teu maan kaang raaoz Kabriel lan weng Nasaret <sup>27</sup>tuhz prih Kalile. Hnhz lao Mari an naeh trawsz teuk rac, a wa teur khaam tang keur meh hawkz, mus hnhz daz Yosep, an <sup>28</sup>naeh kheuz khunz Dawit. Teu maan kaang raaoz tak Mari daz, “Aez reung dengz rak naeh kaai mih se kamz, keun nyah an bawnz mawk mael aez! Phraz Pen Caoh naeh kawmz mih.”

<sup>29</sup> Mari kaw meun kawp mony reu ma teu maan kaang raaoz lao rae wonz daz an <sup>30</sup>ni naeh seu naez nawz. Teu maan kaang raaoz daz hnhz nahz, “Yak doz, Mari, mih <sup>31</sup>a wa trohz phawmz Phraz Pen Caoh. Mih ngaz maang kuanz keur meh, mih bawnz

<sup>32</sup>peuk mus Hnhz Yesuhz. Hnhz ngaz mawh myaat, bawnz raak Hnhz naeh Kuanz Phraz Pen Caoh an trawng dutz. Tahz an naeh Phraz Pen Caoh ngaz aez Hnhz penz <sup>33</sup>khunz ceun paz daehz Dawit. Hnhz ngaz upz peung kheuz Israel cen cen, prih Hnhz kaw nam dutz seu pawk.”

<sup>34</sup> Mari daz teu maan kaang raaoz nahz, “Cih seu naez penz bawnz, ohz naeh trawsz teuk rac?”

<sup>35</sup> Teu maan kaang raaoz mial daz, “Khuanz Seu Ngamz ngaz cur cu kaai mih rae taanz khoz Phraz Pen Caoh an trawng dutz ngaz cu mih. Kawp ceun diz, kuanz ihz an seu ngamz ne bawnz peuk mus Kuanz <sup>36</sup>Phraz Pen Caoh. Yawt luz, kuanz mai pehz Elisabet, ihz daz hnhz naeh keun nyah manz, a wa thao ne kaw ngaz maang kuanz keur meh, seu ni hnhz keun meur bawnz <sup>37</sup>tualz kiarz. An Phraz Pen Caoh cih nam penz bawnz ne nam maang naehz.”

<sup>38</sup> Mari daz, “Ohz naeh peur cao Phraz Pen Caoh! Aez ohz naeh ceun mih lao.” Teu maan kaang raaoz kaw praasz hnhz.

### Mari khahz keulz Elisabet

<sup>39</sup> Nam paw moh ceu nawhz, Mari rip lan <sup>40</sup>cu weng kaai rang tuhz prih Yio. Hnhz kut tuhz kaang keuh Sekhariah rae tak <sup>41</sup>Elisabet. Meuz Elisabet ngarz Mari tak daehz ne kuanz ngaak an naeh tuhz klungz ne teuk dawtz, Elisabet neuk tang Khuanz <sup>42</sup>Seu Ngamz rae daz Mari nahz reus usz, “Mih bawnz reung dengz rak Phraz Pen Caoh leuz keun nyah hacz aamz, kuanz ihz an mih ngaz maang kaw bawnz reung <sup>43</sup>dengz rak. Kawp naehz rae ohz bawnz kez <sup>44</sup>cuz mah Tahz ehz truz keulz ohz? Meuz

ohz ngarz reus mih tak ohz ne kuanz ngaak  
 an naeh tuhز klungz ohz seuz phawmz  
 45 rae teuk dawtz. Phraz Cen Cen aez reung  
 dengz rak a mih kawp daz mih yum kaai  
 mony reu ma an Hnhz mok keu tih ne ngaz  
 penz mawn.”

### Mony ngawk Mari lupz phrawz

46 Mari daz,  
 “Kingz keu nuasz ohz lupz phrawz  
 Phraz Cen Cen.  
 47 Khuanz ohz seuz tuhز Tahz Khyawt  
 ohz Phraz Pen Caoh.  
 48 Kawp daz Hnhz tang ohz naeh peur  
 cao Daehz an klaez daelz.  
 Seu ni lan ihz hacz aamz ngaz raak  
 ohz naeh keun nyah an bawnz  
 reung dengz rak Phraz,  
 49 kawp Phraz Pen Caoh an kyahz  
 lak ihz ne cih aez an rak seum  
 sangz ohz nahz.  
 Mus Hnhz seu ngamz.  
 50 Kaai ihz an doz suamz Hnhz keui  
 Hnhz teur yawng co pliz co placz lan.  
 51 Hnhz leh tihz daehz plaesz taanz khoz,  
 teuk praasz a kyaam ihz lomz  
 trawng keui.  
 52 Hnhz teuk klaez khunz thaz  
 plaang daehz rae  
 phrawz aez ihz daelz keui raw trawng.  
 53 Hnhz damz ihz coh nguat keui nahz  
 seum suamz an rak rae  
 aez ihz maang keui nahz tihz maat.  
 54 Hnhz kawr peur cao Daehz Israel,  
 tawiz mony reu ma Hnhz mok  
 tawz tahz kok ehz ne

Hnhz tang lo teur yawng se  
 se ihz Daehz.

55 Phraz Cen Cen yawt phraeoz Abraham  
 boh ceu kheuz hnhz se se ceun  
 Daehz lao mok.”  
 56 Mari moh kawmz Elisabet kraao waiz  
 kiarz kaw weng mial kaang daehz.

### Yohn tahz teuk srucz keut truz

57 Kraao Elisabet maang kuanz a wa  
 58 phraeoz ne keut kuanz keur meh. Ihz rim  
 kaang keuh boh ceu kheuz kuanz mai keui  
 ngarz Phraz Cen Cen teur yawng leuz leuz  
 kaai hnhz rae keuh hacz aamz seuz tawiz  
 hnhz.  
 59 Meuz a wa bawnz tahz seu ngihz ne ihz  
 keui truz aez kuanz ngaak nahz an saetz  
 cawgz hurz. Keuh ngaz peuk mus kuanz ihz  
 60 nahz mus paz an daz Sekhariah. Keuiz daz  
 Elisabet daz, “Nam anz! Peuk mus hnhz  
 Yohn eu.”  
 61 Ihz keu diz kaw daz, “Tuhz kheuz pehz ne  
 62 nam maang mus Yohn.” Keuh kaw leh tihz  
 cawng maanyz paz kuanz ihz, ngaz peuk  
 mus kuanz ihz nahz naehz.  
 63 Sekhariah kaw maanyz leh saang punz  
 hawkz. Hnhz taemz daz, “Mus hnhz naeh  
 Yohn.” Ihz keu diz kaw teur aacz daehz  
 64 sangz baaiz. Meuz diz luat Sekhariah  
 aangz mony daehz, taakz hnhz kaw keu  
 ceum, upz mial rae lupz phrawz Phraz Pen  
 65 Caoh. Ihz moh rim keuh hacz aamz kaw  
 teur aacz daehz doz baaiz, lawng keu diz  
 hacz aamz kaw sirz lan tawiz pukz tuhز  
 66 prih Yio. Ihz an ngarz an rak seum sangz  
 keui teur daz, “Kuanz ihz ne ngaz naeh seu

naez ez?” Keuh mas taanz khoz Phraz Cen Cen naeh kawmz hnhz.

### Sekhariah lao taangz phraz

- 67 Sekhariah, an naeh paz kuanz ihz kaw neuk tang Khuanz Seu Ngamz rae lao taangz phraz daz,
- 68 “Phraz Cen Cen, an naeh Phraz kheuz Israel ne aez naeh an rak se kamz! Hnhz ngaz truz khyawt ihz Daehz.
- 69 Hnhz aez Tahz khyawt an taanz khoz mawh, aez paw tuh z ceu kheuz peur cao Daehz khunz Dawit.
- 70 Meuz diz neungz Phraz Cen Cen aez keu tih tawiz mony reu ma ihz taangz Daehz an seu ngamz,
- 71 ta khyawt leh eh z thaz raan su eh z boh tuh z tih z ih z ceuh eh z.
- 72 Hnhz teur yawng ihz keu daehz keu daepz eh z rae, aez keuh tang traz seu ngamz an Daehz prawm mok.
- 73 Hnhz teung kaa o keu tih tah z kok eh z Abraham nah z aez eh z lawt thaz raan su daehz,
- 74 cih yak aez eh z doz rae caang cih peur cao Daehz.
- 75 Aez eh z seu ngamz boh keu sang z aacz ngaai Daehz tang co eh z.
- 76 Mih naeh kuanz Ohz, bawnz raak mih ihz taangz phraz an trawng dutz. Mih bawnz lan aacz Phraz Cen Cen rae ngaz meu rae reung dengz Hnhz.

- 77 Mih ngaz lao ihz Phraz Pen Caoh keui mas Hnhz plawiz lawt reung dengz kawi rae ngaz khyawt keuh.
- 78 Reung dengz yaw boh reung dengz rak Phraz Pen Caoh ne thang aasz kaai eh z, naeh ceun seu ngihz thaangz thaz kaang raa o z.
- 79 Thang sapz tang kaai ihz moh tuh z poiz reung dengz yam rae thang pla ez keuh nah z reung dengz nimz.”
- 80 Kuanz ihz kaw mawh truz, khuanz Hnhz kaw krang truz. Hnhz moh tuh z ruk thonz taw ihz mas hnhz saang raang peur lah kheuz Israel.

### Lawng Yesuhz keut

(Matthe 1:18-25)

- 2** Meuz phangz an diz khunz longz Kaesar Aukustus lao ihz tang prih
- <sup>2</sup> Rom hacz aamz keui sapz craangz ihz. An ni naeh laehz seun teungz seutz craangz ihz co khunz Kuirinius penz khunz prih
- <sup>3</sup> Siria. Ihz keui hacz aamz teur aacz daehz weng cu ti moh daehz rae sapz craangz.
- <sup>4</sup> Yosep kaw moh weng Nasaret, prih Kalile lan cu weng Betlehem, prih Yio, an naeh weng khunz Dawit, kawp daz hnhz naeh
- <sup>5</sup> kheuz khunz Dawit. Hnhz lan sapz craangz tang Mari, an hnhz ngaz leh ne. Keun nyah
- <sup>6</sup> an diz a wa thatz maang kuanz. Meuz kaar naeh a weng Betlehem, seu ngihz maang
- <sup>7</sup> kuanz a wa phraeoz ne, hnhz kaw maang kuanz kingz. Hnhz leh pahz pok kuanz ihz, seuk yaetz mok tuh z haangz meuk. Kawp

daz ti khaekz keui preumz ne nam lawnz leui.

### Ihz damz soz boh teu maan kaang raaoz

- <sup>8</sup> Tuhz prih an diz maang ihz damz soz, keuh moh tawz plaangz, keuh pao wungz
- <sup>9</sup> soz daehz meuz teuk bimz. Meuz ceun diz teu maan kaang raaoz Phraz Cen Cen seu paz paw truz tawz keuh, bunz Phraz Cen Cen aasz keum yaamz rae keuh doz baaiz.
- <sup>10</sup> Keuiz daz teu maan kaang raaoz daz, “Yak doz! Ohz maang reu oiz rak ta pehz, aez ihz hacz aamz keui seuz phawmz mawn
- <sup>11</sup> mawn. Seu ngihz meu ni Tahz Khyawt, an naeh Tahz Khriis ne keut aez pehz nahz
- <sup>12</sup> tuhz weng khunz Dawit. Pehz ngaz cih seu naez mas Hnhz naeh yaeh ne, pehz ngaz awlz kuanz ngaak, leh pahz pok rae seut yaetz boh tuhz haangz meuk.”
- <sup>13</sup> Meuz ceun diz tap teu maan kaang raaoz an heungz keui paw truz tawiz luat teu maan kaang raaoz an diz rae lupz phrawz Phraz Pen Caoh daz,
- <sup>14</sup> “Lupz phrawz Phraz Pen Caoh an naeh kaang raaoz trawng dutz, tuhz prih keu tehz kaai ihz an Hnhz trohz phawmz kaw aez maang reung dengz phawmz nimz!”
- <sup>15</sup> Waaiz teu maan kaang raaoz keui raw lan lang kaang raaoz ne ihz damz soz keui teur daz daehz nahz, “Ehz lan cu weng Betlehem rae lan yawt an Phraz Cen Cen lao ehz.”
- <sup>16</sup> Keuh rip lan, awlz Mari boh Yosep tang kuanz ngaak an seuk yaetz boh tuhz
- <sup>17</sup> haangz meuk. Meuz ihz damz soz keui awlz Yesuhz ne keuh daz mah paz Hnhz nahz, lawng teu maan kaang raaoz keui

- <sup>18</sup> lao daehz. Ihz bawnz ngarz keui kaw teur aacz daehz sangz kaai mony reu ma ihz
- <sup>19</sup> damz soz keui lao. Keuiz daz Mari tang mok keu diz hacz aamz rae wonz yawt truh
- <sup>20</sup> truh. Ihz damz soz keui kaw weng cu meu rae paangz daehz, teur aacz daehz lupz phrawz Phraz Pen Caoh, an keuh awlz, an keuh ngarz ceun mony reu ma teu maan kaang raaoz lao daehz.

### Peuk mus kuanz ngaak daz Yesuhz

- <sup>21</sup> Meuz kuanz ngaak a wa bawnz tahz seu ngihz ne saetz aez cawkz hurz, peuk mus daz Yesuhz, ceun teu maan kaang raaoz seumz mok thaz meuz hnhz maat keun meur.

### Leh Yesuhz aapz tuhz wat

- <sup>22</sup> Yosep boh Mari cih tawiz traz Moses, kraao leh kuanz ihz aez seu ngamz a wa phraeoz ne kaar leh lan Hnhz cu wat tuhz
- <sup>23</sup> weng Yerusalem, ceun traz Phraz Cen Cen naeh mok, kuanz kingz keur meh ne aez
- <sup>24</sup> seu ngamz ta Phraz Cen Cen nahz. Kaar raenz kreung lu, ploiz seu ku nam anz kaw ka kaez kyezh seu ku tawiz traz Phraz Cen Cen.
- <sup>25</sup> Meuz ceun diz maang ihz hawkz mus daz Simeon, ihz weng Yerusalem. Hnhz naeh ihz rak, ihz doz suamz Phraz Pen Caoh rae mang kheuz Israel keui phraeoz reung dengz khyawt. Khuanz Seu Ngamz kaw
- <sup>26</sup> naeh kaai hnhz. Khuanz Seu Ngamz lawk mok aez hnhz nahz, beuk maat bawnz awlz Tahz Khriis Phraz Cen Cen kaw maat yam.
- <sup>27</sup> Khuanz aacz lan Simeon a teu laangz wat. Meuz mah paz Yesuhz leh lan Hnhz a wat

<sup>28</sup> cih tawiz traz an naeh mok ne, Simeon kaw pumz kuanz ihz kaai tranz daehz rae lupz phrawz Phraz Pen Caoh daz,

<sup>29</sup> “Phraz Cen Cen aez, seu ni ceun keu tih Mih a wa keunyz kaai ohz rae ohz an naeh peur cao Mih ngaz bawnz yam pyaw.

<sup>30</sup> Ngaai ohz a wa bawnz awlz reung dengz khyawt Tahz ehz,

<sup>31</sup> an Mih raenz aez aacz ngaai ihz hacz aamz.

<sup>32</sup> Mih plaез an thaangz kaai ihz an nam anz kheuz Yio, aez penz bunz kaai kheuz Daehz Israel keui nahz.”

<sup>33</sup> Mah paz Yesuhz kaw sangz Simeon lao

<sup>34</sup> lawng Hnhz. Simeon aez reung dengz rak a keuh, daz tang Mari nahz, “Yawt luz! Phraz Pen Caoh khaanz mok Kuanz Kingz Ihz an ni aez kheuz Israel tang heungz keui luh sumz, teur ka samz raw trawng. Hnhz ngaz naeh a tik Phraz, ihz tang

<sup>35</sup> heungz keui ngaz upz khatz Hnhz. Kawp ceun diz a kyaam tuhз kingz keu nuasz ihz keui ngaz plaез rae, naeh ceun waac ngaz teusz kingz keu nuasz mih.”

### **Mony reu ma Anna rawz**

<sup>36</sup> Maang yah keu maaiz ihz taangz phraz hawkz, mus hnhz daz Anna, hnhz naeh kuanz Phanuel, kheuz Asher. Hnhz a wa thao baaiz, bawnz moh kawmz tahz daehz

<sup>37</sup> pulz wit pan. Penz yah keu maaiz taw a saak hnhz a wa naeh tahz kawlz ponz. Hnhz nam praasz wat seu pawk, seuk ngih teuk bimz hnhz koz kwaai Phraz Pen

Caoh tang suz tawngz boh kaerz seum <sup>38</sup> suamz. Meuz phangz an diz hnhz truz lupz phrawz Phraz Pen Caoh, lao aez ihz weng Yerusalem an mang reung dengz khyawt keui nahz lawng Kuanz Kingz Ihz.

### **Weng mial weng Nasaret**

<sup>39</sup> Waaiz Yosep kaar Mari a wa cih tawiz traz Phraz Cen Cen ne keuh weng cu mial kaang daehz a weng Nasaret, tuhз prih <sup>40</sup> Kalile. Kuanz ihz kaw mawh truz, keum rang truz, pinya kaw heungz truz, bawnz mawk mael aacz ngaai Phraz Pen Caoh.

### **Yesuhz naeh tuhз wat**

<sup>41</sup> Mah paz Yesuhz lan pawiz lawt pheз tawz

<sup>42</sup> weng Yerusalem klawhз wit. Meuz Yesuhz a wa bawnz seu kawlz aarz khopz ne lan weng Yerusalem ceun tomz lan klawhз wit.

<sup>43</sup> Meuz pawiz a wa waaiz ne keuh teur aacz daehz weng. Keuiz daz Yesuhz samz kiutz tuhз weng Yerusalem. Mah paz samz nam

<sup>44</sup> mas naeh ceun diz. Kaar thaang naaoz daehz naeh tuhз kuanz bohз kuanz mai daehz. Kaar weng a wa bawnz seu seu ngihз, dawmз yawt tawiz ceu kheuz kuanz

<sup>45</sup> mai boh tawiz kuanz bohз keui. Meuz kaar nam awlz Hnhз, kaar kaw truz dawmз mial

<sup>46</sup> Hnhз tuhз weng Yerusalem. Moh waiz seu ngihз kaar awlz Hnhз naeh boh tuhз wat, keu dez peur lah ihz mawз kyaamз Yio keui

<sup>47</sup> rae teuk ngarz keuh, maanyз keuh. Ihz an ngarz Hnhз keui sangz baaiz an Hnhз

<sup>48</sup> maang pinya tawpз bawnz. Meuz mah paz Hnhз awlz ne sangz. Mah keuh daz Hnhз

nahz, “Naaoz, Mih cih naehz aaiz nahz? Aaiz paz pehz keun tiatz phawmz khahz mih eu.”

<sup>49</sup> Yesuhz daz kaar nahz, “Cih naehz khahz Ohz a? Mah kaar paz nam mas haz, Ohz <sup>50</sup>naeh tuhز कांग Paz Daehz a?” Keuiz daz kaar nam loz phawmz an Hnhz tawpz.

<sup>51</sup> Hnhz kaw weng tawiz mah paz ne phraeoz weng Nasaret, teuk ngarz mony reu ma kaar. Mah keuh kaw peun tang mok lawng keu ni hacz aamz tuhз phawmz <sup>52</sup>daehz. Toz Yesuhz kaw mawh truz, pinya kaw heungz truz rae bawnz mawk mael aacz ngaai Phraz Pen Caoh boh aacz ngaai ihz.

### Yohn meu rae reung dengz

(Matthe 3:1-12, Markus 1:1-8, Yohn 1:19-28)

**3** Meuz Tiberius Kaesar penz khunz longz prih Rom a wa bawnz seu kawlz hanz wit ne Pontius Pilat penz khunz prih Yio, Herot penz caoh waz prih Kalile, seum bohз hnhz Philip samz penz caoh waz prih Iturea boh prih Trachonitis, Lisantias penz <sup>2</sup>caoh waz prih Abilen. Annas boh Kaiaphas samz naeh ceu beunz. Meuz phangz an diz mony reu ma Phraz Pen Caoh phraeoz kaai Yohn an naeh kuanz Sekhariah, hnhz moh <sup>3</sup>tuhz ruk ruk. Kawp ceun diz Yohn lan rawz tawiz weng tawiz pruh waar omz Yordan daz, “Caanz reung dengz kawi rae leh teuk sruz raez. Phraz Pen Caoh ngaz plawiz <sup>4</sup>reung dengz kawi pehz.” Ihz taangz phraz Isaiah taemz mok lawng Yohn daz, “Maang reus ihz hawkz an raak tuhз ruk daz, ‘Meu rae reung dengz Phraz Cen Cen,

aez reung dengz keu sangz ta Hnhz nuar!

<sup>5</sup> Klawhz hotz keui thomz aez teuk krenz, tawiz pukz keui tawiz rang keui kaw kawngz aez peng. Reung dengz wot keui datz aez keu sangz, reung dengz kreuk keui kaw meu rae aez yoh.

<sup>6</sup> Ceun diz ihz keui te awlz reung dengz khyawt Phraz Pen Caoh.”

<sup>7</sup> Yohn lao wungz ihz an truz leh teuk sruz a daehz keui nahz, “Pehz naeh kheuz heunyz raai! Yaeh aez seu tih aez pehz tiunz lawt thaz phez taam Phraz Pen Caoh an ngaz <sup>8</sup>phraeoz? Cih aez daehz kiungz an caanz reung dengz kawi raez. Yak daz daehz naeh kheuz Abraham. Ohz daz pehz nahz, Phraz Pen Caoh leh kawnz reu aangz keu ni <sup>9</sup>cih bawnz kheuz Abraham. Tam mok tam maetz a rias khaehz ne teungz an nam plaehz plaehz rak keui ngaz teunyz sapz tuhз ngal.”

<sup>10</sup> Wungz ihz keui maanyz Yohn, “Ehz ngaz bawnz cih naehz hoh?”

<sup>11</sup> Yohn daz, “Ihz maang seu kaeng keu aarz keui aez ihz nam maang nahz hawkz, ihz maang seum suamz keui kaw cih ceun diz.”

<sup>12</sup> Ihz seutz khawn keui truz leh teuk sruz, keuh maanyz hnhz, “Sra, ehз ngaz bawnz cih seu naez?”

<sup>13</sup> Hnhz daz keuh nahz, “Yak seutz leuz lak ihz mawh keui tam.”

<sup>14</sup> Siukz teur ka keui kaw maanyz hnhz, “Ehz samz ngaz cih seu naez?”

Hnhz kaw tawpz daz, “Yak lawkz suamz paekz ihz, yak maap ihz, paw seu langz an daehz bawnz raez.”

<sup>15</sup> Ceun ihz keui mang Khris ngaz truz ne keuh thaang daz, “Yohn anz anz Khris  
<sup>16</sup>haz?” Yohn daz keuh nahz, “Ohz aez pehz nahz teuk sruz tuh omz, maang thaengz Hawkz an yeung truz ne mawh myaat lak ohz. Ohz nam theukz khawz nuarz cawng khlapz Hnhz. Hnhz ngaz aez pehz nahz teuk sruz tuhz Khuanz Seu Ngamz boh  
<sup>17</sup>tuhz ngal. Kaai tihz Hnhz tawnz mok seum pat pat tuhz paangz tiz ngohz, cakz kuhz keui sapz tuhz taen, cakz hiapz keui tucz sapz tuhz ngal an nam ngat seu pawk.”  
<sup>18</sup>Yohn lao keuh nahz mony tang meoz keui  
<sup>19</sup>rae rawz keuh nahz reu oiz rak. Keuz daz Yohn daz khunz Herot leh pleung Herotias, an naeh yah seum boh daehz, boh an hnhz  
<sup>20</sup>cih pleung an raai klawhz meoz. Khunz Herot kaw cih an pleung thaengz seu meoz ne naeh an hnhz leh Yohn sapz tuhz thang.

### Yesuhz leh teuk sruz omz

(Matthe 3:13-17, Markus 1:9-11)

<sup>21</sup> Meuz ihz keui leh teuk sruz ne Yesuhz kaw leh tang Daehz. Meuz Hnhz suz  
<sup>22</sup>tawngz ne kaang raaaz peun lawk, Khuanz Seu Ngamz cur cu kaai Hnhz naeh ceun toz raang ploiz. Maang reus truz thaz kaang raaaz daz, “Mih naeh Kuanz an Ohz yaw, an Ohz trohz phawmz.”

### Craangz mus ihz keu daehz keu daepz Yesuhz

(Matthe 1:1-17)

<sup>23</sup> Meuz Yesuhz seun teungz cih kaanz Daehz, a saak Hnhz naeh kraao waiz kawlz. Ihz keui thaang Hnhz naeh kuanz  
<sup>24</sup>Yosep, Yosep naeh kuanz Heli, Heli naeh kuanz Matthat, Matthat naeh kuanz

Lewi, Lewi naeh kuanz Melki, Melki naeh kuanz Yannai, Yannai naeh kuanz Yosep,  
<sup>25</sup>Yosep naeh kuanz Mattathias, Mattathias naeh kuanz Amos, Amos naeh kuanz Nahum, Nahum naeh kuanz Esli, Esli  
<sup>26</sup>naeh kuanz Nakkai, Nakkai naeh kuanz Maath, Maath naeh kuanz Mattathias, Mattathias naeh kuanz Semein, Semein naeh kuanz Yosech, Yosech naeh kuanz  
<sup>27</sup>Yoda, Yoda naeh kuanz Yoanan, Yoanan naeh kuanz Resa, Resa naeh kuanz Serupbabel, Serupbabel naeh kuanz  
<sup>28</sup>Shealtiel, Shealtiel naeh kuanz Neri, Neri naeh kuanz Melki, Melki naeh kuanz Atdi, Atdi naeh kuanz Kosam, Kosam naeh kuanz Elmadam, Elmadam naeh kuanz  
<sup>29</sup>Er, Er naeh kuanz Yoshua, Yoshua naeh kuanz Elieser, Elieser naeh kuanz Yorim, Yorim naeh kuanz Matthat, Matthat naeh  
<sup>30</sup>kuanz Lewi, Lewi naeh kuanz Simeon, Simeon naeh kuanz Yudah, Yudah naeh kuanz Yosep, Yosep naeh kuanz Yonam,  
<sup>31</sup>Yonam naeh kuanz Eliakim, Eliakim naeh kuanz Melea, Melea naeh kuanz Menna, Menna naeh kuanz Mattatha, Mattatha naeh kuanz Nathan, Nathan naeh kuanz  
<sup>32</sup>Dawit, Dawit naeh kuanz Yesse, Yesse naeh kuanz Obet, Obet naeh kuanz Boas, Boas naeh kuanz Salmon, Salmon naeh kuanz  
<sup>33</sup>kuanz Nahshon, Nahshon naeh kuanz Amminadap, Amminadap naeh kuanz Atmin, Atmin naeh kuanz Arni, Arni naeh kuanz Hesron, Hesron naeh kuanz Peres,  
<sup>34</sup>Peres naeh kuanz Yudah, Yudah naeh kuanz Yakop, Yakop naeh kuanz Isaac, Isaac naeh kuanz Abraham, Abraham naeh kuanz Terah, Terah naeh kuanz  
<sup>35</sup>Nahor, Nahor naeh kuanz Seruk, Seruk naeh kuanz Reu, Reu naeh kuanz Pelek, Pelek naeh kuanz Eber, Eber naeh kuanz



<sup>36</sup>Shelah, Shelah naeh kuanz Kainan, Kainan naeh kuanz Arphasat, Arphasat naeh kuanz Shem, Shem naeh kuanz  
<sup>37</sup>Noah, Noah naeh kuanz Lamech, Lamech naeh kuanz Methuselah, Methuselah naeh kuanz Enoch, Enoch naeh kuanz Yaret, Yaret naeh kuanz Mahalalel, Mahalalel  
<sup>38</sup>naeh kuanz Khenan, Khenan naeh kuanz Enosh, Enosh naeh kuanz Set, Set naeh kuanz Adam, Adam naeh kuanz Phraz Pen Caoh.

### Tahz Yesuhz talz reung dengz kyaam ya

**4** Yesuhz weng truz thaz omz Yordan, Khuanz Seu Ngamz Phraz neuk kaai Hnhz. Khuanz Phraz aacz lan Hnhz tuh  
<sup>2</sup>ruk. A diz Manaas kyaam ya Hnhz ponz kawlz seu ngihz. Meuz phangz seu ngihz an keu diz Hnhz nam suamz naehz, meuz kraao a wa peun ne Hnhz coh.  
<sup>3</sup> Manaas daz Hnhz nahz, “Beuk Mih naeh Kuanz Phraz Pen Caoh kaw, lao kawnz reu aangz an ni aez penz kaaiz mun raez.”  
<sup>4</sup> Yesuhz kaw tawpz daz, “Taemz mok tuh kyaamz lik daz, ‘Ihz ehz leh taw seum suamz damz phawmz nam anz.’”  
<sup>5</sup> Manaas kaw leh Hnhz raw kaai rang trawng, plaeh Hnhz nahz prih keu teh  
<sup>6</sup>hacz aamz seu co kyehz. Manaas daz Hnhz nahz, “Ohz ngaz aez Mih nahz bunz boh a na keu ni. An ni naeh khangz ihz aez mok ohz nahz, ohz sunz aez yaeh kaw bawnz.  
<sup>7</sup>Beuk Mih seuk deumz waiz ohz kaw an keu ni hacz aamz ngaz penz khangz Mih.”  
<sup>8</sup> Yesuhz kaw mial daz, “Taemz mok tuh kyaamz lik daz, ‘Seuk deumz waiz Phraz Cen Cen Phraz Pen Caoh daehz, waiz Hnhz pan.’”

<sup>9</sup> Waaiz an diz Manaas leh Hnhz lan a weng Yerusalem, mok Hnhz kaai cawkz cacz wat ne daz Hnhz nahz, “Beuk Mih naeh Kuanz Phraz Pen Caoh kaw plawiz teuk klaez toz  
<sup>10</sup>Mih raez! Taemz mok tuh kyaamz lik daz, ‘Phraz Pen Caoh ngaz cao teu maan kaang  
<sup>11</sup>raaoz Daehz keui yawt Mih. Keuh ngaz pumz leh Mih, yak aez cawng Mih teu reu aangz.’”  
<sup>12</sup> Yesuhz kaw tawpz daz, “Tuhz kyaamz lik daz, ‘Yak kyaam ya Phraz Cen Cen Phraz Pen Caoh daehz.’”  
<sup>13</sup> Waaiz Manaas kyaam ya Hnhz a wa keunyz ne praasz Hnhz lan rae ngawm kraao sang trohz.

### Yesuhz seun teungz cih kaanz Phraz

*(Matthe 4:12-17, Markus 1:14-15)*

<sup>14</sup> Yesuhz truz cu mial prih Kalile, neuk tang taanz khoz Khuanz Seu Ngamz. Reu oiz Hnhz keui sirz lan tuh prih an diz klawh  
<sup>15</sup>ti. Hnhz sawnz aez tawiz cawp, ihz keui lupz phrawz Hnhz.

### Ihz weng Nasaret keui thiangz Yesuhz

*(Matthe 13:53-58, Markus 6:1-6)*

<sup>16</sup> Yesuhz lan weng Nasaret ti Daehz mawh, ceun Hnhz kai kut tuh cawp rawz traz kaai seu ngihz sinz ne Hnhz kut. Hnhz ceng  
<sup>17</sup>ngaz rawz kyaamz lik, ihz aez Hnhz nahz kyaamz ihz taangz phraz Isaiah, khawz mar lik ne rawz talz,  
<sup>18</sup> “Khuanz Phraz Cen Cen naeh kaai ohz, kawp daz Hnhz ras ohz aez lao reu oiz rak tawiz ihz phaanz. Hnhz cao ohz rawz traz ihz klaez khawz keui lawt,

aez ihz ngaai lapz keui awlz,  
 aez ihz peur teuk keui lawt.  
<sup>19</sup> Aez lao sawz, 'Wit an bawnz reung  
 dengz rak Phraz Cen Cen ne  
 a wa phraeoz.'"

<sup>20</sup> Yesuhz mar mial mar lik, aez mial ihz pao  
 crawp rae keu dez. Ihz tuhz crawp keui  
 teur aacz daehz ngaai ceukz yawt Hnhz.

<sup>21</sup> Hnhz daz thaengz keuh nahz, "Ceun pehz  
 ngarz tuhz kyaamz lik ne a wa keunyz meo  
 ni."

<sup>22</sup> Keuh teur aacz daehz sangz mony reu ma  
 ngaam an Hnhz lao, keuh teur deuz teur  
 daz daehz nahz, "Hnhz nam anz kuanz  
 Yosep haz?"

<sup>23</sup> Hnhz daz keuh nahz, "Pehz leh mony  
 neungz an diz ngaz daz phaatah Ohz nam  
 kaat, 'Tahz sra, seuk neum mial toz daehz  
 raez.' an daz ne, pehz te daz Ohz, 'Tuhz  
 weng Mih a niz kaw cih ceun ehz ngarz  
 lawng Mih cih klawhz meoz tuhz weng

<sup>24</sup> Kapernaum raez.' Ohz daz mawn pehz  
 nahz, 'Ihz taangz phraz an nae kaw nam

<sup>25</sup> maang mawk mael tuhz raap daehz.' Teuk  
 ngarz raez, co ihz taangz phraz Eliyas ne  
 maang yah keu maaiz heungz baaiz tuhz  
 prih Israel ne anz mawn. Keuiz daz meuz  
 cung rat waiz wit plawi tualz kiarz, coh

<sup>26</sup> nguat tang prih ne, nam plawiz Eliyas lan  
 cu yah keu maaiz keu diz hawkz hawkz,  
 keuiz daz plawiz hnhz lan tawz yah keu

<sup>27</sup> maaiz a weng Sarephat tuhz prih Sidon. Co  
 ihz taangz phraz Elisha kaw ihz penz tut  
 keui heungz baaiz tuhz prih Israel. Nam  
 maang yaeh bilz, naeh taw Naaman, ihz  
 prih Siria pan bilz a."

<sup>28</sup> Ihz naeh tuhz crawp rawz traz keui ngarz

<sup>29</sup> mony reu ma an diz ne keuh sunz ca. Keuh  
 caac ceng, wah peun lae Hnhz thaz nawk  
 weng, raak lan Hnhz cawkz phlaan ne ngaz

<sup>30</sup> reuk euz teuk klaez Hnhz a diz. Keuiz daz  
 Yesuhz datz kut peur lah wungz ihz rae lae  
 lan Daehz ne.

### Ihz phiz kut hawkz

(Markus 1:21-28)

<sup>31</sup> Waaiz an diz Yesuhz lan weng  
 Kapernaum tuhz prih Kalile ne sawnz ihz

<sup>32</sup> keui nahz kaai seu ngihz sinz. A diz kaw  
 ihz keui sangz baaiz an Hnhz sawnz, kawp

<sup>33</sup> daz Hnhz sawnz tang a na. Tuhz crawp  
 rawz traz ne maang ihz phiz kut hawkz,  
<sup>34</sup> hnhz raak keurz, "Euz! Yesuhz ihz weng  
 Nasaret. Mih lo naehz tang ehz? Mih  
 ngaz ya ehz haz? Ohz mas boh Mih naeh  
 yaeh! Mih naeh Ihz Seu Ngamz Phraz Pen  
 Caoh."

<sup>35</sup> Yesuhz kaw lao phiz an diz, "Moh pras  
 pras, lae lan thaz hnhz raez." Phiz kaw  
 teuk taz ihz an diz peur lah ihz, nam cih  
 phez naehz kaai hnhz kaw lae lan.

<sup>36</sup> Keuh sangz klawhz ihz rae teur daz daehz  
 nahz, "Naeh mony naehz awh lah? Tang a  
 na boh taanz khoz Hnhz lao phiz ne phiz

<sup>37</sup> keui kaw lae lan." Reu oiz Hnhz keui sirz  
 lan tuhz eungz an diz.

### Yesuhz aez ihz keui moh rak

(Matthe 8:14-17, Markus 1:29-34)

<sup>38</sup> Hnhz lae thaz crawp rawz traz ne kut  
 tuhz kaang keuh Simon. Ihz keui maanyz  
 Hnhz kawr keunz keuh Simon reum na

<sup>39</sup> baaiz. Hnhz kaw ceng rim keun nyah ne  
 wah thengz reum. Reum hnhz kaw bilz,  
 hnhz kaw rawi luat cih damz keuh.

<sup>40</sup> Meuz seu ngihz a wa keutz ne ihz keui  
 leh truz ihz penz klawhz meoz keui truz  
 cu Yesuhz. Hnhz mok tihz Daehz kaai keuh

<sup>41</sup> klawhz ihz rae cih aez keuh moh rak hacz aamz. Phiz keui kaw lae thaz ihz keui rae raak keurz daz, “Tahz ehz naeh kuanz Phraz Pen Caoh.”

Kawp daz phiz keui mas Hnhz naeh Tahz Khris, kawp ceun diz Hnhz nam aez keuh upz naehz.

### Yesuhz rawz tawiz cawp rawz traz

(Markus 1:35-39)

<sup>42</sup> Meuz prih a wa thaangz ne Yesuhz lae lan ti ihz pras. Ihz keui teur aacz daehz khahz Hnhz, meuz a wa awlz ne keuh lao yak

<sup>43</sup> aez Hnhz praasz daehz. Keuiz daz Hnhz lao keuh, “Tawiz weng aarz diz kaw Ohz lo rawz reu oiz rak lawng prih Phraz rae Phraz Pen Caoh phuhz Ohz truz.”

<sup>44</sup> Kawp ceun diz Hnhz rawz tawiz cawp tuh z prih Yio keui.

### Yesuhz raak leh teu paez Daehz

(Matthe 4:18-22, Markus 1:16-20)

**5** Naeh seu seu ngihz Yesuhz ceng boh waar nawngz Kennesaret, wungz ihz keui teur aacz daehz prawk cu Hnhz aez

daehz bawnz ngarz mony reu ma Phraz

<sup>2</sup> Pen Caoh. Hnhz awlz ceun luang aarz lamz deukz boh a waar, tahz kahz keui cur thaz

<sup>3</sup> ceun luang, haaoz boh rup daehz. Yesuhz kut tuh z ceun luang seu lamz an naeh ceun

luang Simon, maanyz aez ceun luang hnhz mok yaan waar teur nyaenz. Yesuhz kaw keu dez kaai ceun luang sawnz aez wungz ihz.

<sup>4</sup> Meuz Hnhz a wa sawnz aez ne Hnhz lao Simon, “Lan ti omz truh, rup teuk klaez rup pehz keui rae aez trupz bawnz kahz.”

<sup>5</sup> Simon mial daz, “Tahz, ehz khatz phawmz rup kahz sawmz raang kaw nam bawnz hawkz hawkz. Keuiz daz beuk Mih

<sup>6</sup> daz ceun diz kaw ngaz rup boh.” Meuz keuh cih tawiz ne, keuh rup talz kahz

heungz baaiz rup keuh paw ngaz teutz.

<sup>7</sup> Keuh keul waacz tihz aez ihz an naeh kaai ceun luang taang lamz truz kawr daehz.

Ihz keu diz kaw truz leh kawr, kahz neuk ceun luang tang aarz lamz paw ngaz

<sup>8</sup> beukz. Meuz Simon Petros awlz lawng an diz ne, seuk deumz kingz sangz aacz

ngaai Yesuhz daz, “Oz Tahz, praasz yaan yaan ohz raez, kawp reung dengz kawi

ohz heungz baaiz.”

<sup>9</sup> Petros boh ihz an naeh kawmz hnhz hacz aamz keui sangz baaiz kaai an bawnz kahz

<sup>10</sup> heungz. Kuanz boh hnhz Yakop kaar Yohn an naeh kuanz Sebede kaw sangz. Yesuhz

daz Simon nahz, “Yak doz, seu ni lan mih ngaz naeh tahz kahz khahz ihz.”

<sup>11</sup> Keuh mok ceun luang a waar, thengz hacz aamz kaw lan tawiz Yesuhz.

### Yesuhz seuk neum ihz tut

(Matthe 8:1-4, Markus 1:40-45)

<sup>12</sup> Meuz Yesuhz naeh tuh z weng seu ti ne maang ihz hawkz tut tang toz, meuz hnhz

awlz Yesuhz ne kupz maanyz daz, “Tahz, beuk Mih sunz kaw cih aez ohz rak.”

<sup>13</sup> Yesuhz kaw teuk yawr tihz Daehz rae teu hnhz daz, “Ohz sunz boh, aez mih rak.”

Meuz diz luat tut hnhz kaw a wa rak.

<sup>14</sup> Yesuhz lao hnhz, “Yak lao yaeh nahz lawng an ni. Keuiz daz lan cu saangz longz plaez

toz mih. Pukz caw kreung lu ceun Moses seumz mok, aez naeh saak se aacz ngaai ihz, ta mih a wa seu ngamz.”

<sup>15</sup> Keuiz daz reu oiz Yesuhz baaiz yeung lae, wungz ihz keui truz cu Hnhz, aez daehz bawnz teuk ngarz traz boh an penz keui <sup>16</sup> aez moh rak. Keuiz daz Hnhz lae lan tuhz ruk rae suz tawngz ceun Hnhz kai cih.

### **Yesuhz seuk neum ihz yam seu plaakz**

*(Matthe 9:1-8, Markus 2:1-12)*

<sup>17</sup> Naeh seu seu ngihz, Yesuhz yeung sawnz boh ne Pharise boh ihz mawz kyaamz teur ka, an truz thaz tawiz weng prih Kalile tang prih Yio boh weng Yerusalem keui keu dez boh a diz. Taanz khoz Phraz Cen Cen caang cih aez ihz moh rak ne naeh <sup>18</sup> kaai Hnhz. Ihz teur ka leh truz ihz yam seu plaakz yaetz boh kaai saatz. Keuh kyaam kut tuhz kaang, leh hnhz lan tam <sup>19</sup> aacz ngaai Yesuhz. Keuiz daz wungz ihz heungz baaiz rae nam caang. Kawp ceun diz keuh raw lang kusz kaang, klawkz seum teuk eupz teur ka, plawiz cur ihz penz tang saatz peur lah wungz ihz, aacz ngaai <sup>20</sup> Yesuhz. Meuz Yesuhz awlz reung dengz yum keuh ne daz ihz penz nahz, “Raen aez, Ohz a wa plawiz lawt reung dengz kawi mih.”

<sup>21</sup> Pharise boh sra mawz kyaamz keui daz tuhz phawmz daehz, “Hnhz an ni upz pleung Phraz Pen Caoh, naeh Phraz Pen Caoh pan plawiz lawt bawnz reung dengz kawi.”

<sup>22</sup> Yesuhz mas keuh thaang ceun diz rae maanyz keuh nahz, “Cih naehz tuhz <sup>23</sup> phawmz pehz thaang ceun diz a? An nae lao yoh? ‘A wa plawiz lawt reung dengz kawi mih,’ ne yoh haz? ‘Ceng nuar lan <sup>24</sup> raez’, ne yoh haz? Aez pehz mas Kuanz Kingz Ihz maang a na tuhz prih keu teh plawiz lawt bawnz reung dengz kawi,” rae

Hnhz lao ihz yam seu plaakz nahz, “Rawi raez, leh ti yaetz mih, weng kaang daehz.”

<sup>25</sup> Meuz diz luat ihz an diz kaw rawi aacz ngaai ihz, leh ti yaetz daehz weng, lupz <sup>26</sup> phrawz Phraz Pen Caoh. Ihz keui sangz klawhz ihz rae lupz phrawz Phraz Pen Caoh daz, “Meu ni ehz a wa awlz an rak seum sangz.”

### **Yesuhz raak Lewi**

*(Matthe 9:9-13, Markus 2:13-17)*

<sup>27</sup> Waaiz an diz Yesuhz lae truz, Hnhz kaw awlz ihz seutz khawn hawkz, mus hnhz daz Lewi, keu dez boh siungz seutz khawn rae Yesuhz daz hnhz nahz, “Lan tawiz Ohz <sup>28</sup> raez.” Lewi thengz hacz aamz rae ceng lan tawiz Hnhz.

<sup>29</sup> Lewi kaw raenz pawiz an keur a kaang daehz, a diz maang tang wungz ihz seutz khawn boh ihz aarz diz keui keu dez kawmz <sup>30</sup> keuh a pheunz. Pharise teur ka boh sra mawz kyaamz keui nae teu paez Yesuhz, “Cih naehz pehz suamz kawmz ihz seutz khawn boh ihz raai keui a?”

<sup>31</sup> Yesuhz daz mial keuh nahz, “Ihz moh rak keui nam lo tahz seu neumz, ihz penz keui <sup>32</sup> pan lo a. Ohz truz ta raak leh ihz keu sangz nam anz, keuiz daz naeh ta ihz maang reung dengz kawi keui aez caanz daehz eunz.”

### **Kaerz seum suamz**

*(Matthe 9:14-17, Markus 2:18-22)*

<sup>33</sup> Ihz teur ka maanyz Yesuhz daz, “Teu paez Yohn tahz teuk sruz keui kaerz seum suamz boh suz tawngz, teu paez Pharise keui kaw cih ceun diz, cih naehz teu paez Mih keui yeung suamz yeung tiangz a?”

<sup>34</sup> Yesuhz daz keuh nahz, “Meuz tahz seu naaoz yeung naeh kawmz boh khaekz daehz tuhز pawiz kopz ku ne anz keuh <sup>35</sup>kaerz seum suamz? Kraao leh tahz seu naaoz praasz lan keuh ne ngaz naeh truz boh, meuz diz keuh ngaz kaerz seum suamz.”

<sup>36</sup> Yesuhz leh mony pung taek lao keuh nahz, “Yaeh nam siarz leh banz kaai kreung teun mehz teuk baangz kreung trimz, beuk cih ceun diz teuk luh kreung teun mehz, banz teun mehz kaw nam <sup>37</sup>kiungz kreung trimz. Yaeh nam leh omz seu pit teun mehz sapz tuhز seu kiz hurz trimz. Beuk cih ceun diz, omz seu pit ne ngaz teuk plakz seu kiz, omz kaw lae rae <sup>38</sup>seu kiz hurz kaw ngaz luh. Omz seu pit teun mehz kaw sapz tuhز seu kiz teun <sup>39</sup>mehz leun. Ihz tiangz omz seu pit trimz ne nam song omz seu pit teun mehz. Kawp keuh daz, ‘An trimz baaiz rak.’”

### Tahz seu ngihz sinz

(Matthe 12:1-8, Markus 2:23-28)

**6** Kaai seu ngihz sinz seu laehz, meuz Yesuhz datz boh maar kaaiz kyung ne teu paez Hnhz keui seur keut seum kawr, keur miat suamz kaai plaakz tihz daehz. <sup>2</sup>Pharise teur ka daz, “Cih naehz pehz cih leuz traz kaai seu ngihz sinz a?” <sup>3</sup>Yesuhz mial daz, “Lawng an meuz khunz Dawit boh ihz an naeh kawmz hnhz keui <sup>4</sup>coh ne pehz nam ti rawz haz? Hnhz kut tuhز कांग Phraz Pen Caoh, leh suamz kaaiz mun taangz, an saangz longz keui

pan suamz bawnz ne aez tang bohз raen daehz keui nahz.”

<sup>5</sup> Yesuhz siupz lao thaengz, “Kuanz Kingz Ihz naeh tahz seu ngihz sinz.”

### Ihz tihz wiatz seu plaakz

(Matthe 12:9-14, Markus 3:1-6)

<sup>6</sup> Kaai seu ngihz sinz thaengz hawkz ne Yesuhz kut tuhз crawl rawz traz rae sawnz aez, ihz tihz takz kaaiz wiatz hawkz <sup>7</sup>kaw naeh a diz. Ihz mawz kyaamz keui boh Pharise keui pao yawt khahz reung dengz kawi, anz Yesuhz seuk neum ihz kaai seu <sup>8</sup>ngihz sinz. Yesuhz mas phawmz keuh rae daz ihz tihz wiatz nahz, “Truz ceng teun khinz ihz raez.” Ihz an diz kaw truz ceng. <sup>9</sup>Yesuhz kaw maanyz thaengz, “Traz ehз lao mok daz seu naez kaai seu ngihz sinz? Cih an rak haz? Cih an raai haz? Khyawt <sup>10</sup>ihz haz? Ya ihz haz?” Hnhz yawt keuh wit wit, daz ihz tihz wiatz nahz, “Peuk caatz tihz mih raez.” Ihz an diz kaw peuk caatz tihz daehz, tihz hnhz kaw rak mial. <sup>11</sup>Keuh ca baaiz rae teur daz daehz nahz ngaz cih seu naez kaai Yesuhz.

### Yesuhz ras teu maan seu kawlz aarz

(Matthe 10:1-4, Markus 3:13-19)

<sup>12</sup> Meuz kraao an diz Yesuhz raw lang rang, suz tawngz tawz Phraz Pen Caoh sawmz <sup>13</sup>raang. Meuz prih a wa thaangz ne Hnhz raak teu paez seu kawlz aarz a Daehz rae <sup>14</sup>peuk mus keuh aez naeh teu maan. Simon an Hnhz peuk mus Petros, seum bohз hnhz

Andre, Yakop, Yohn, Philip, Bartholome,  
<sup>15</sup>Matthe, Thomas, Yakop an naeh kuanz  
 Alphaeus, Simon ihz plaakz prih omz Yio,  
<sup>16</sup>Yudas an naeh kuanz Yakop boh Yudas  
 Iskariot an ngaz saz kokz Hnhz.

### Yesuhz sawnz ihz boh seuk neum ihz

(*Matthe 10:1-4, Markus 3:13-19*)

<sup>17</sup> Meuz Yesuhz boh teu maan keui cur truz  
 thaz rang ne ceng boh ti peng, tang wungz  
 teu paez an heungz. A diz maang ihz  
 heungz baaiz, truz thaz prih Yio, weng  
 Yerusalem boh weng Sidon boh weng Taia  
<sup>18</sup>weng an naeh waar paang laai. Keuh truz  
 teuk ngarz traz Hnhz boh aez reung penz  
 keui bilz. Ihz phiz kut keui kaw moh rak.  
<sup>19</sup>Ihz keui kyaam teu Hnhz aez daehz moh  
 rak kawp daz taanz khoz lae kaai Hnhz  
 seuk neum aez ihz moh rak klawhz ihz.

### An rak boh an nam rak

(*Matthe 5:1-12*)

<sup>20</sup> Yesuhz yawt teu paez keui, daz keuh  
 nahz,  
 Pehz naeh an phaanz keui  
 bawnz an rak,  
 kawp daz prih Phraz Pen Caoh  
 naeh prih pehz.  
<sup>21</sup> Pehz an coh nguat seu ni keui  
 bawnz an rak,  
 kawp daz keuh ngaz phre phawmz.  
 Pehz an yaam seu ni keui bawnz an rak,  
 kawp daz pehz ngaz bawnz ngot.  
<sup>22</sup> Meuz ihz ceuh pehz, ihz thiangz thengz  
 pehz, ihz saehz pehz, boh kheuz pehz kawp  
<sup>23</sup>Kuanz Kingz Ihz ne bawnz an rak. Meuz  
 naeh ceun diz pehz seuz phawmz haaz

wang lah. Kawp daz pehz ngaz bawnz a  
 keoz mawh baaiz lang kaang raaaz. Ihz  
 keu daehz keu daepz keuh a wa cih kaai  
 ihz taangz phraz keui nahz ceun diz.

<sup>24</sup> Keuiz daz pehz an maang seu ni keui  
 ngaz bawnz an nam rak,

kawp daz pehz a wa sa seu ni.

<sup>25</sup> Pehz an suamz saakz paakz neuk  
 seu ni keui

ngaz coh nguat.

Pehz an ngot seu ni keui, bawnz  
 an nam rak,

kawp daz pehz ngaz bawnz kraang  
 bawnz yaam.

<sup>26</sup> Meuz ihz lupz pehz ne, pehz bawnz an  
 nam rak, ihz keu daehz keu daepz keuh  
 lupz ihz taangz phraz plawmz ceun diz.

### Rak raan su daehz

(*Matthe 5:38-48, Matthe 7:12*)

<sup>27</sup> Ohz lao pehz an teuk ngarz Ohz keui  
 nahz, rak raan su daehz, cih an rak kaai ihz

<sup>28</sup> an ceuh daehz raez. Aez reung dengz rak  
 ihz an kin daehz raez. Suz tawngz aez tang

<sup>29</sup> ihz cih an nam rak kaai daehz raez. Beuk  
 maang ihz paapz mawk pehz seu plaakz

kaw aez hnhz paapz thaengz seu plaakz

raez. Beuk maang ihz leh seu kaeng mah

<sup>30</sup> pehz kaw yak kan, aez thaengz tang seu  
 kaeng supz raez. Aez tawz ihz maanyz

pehz raez. Meuz ihz rimz leh khangz pehz

<sup>31</sup> keui kaw yak maanyz mial daehz eunz.  
 Pehz sunz aez ihz cih daehz ceun nae kaw,  
 cih kaai ihz ceun diz.

<sup>32</sup> Beuk pehz rak ihz an rak daehz pan kaw  
 bawnz a keoz naehz? Ihz raai keuiz kaw

<sup>33</sup> yeung mawz rak ihz rak keuh. Beuk pehz  
 cih rak ihz an cih rak daehz pan kaw ngaz

34 bawnz a keoz naehz? Ihz raai keuiz kaw yeung mawz cih boh ceun diz. Beuk pehz aez ihz rawm ihz caang phrawz bawnz pan kaw pehz ngaz bawnz a keoz naehz? Ihz raai keui kaw dawhz mial seu daehz rawm 35 aez. Rak raan su daehz keui raez. Cih an rak kaai keuh. Aez keuh rawm pehz eunz, yak mang ta bawnz mial. Beuk cih ceun diz pehz ngaz bawnz suz an mawh rae pehz ngaz penz kuanz Phraz Pen Caoh an trawng dutz. Kawp daz Hnhz cih kez cuz kaai ihz nam mas kez cuz boh kaai ihz raai. 36 Teur yawng ihz ceun Paz pehz mawz teur yawng.

### **Yak nae ihz cih kawi**

*(Matthe 7:1-5)*

37 Yak daz ihz cih kawi, beuk cih ceun diz Phraz Pen Caoh kaw ngaz nam daz pehz cih kawi. “Yak nae ihz, Phraz Pen Caoh kaw nam nae pehz. Plawiz reung dengz kawi ihz raez. Beuk cih ceun diz Phraz Pen Caoh kaw ngaz plawiz reung dengz kawi 38 pehz. Aez ihz nahz lah, pehz ngaz bawnz mial. Pehz ngaz bawnz mial neuk neuk. Tekz sapz, kruhz sapz tuhz seu kiz pehz thanz paw neuk pe. Seu pehz tuang aez ihz nahz ne pehz bawnz mial seu diz.” 39 Yesuhz lao keuh nahz mony pung taek daz, “Ihz ngaai lapz teur deuiz nam caang plaehz daehz nahz reung dengz, beuk cih 40 ceun diz klaehz tuhz lanz tang keu aarz. Teu paez nam kyahz taan sra daehz. Keuiz daz beuk a wa sawnz leh thonz thonz kaw naeh ceun sra daehz. 41 Nam awlz hikz khaehz tuhz ngaai daehz samz awlz mun tuhz ngaai kuanz mai

42 daehz seu naez? Mih lao kuanz mai daehz nahz ceun nae? ‘Aez ohz leh thengz mun tuhz ngaai mih naz.’ Ihz seuk cih aez, leh thengz aacz hikz khaehz tuhz ngaai daehz raez, waaiz an diz mih caang awlz caem caem mun tuhz ngaai kuanz mai daehz eu.”

### **Teungz khaehz boh plaehz hnhz**

*(Matthe 7:16-20, 12:33-35)*

43 “Teungz rak nam caang plaehz an nam rak. Teungz nam rak kaw nam caang 44 plaehz an rak. Yawt leh plaehz keuh kaw mas teungz. Yaeh nam tawkz leh plaehz laangz wah kaai teungz seur keutz. Yaeh nam tawkz leh plaehz seu pit kaai cing seur 45 keutz. Ihz rak ne plaehz an rak tuhz kingz keu nuasz daehz, ihz nam rak ne plaehz an nam rak tuhz kingz keu nuasz daehz. Kingz keu nuasz neuk ceun nae kaw mony daz ceun diz.”

### **Ihz cih kaang keu aarz**

*(Matthe 7:16-20, 12:33-35)*

46 “Nam teuk ngarz mony Ohz samz raak 47 Ohz, ‘Tahz, Tahz,’ ceun nae? Ihz an truz cu Ohz boh teuk ngarz mony reu ma Ohz 48 rae cih tawiz ne naeh ceun ihz kawngz lu truh truh rae teungz kaang tam kaai reu aangz. Meuz omz lus lukz laakz sapz kaang an diz kaw nam keusz kawp daz cih mok 49 klakz. Keuiz daz ihz ngarz mony reu ma Ohz rae nam cih tawiz ne naeh ceun ihz cih kaang tam kaai keu teh. Meuz omz lus lukz laakz sapz kaang an diz ne yaatz luat. Kaang an diz kaw luh krang baaiz.”

## Reung dengz yum ihz mawh siukz

(Matthe 8:5-13)

**7** Waaiz Yesuhz a wa lao hacz ihz nahz ceun diz ne Hnhz kut tuhz weng  
<sup>2</sup> Kapernaum. Maang ihz mawh siukz prih Rom hawkz an upz seu peur ya ne maang peur cao an hnhz yaw baaiz ne reum paw  
<sup>3</sup> ngaz yam. Meuz ihz mawh siukz ngarz reu oiz Yesuhz ne, hnhz cao ihz mawh Yio teur ka maanyz aez Yesuhz truz teuk bilz aez  
<sup>4</sup> peur cao daehz. Meuz keuh phraeoz tawz Yesuhz ne krio daz, “Hnhz an ni kiungz boh  
<sup>5</sup> Mih kawr. Hnhz rak kheuz ehz rae a wa cih aez cawp rawz traz ehz nahz.”  
<sup>6</sup> Kawp ceun diz Yesuhz lan tawiz keuh. Meuz Yesuhz thatz phraeoz kaang keuh ne ihz mawh siukz an diz cao kuanz boh daehz truz lao Yesuhz, “Tahz, yak cih teuk reu toz Daehz raez. Ohz nam theukz Mih  
<sup>7</sup> kut tuhz eupz kaang ehz. Ohz kaw nam theukz lan cu Mih. Maang mony reu ma seu khaw keuz kaw peur cao ohz ngaz moh  
<sup>8</sup> rak. Kawp daz ohz naeh ihz tuhz keutz a na khunz, tuhz keutz ohz kaw maang siukz heungz baaiz. Beuk ohz lao hawkz nahz, ‘Lan raez,’ daz kaw hnhz lan, lao thaengz hawkz nahz, ‘Truz raez,’ daz kaw hnhz truz. Ohz cao peur cao daehz, ‘Cih an ni raez.’ daz kaw hnhz cih.”  
<sup>9</sup> Meuz Yesuhz ngarz an diz ne sangz. Hnhz waaiz yawt rae lao ihz tawiz puatz Daehz keui nahz, “Ohz daz pehz nahz, tuhz kheuz Israel ne Ohz nam ti awlz reung dengz yum thanz teur ni.”

<sup>10</sup> Ihz an hnhz cao lan keui weng phraeoz mial ne awlz peur cao an diz kaw a wa moh rak.

## Yesuhz cih kuanz yah keu maaiz meu rae imz

<sup>11</sup> Nam paw ceu nawhz Yesuhz boh teu paez keui lan weng Nain, tang wungz ihz keui.  
<sup>12</sup> Meuz Hnhz a wa thatz keur wah weng ne, ihz keui klamz lae truz ihz yam hawkz, naeh kuanz keur meh taw hawkz yah keu maaiz, ihz weng keui truz tawiz yah keu  
<sup>13</sup> maaiz. Meuz Caoh Phraz awlz keun nyah an diz ne teur yawng baaiz yah keu maaiz  
<sup>14</sup> rae daz, “Yak yaam.” Yesuhz nuar lan teu teun lawngz, ihz klamz keui kaw deukz. Yesuhz lao, “Ihz plung aez, Ohz daz mih  
<sup>15</sup> nahz, rawi raez.” Ihz yam an diz rawi keu dez upz mial. Yesuhz leh ihz an diz aez mah hnhz nahz.  
<sup>16</sup> Keuh hacz aamz tang doz tang sangz lupz phrawz kez cuz Phraz Pen Caoh daz, “Ihz taangz phraz an mawh a wa paw truz peur lah ehz. Phraz Pen Caoh truz kawr ihz Daehz.”  
<sup>17</sup> Reu oiz lawng Yesuhz an diz kaw sirz tuhz prih Yio boh prih aarz diz.

## Yohn cao teu paez daehz maanyz Yesuhz

(Matthe 11:2-19)

<sup>18</sup> Teu paez Yohn keui lao plaez meu rae Yohn nahz lawng an ni. Hnhz raak teu paez  
<sup>19</sup> daehz keu aarz, cao lan maanyz Yesuhz,



“Mih naeh Tahz an ngaz truz ne haz? Nam anz kaw ehz bawnz mang thaengz hawkz haz?”

<sup>20</sup> Meuz kaar phraeoz tawz Yesuhz ne maanyz, “Yohn tahz teuk srucz cao aaz maanyz daz, ‘Mih naeh Tahz an truz haz? Nam anz kaw ehz bawnz mang thaengz hawkz haz?’”

<sup>21</sup> Meuz phangz an diz Yesuhz seuk neum ihz penz keui, wah thengz phiz keui, cih

<sup>22</sup> aez ihz ngaai lapz keui awlz. Yesuhz lao kaar nahz, “Paarz weng lao Yohn nahz an paarz ngarz boh an paarz awlz, ihz ngaai lapz keui awlz, ihz cawng nam rak keui nuar, ihz tut keui rak meu rae, ihz lutz keui ngarz, ihz yam keui meu rae imz, ihz

<sup>23</sup> phaanz keui bawnz ngarz reu oiz rak. Ihz an nam yum pleung Ohz keui ngaz bawnz an rak.”

<sup>24</sup> Waaiz teu paez Yohn weng lan ne Yesuhz lao wungz ihz keui nahz lawng Yohn daz, “Pehz lan yawt naehz tuh ruk tui? Lan yawt teungz teur law keusz tawiz kurz

<sup>25</sup> pat haz? Nam anz kaw lan yawt ihz kap kreung laep haz? Yawt luz! Ihz kap kreung langz mawh rae moh khyaw khyaw ne naeh

<sup>26</sup> tuhz hawz pan. Pehz lae lan yawt naehz? Lan yawt ihz taangz phraz haz? Anz mawn laai, Ohz daz pehz nahz hnhz mawh lak ihz

<sup>27</sup> taangz phraz. Naeh Yohn, tuhz kyaamz lik taemz mok lawng hnhz daz, ‘Teuk ngarz raez, Ohz cao ihz puhz reu oiz Ohz lan aacz Mih, hnhz ngaz meu rae reung dengz

<sup>28</sup> aacz Mih.’ Ohz lao pehz nahz, ihz an keun nyah keut penz truz ihz ne yaeh nam mawh lak Yohn leui. Keuz daz ihz an kyehz lak ihz tuhz prih Phraz Pen Caoh ne mawh lak Yohn boh.”

<sup>29</sup> Ihz hacz aamz an ngarz mony an diz keui, pa tang ihz seutz khawn keui kaw

yeung leh teuk srucz tawz Yohn, teur aacz daehz saanyz rap daz Phraz Pen Caoh

<sup>30</sup> naeh Tahz an keu sangz. Keuz daz Pharise boh ihz mawz kyaamz keui nam saanyz rap a kyaam Phraz Pen Caoh rae keuh nam leh teuk srucz tawz Yohn.

<sup>31</sup> Yesuhz siupz lao thaengz, “Ihz kaap seu ni, ngaz leh naehz neung ez? Keuh deuiz

<sup>32</sup> naehz? Keuh naeh ceun kuanz ihz keui keu dez boh tuhz teur laas, teur raak daehz nahz, ‘Ehz putz ceu waasz taw pehz kaw pehz nam haaiz, ehz keun euiz taw pehz

<sup>33</sup> kaw pehz nam lengz lengz.’ Yohn tahz teuk srucz truz, nam suamz kaaiz mun, nam tiangz omz seu pit ne pehz daz, ‘Hnhz naeh

<sup>34</sup> ihz phiz kut.’ Kuanz Kingz Ihz truz, suamz suamz tiangz tiangz ne pehz samz daz, ‘Yawt luz, Hnhz an ni naeh ihz suamz leuz tiangz leuz, naeh tahz keu daaoz, naeh ihz

<sup>35</sup> cih boh ihz seutz khawn boh ihz nam taap keui.’ Keuz daz, naeh ihz saanyz pinya keui caang mas pinya naeh an anz.”

### Yesuhz naeh kaang Simon Pharise

<sup>36</sup> Ihz Pharise hawkz raak Yesuhz suamz kaaiz bimz tawz kaang daehz, Hnhz kaw lan kaang keuh, keu dez suamz kawmz.

<sup>37</sup> Tuhz weng an diz maang keun nyah nam rak hawkz, hnhz ngarz Yesuhz naeh a diz ne leh truz nam man hawm seu teur

<sup>38</sup> dawngz reu aangz keun ra, truz ceng thaz butz Yesuhz, omz ngaai car sapz kaai cawng Yesuhz, leh hukz daehz watz cawng kuny cawng Hnhz rae leh omz hawm

<sup>39</sup> thawkz sapz cawng Yesuhz. Meuz Pharise an paangz Yesuhz awlz ceun diz ne daz tuhz phawmz daehz, “Beuk Hnhz naeh ihz taangz phraz kaw taan daehz mas keun

nyah an teu cawng Hnhz ne naeh keun

nyah ceun nae ez, keun nyah an ni naeh keun nyah nam rak.”

<sup>40</sup> Yesuhz kaw daz Pharise nahz, “Simon, Ohz lao mih nahz nyaenz awah.”

Simon kaw daz, “Lao raez.”

<sup>41</sup> Yesuhz kaw lao, “Maang ihz keu aarz khamz ni tahz paekz hawkz. Hawkz khamz paekz denarius hanz cawi, thaengz hawkz samz khamz paekz denarius ha khamz.

<sup>42</sup> Kaar nam phrawz bawnz ni daehz teur deuiz. Kawp ceun diz tahz paekz yaoz mah aez kaar eunz. Yaeh ngaz rak leuz tahz paekz?”

<sup>43</sup> Simon kaw daz, “Ohz thaang naeh ihz khamz ni heungz.”

Yesuhz kaw daz, “Anz mawn ceun mih

<sup>44</sup> thaang ne.” Yesuhz waaiz yawt keun nyah rae daz Simon nahz, “Anz mih awlz keun nyah an ni? Meuz Ohz kut tuhaz kaang pehz, mih nam aez Ohz nahz omz khez cawng, keuiz daz hnhz leh omz ngaai daehz khez cawng Ohz, leh hukz daehz watz teuk

<sup>45</sup> hawngz. Mih nam saanyz kuny Ohz, keuiz daz thaz meuz Ohz phraeoz ne hnhz kuny

<sup>46</sup> cawng Ohz tikz tikz. Mih nam leh nam man thukz aez kingz Ohz, keuiz daz keun nyah an ni leh nam man hawm thawz

<sup>47</sup> sapz cawng Ohz. Kawp ceun diz an hnhz kawi heungz keui a wa lawt ne mawz rak heungz. Keuiz daz ihz talz plawiz lawt teur nyaenz ne mawz rak taw teur nyaenz.”

<sup>48</sup> Hnhz kaw daz keun nyah an diz nahz, “Reung dengz kawi mih keui a wa lawt keuiz.”

<sup>49</sup> Ihz keu dez suamz keui kaw teur daz daehz nahz, “Ihz an plawiz lawt bawnz tang reung dengz kawi ne naeh yaeh ez?”

<sup>50</sup> Keuiz daz Yesuhz lao keun nyah an diz nahz, “Reung dengz yum mih ne a wa khyawt mih keuiz, lan nimz nimz naz.”

**8** Moh ceu nawhz taan taan Yesuhz

lan tawiz weng tawiz pruh, rawz reu

<sup>2</sup> oiz rak lawng prih Phraz. Teu paez seu

kawlz aarz kaw naeh kawmz Hnhz, tang

keun nyah teur ka an lawt thaz tihz phiz

<sup>3</sup> boh thaz an penz keui, keuh naeh Mari

Makdalen an phiz teu pulz lae, Yoanna an

naeh yah Khusa, an naeh ihz mawh rumz

khunz Herot, Susanna boh keun nyah aarz

diz an heungz baaiz keui leh phrihz phrahz

daehz kawr Yesuhz boh teu paez Hnhz

keui.

### Pung taek ihz pakz seu maalz

(Matthe 13:1-9, Markus 4:1-9)

<sup>4</sup> Meuz ihz heungz baaiz seu weng taw seu weng keui truz wungz tawz Yesuhz ne, Hnhz lao keuh nahz pung taek,

<sup>5</sup> “Maang ihz hawkz lan pakz seu maalz. Cakz ceu teur ka klaez tawiz reung dengz,

ihz paenz rae simz ploiz keui seutz suamz

<sup>6</sup> thengz. Cakz ceu teur ka samz klaez peur

lah ruk reu aangz, meuz lae truz penz

teungz ne wiatz hawngz lan kawp daz keu

<sup>7</sup> tehaz nam nyaakz. Cakz ceu teur ka samz

klaez peur lah ruk seur keutz, mawh teun

peu ne teungz seur keutz keui riat keuh.

<sup>8</sup> Cakz ceu teur ka samz klaez kaai keu tehaz

rak, teungz ne mawh plaehz truz peur ya

pun.”

Meuz Hnhz daz ceun diz ne, Hnhz raak

daz, “Ihz maang keu tiakz keui aez hnhz

ngarz.”

**Kawp naehz Yesuhz bawnz  
lao pung taek an ni?**

*(Matthe 13:10-17, Markus 4:10-12)*

<sup>9</sup> Teu paez Yesuhz keui maanyz Hnhz ti loz  
<sup>10</sup> mony pung taek. Hnhz tawpz daz, “pehz  
bawnz mas an truh an trawng prih Phraz  
Pen Caoh. Keuiz daz ihz keu diz nahz samz  
Ohz bawnz lao mony pung taek, keuh yawt  
boh kaw nam awlz, teuk ngarz boh kaw  
nam loz.”

**Ti loz mony pung taek**

*(Matthe 1:18-23, Markus 4:13-20)*

<sup>11</sup> “Ti loz mony pung taek samz, cakz ceu  
<sup>12</sup> ne naeh mony reu ma Phraz. Cakz ceu an  
klaez tawiz reung dengz ne naeh ceun ihz  
ngarz mony reu ma Phraz, Manaat truz  
leh thengz traz an naeh tuh kingz keu  
nuasz keuh, yak aez keuh yum, yak aez  
<sup>13</sup> keuh bawnz khyawt. Cakz ceu an klaez  
peur lah ruk reu aangz samz naeh ceun  
ihz ngarz mony reu ma Phraz, keuh seuz  
phawmz saanyz rap traz boh. Keuiz daz  
rias nam kut truh tuh kingz keu nuasz  
keuh. Keuh yum taw seu co pan, meuz talz  
reung dengz kyaam ya ne keuh keun titz.  
<sup>14</sup> Cakz ceu an klaez ruk seur keutz ne ihz  
ngarz mony reu ma Phraz, keuiz daz keuh  
cih tawiz lomz daehz, reung dengz kawcz  
phawmz, takz phawmz ron khamz ciz cim  
lawz kahz keui riat keuh rae plaehz nam  
<sup>15</sup> kuhz. Cakz ceu an klaez kaai keu teh rak  
samz naeh ceun ihz ngarz mony reu ma  
Phraz, leh phawmz an rak boh an keun ra  
ne saanyz rap rae nyeun thonz taw plaehz.

**Leh sroz dupz ngal dupz**

*(Markus 4:21-25)*

<sup>16</sup> Yaeh nam leh sroz dupz ngal ngawiz peun  
kleoz, nam anz kaw nam mok tuhz keutz  
kuz. Aez thaangz sapz ihz ne mok kaai lakz  
ngal ngawiz leun.  
<sup>17</sup> Nam maang phrihz phrahz naehz an seun  
tapz bawnz, ngaz bawnz awlz hacz aamz.  
Phrihz phrahz an unz keui kaw ihz ngaz  
mas, ihz ngaz awlz.  
<sup>18</sup> Kawp ceun diz pehz bawnz teuk ngarz  
ceun nae ne seu tih daehz eunz lah.  
Kawp daz tawz ihz maang ne ngaz bawnz  
thaengz, tawz ihz nam maang ne leh  
thengz thaengz tang an hnhz thaang  
daehz maang.”

**Mah Yesuhz boh seum bohz Yesuhz**

*(Matthe 12:46-50, Markus 3:31-35)*

<sup>19</sup> Mah Yesuhz boh seum bohz Yesuhz keui  
truz cu Hnhz, keuiz daz kawp wungz ihz  
keui heungz baaiz rae nam caang lan thatz  
<sup>20</sup> Hnhz. Ihz teur ka lao Yesuhz, “Mah Mih  
boh seum bohz Mih keui ceng boh thaz  
nawk tui, keuh sunz awlz mih da.”  
<sup>21</sup> Yesuhz daz keuh nahz, “Ihz teuk ngarz  
cih tawiz mony reu ma Phraz ne naeh mah  
Ohz boh seum bohz Ohz.”

**Yesuhz teuk deukz cung coh**

*(Matthe 8:23-27, Markus 4:35-41)*

<sup>22</sup> Naeh seu seu ngihz Yesuhz boh teu paez  
Hnhz keui kut tuh ceun luang, Hnhz daz  
keuh nahz, “Han! Ehz lo lan thaz tui omz

nawngz lah.” Keuh kaw teur aacz daehz  
<sup>23</sup>lan. Meuz keuh lan ne Yesuhz yaetz reuk  
 ngeut tuhz ceun luang. Meuz ceun diz cung  
 longz kurz longz pat tuhz nawngz, omz  
 ngaz neuk tuhz ceun luang keuh. Keuh talz  
<sup>24</sup>phez mawh longz. Teu paez keui lan peun  
 rawi Hnhz daz, “Tahz, Tahz, ehz ngaz  
 leucz omz.”

Yesuhz kaw ceng lao kurz boh seuk mar  
<sup>25</sup>omz an seuk rawi keui kaw deukz lan. Hnhz  
 daz teu paez keui nahz, “Pehz daz daehz  
 yum ne naeh a naez?”

Keuh teur aacz daehz doz baaiz paw  
 sangz, teur daz daehz nahz, “Hnhz an ni  
 naeh yaeh ez? Hnhz lao kurz boh seuk mar  
 omz kaw teuk ngarz Hnhz!”

### Yesuhz wah thengz phiz raai

(Matthe 8:8-34, Markus 5:1-20)

<sup>26</sup> Yesuhz boh teu paez Hnhz keui tumz ceun  
 luang phraeoz eungz Kerasin, an naeh  
<sup>27</sup>thaz tui omz nawngz Kalile. Meuz Yesuhz  
 raw lan lang pukz ne ihz weng an diz hawkz  
 an phiz kut ne truz saanyz Hnhz. Hnhz nam  
 kap kreung ceu nawhz baaiz. Hnhz nam  
 moh kaang daehz, moh tuhz ruk peun lu  
<sup>28</sup>pan. Meuz hnhz awlz Yesuhz ne kupz aacz  
 ngaai Yesuhz, raak keurz daz, “Yesuhz,  
 Kuanz Phraz Pen Caoh an trawng dutz  
 aez! Mih lo ohz cih naehz? Ohz maanyz  
<sup>29</sup>mih, yak pae suamz ohz!” An hnhz daz  
 ceun diz ne kawp daz Yesuhz wah thengz  
 teuk aacz phiz raai a daehz. Phiz a wa  
 kut tuhz hnhz heungz laehz baaiz, ihz leh  
 nuarz hirz boh khi cawng mat mok rae  
 pao yawt boh hnhz kaw hnhz teuk teutz an

mat mok daehz rae phiz keui wah hnhz kut  
 tuhz ruk.

<sup>30</sup> Yesuhz maanyz hnhz, “Mus mih daz  
 naehz?”

Hnhz daz, “Mus ohz daz Phiz Wungz.”  
 Kawp daz phiz keui kut heungz baaiz tuhz  
<sup>31</sup>ihz an diz. Phiz keui maanyz yak aez  
 Yesuhz wah daehz lan tuhz ngal raai an  
 truh lak ihz.

<sup>32</sup> A diz maang wungz lek mawh suamz boh  
 kaai rang ne phiz keui maanyz Yesuhz aez  
 daehz bawnz kut tuhz wungz lek, Hnhz  
<sup>33</sup>kaw aez keuh kut. Phiz keui kaw lae thaz  
 ihz an diz, kut tuhz wungz lek, lek keui teuk  
 basz cur tawiz phraakz rae leucz yam tuhz  
 omz nawngz.

<sup>34</sup> Meuz ihz khaenz lek keui awlz lawng an  
 taamz naeh peun ne keuh wang lan lao  
<sup>35</sup>tuhz weng boh tawiz pruh. Ihz keui kaw lae  
 yawt an daehz ngarz. Meuz keuh phraeoz  
 tawz Yesuhz ne keuh awlz ihz phiz tomz  
 kut ne keu dez boh rim cawng Yesuhz, kap  
 boh kreung, phawmz hnhz kaw a wa rak  
<sup>36</sup>mial rae keuh kaw doz. Ihz awlz tawiz keui  
 lao plaehz ihz nahz lawng an ihz phiz kut  
<sup>37</sup>ne cih seu naez moh rak truz. Ihz eungz  
 Kerasin keui doz baaiz rae keuh maanyz  
 Yesuhz lae lan thaz eungz daehz. Yesuhz  
<sup>38</sup>kaw kut tuhz ceun luang, weng mial. Ihz  
 phiz lae an diz kaw maanyz lan tawiz  
 Yesuhz,

<sup>39</sup> Yesuhz daz hnhz nahz, “Mih weng cu  
 kaang daehz, krai lawng Phraz Pen Caoh  
 cih kez cuz kaai mih thanz teur nae ne.”

Ihz an diz weng krai plaehz ihz tang weng  
 nahz an Phraz Pen Caoh cih kez cuz kaai  
 daehz thanz teur nae ne.

**Kuanz keun nyah Yairus boh  
keun nyah naamz thawkz**

*(Matthe 9:18-26, Markus 5:21-43)*

<sup>40</sup> Meuz Yesuhz phraeoz mial plaakz thaz niz nawngz ne ihz heungz baaiz pao Hnhz <sup>41</sup>rae saanyz seuz rap Hnhz. Meuz ceun diz maang ihz mawh cawp hawkz mus hnhz daz Yairus ne truz kupz rim cawng Yesuhz, hnhz maanyz Yesuhz aez weng <sup>42</sup>kaang daehz. Kawp daz hnhz maang kuanz keun nyah taw daehz, a saak a wa naeh seu kawlz aarz khopz ne penz paw raenz yam.

Meuz Yesuhz lan ne ihz keui teur aacz daehz prawk cu rim Hnhz klawhz plaakz. <sup>43</sup>Maang keun nyah hawkz naamz thawkz a wa bawnz seu kawlz aarz wit, seuk neum a naez kaw nam bilz, ron khamz hnhz pan <sup>44</sup>hacz. Hnhz prawk truz thaz puatz Yesuhz rae teu caam caai kreung Hnhz, meuz ceun diz luat, naamz hnhz kaw a wa eutz.

<sup>45</sup>Yesuhz kaw maanyz, “Yaeh teu Ohz?”

Ihz keui kaw daz daehz nam bawnz teu. Petros daz, “Tahz, wungz ihz keui prawk wit wit boh Mih.”

<sup>46</sup>Keuiz daz Yesuhz daz, “Maang boh ihz hawkz teu Ohz, Ohz mas taanz khoz lae <sup>47</sup>thaz Ohz.” Keun nyah an diz mas daehz nam unz bawnz, paw teur ceus rae truz kupz aacz ngaai Yesuhz, hnhz lao aacz ngaai ihz kawp naehz rae daehz teu boh, <sup>48</sup>a wa teu kaw moh rak luat ne. Yesuhz daz keun nyah an diz nahz, “Kawp mih yum rae a wa bilz, lan nimz nimz naz.”

<sup>49</sup>Meuz Yesuhz daz boh ceun diz ne maang ihz hawkz truz thaz kaang Yairus truz lao daz, “Kuanz keun nyah mih a wa yam, nam lo krio Tahz Sra leui.”

<sup>50</sup>Meuz Yesuhz ngarz ne lao Yairus nahz, “Yak khiz, lo yum pan, kuanz keun nyah mih ne ngaz rak boh.”

<sup>51</sup>Meuz Yesuhz phraeoz kaang Yairus ne neuz lak Petros, Yakop, Yohn boh mah paz keun nyah pan nam aez yaeh kut tuh <sup>52</sup>kaang. Ihz keui yaam lengz lengz boh tuhz kaang kawp kuanz keun nyah yam. Yesuhz daz keuh nahz, “Yak yaam, kuanz keun nyah ne nam yam keuiz, yaetz reuk ngeut pan.”

<sup>53</sup>Ihz keu diz mas kuanz ihz ne a wa yam <sup>54</sup>rae ngot keulz Yesuhz. Yesuhz cao keuh lae klawhz ihz rae tawnz tihz kuanz ihz <sup>55</sup>ne raak daz, “Kuanz, rawi raez!” Khuanz hnhz kut truz mial rae rawi truz luat. Yesuhz cao keuh leh aez seum suamz aez <sup>56</sup>hnhz suamz. Mah paz hnhz keui sangz baaiz, keuiz daz Yesuhz seumz keuh yak aez keuh lao ihz nahz lawng an ni.

**Tahz Yesuhz cao lan teu  
maan seu kawlz aarz**

*(Matthe 10:5-15, Markus 6:7-13)*

**9** Yesuhz raak teur cuhz teu paez seu kawlz aarz ne aez keuh nahz taanz khoz boh a na wah thengz phiz hacz aamz <sup>2</sup>boh aez ihz penz keui moh rak. Hnhz phuhz keuh lan rawz lawng prih Phraz Pen Caoh <sup>3</sup>boh aez ihz penz keui moh rak. Hnhz seumz keuh, “Yak khaenz lan naehz tawiz reung dengz, yak khaenz kawn teur leui, seu kiz, <sup>4</sup>seum suamz, paekz boh kreung plut. Meuz pehz kut tuhz kaang ihz, ihz saanyz rap pehz ne thangz thonz taw pehz lae lan <sup>5</sup>thaz weng an diz. Tawiz ti ihz nam saanyz rap pehz kaw meuz pehz lae thaz weng an

diz ne pisz thengz yangz cawng pehz, aez keuh mas pehz cih khatz keuh.”

<sup>6</sup> Teu paez keui kaw lae khahz lan tawiz pruh rae rawz reu oiz rak boh aez ihz penz keui bilz.

### **Khunz Herot phawmz sukz**

*(Matthe 14:1-12, Markus 6:14-29)*

<sup>7</sup> Meuz khunz Herot an upz peung prih Kalile ngarz lawng Yesuhz cih klawhz meoz ne phawmz sukz baaiz, kawp daz ihz teur ka daz Yohn tahz teuk sruz ne a wa meu <sup>8</sup>rae imz. Teur ka kaw daz Eliyas a wa paw truz, teur ka samz daz ihz taangz phraz meuz neungz seu hawkz hawkz ne a wa <sup>9</sup>meu rae imz. Khunz Herot daz, “Ohz a wa tatz kingz Yohn, an ohz ngarz ne naeh yaeh ez?” Hnhz sawkz khahz aez daehz awlz Yesuhz.

### **Yesuhz damz ihz hanz rengz**

*(Matthe 14:13-21, Markus 6:30-44, Yohn 6:1-14)*

<sup>10</sup> Teu maan keui weng truz cu mial Yesuhz rae lao plaehz Hnhz nahz lawng daehz cih hacz aamz. Yesuhz raak keuh lan tawiz daehz ti seun tapz ihz a weng an ihz raak <sup>11</sup>daz weng Betsaida. Keuiz daz wungz ihz keui mas ti Hnhz lan rae lan tawiz Hnhz. Hnhz kaw saanyz rap keuh, lao plaehz keuh nahz lawng prih Phraz Pen Caoh boh aez ihz penz keui bilz. <sup>12</sup> Meuz seu ngihz ngaz keutz ne teu maan seu kawlz aarz keui truz cu Yesuhz daz,

“Plawiz ihz keui weng khahz yal suamz seum suamz boh khahz yaetz cih khaekz tawiz pruh tawiz maar keui kawp daz a niz naeh ti yaan ihz.”

<sup>13</sup> Keuiz daz Yesuhz lao keuh nahz, “Pehz aez keuh nahz seum suamz raez.” Keuh kaw daz, “Ehz maang kaaiz mun khanz boh kahz keu aarz pan, nam anz kaw, Mih sunz aez ehz lan yal seum suamz ta wungz ihz <sup>14</sup>keu ni hiuz?” A diz keur meh mawh naeh kraao hanz rengz.

Yesuhz lao teu paez daehz keui nahz, “Aez ihz keui keu dez teur mukz hanz kawlz raez.”

<sup>15</sup> Teu paez keui kaw cao ihz keu dez. <sup>16</sup> Yesuhz leh kaaiz mun khanz boh kahz keu aarz, ngaw yawt lang kaang raaaz, dawgz kez cuz Phraz ta kaaiz mun. Pekz kaaiz mun aez teu paez keui nahz, cao teur <sup>17</sup>phraez aez ihz keui nahz. Keuh suamz saakz klawhz ihz, teu paez keui seutz leh an leuz ne bawnz seu kawlz aarz piat neuk neuk.

### **Petros rap Yesuhz naeh Kuanz Phraz**

*(Matthe 16:13-19, Markus 8:27-29)*

<sup>18</sup> Naeh seu laehz meuz Yesuhz suz tawngz boh taw Daehz ne teu paez keui kaw naeh kawmz Hnhz, Yesuhz maanyz keuh, “Ihz <sup>19</sup>keui daz Ohz naeh yaeh?” Keuh tawpz, “Teur ka daz naeh Yohn tahz teuk sruz, teur ka daz naeh Eliyas, teur ka kaw daz naeh ihz taangz phraz meuz neungz meu <sup>20</sup>rae imz.” Yesuhz kaw maanyz keuh, “Pehz luz thaang Ohz naeh yaeh?” Petros kaw

lao, “Mih naeh Khris Phraz Pen Caoh.”  
<sup>21</sup> Yesuhz lao kan keuh, yak aez lao ihz nahz lawng an ni.

**Yesuhz lao teuk aacz  
 lawng an Daehz ngaz yam**

*(Matthe 16:20-28, Markus 8:30-9:1)*

<sup>22</sup> Yesuhz lao keuh, “Kuanz Kingz Ihz ne bawnz talz suhz heungz, ihz mawh keui, beunz caangz keui, ihz mawz kyaamz keui ngaz thiangz thengz. Ihz ngaz piamz Hnhz, keuz daz moh waiz seu ngihz meu rae imz thaz yam boh.”

<sup>23</sup> Hnhz kaw siupz lao thaengz ihz keui nahz, “Beuk yaeh sunz lan tawiz puatz Ohz kaw bawnz thiangz thengz daehz eunz, baekz lakz klawngz klaengz daehz klawh

<sup>24</sup> seu ngihz rae lan tawiz Ohz. Ihz an sunz khyawt phawmz daehz ne ngaz sumz, ihz sumz kawp Ohz ne ngaz bawnz khyawt

<sup>25</sup> phawmz daehz. Beuk ihz bawnz peung tang prih keu tehz keuz daz phawmz hnhz

<sup>26</sup> sumz kaw maang a keoz naehz? Beuk yaeh keu seh z kawp Ohz boh traz Ohz ne, Kuanz Kingz Ihz kaw ngaz keu seh z caz ihz an diz meuz Hnhz truz kaai bunz Daehz, tang bunz Paz Phraz, tang bunz teu maan kaang

<sup>27</sup> raaoz an seu ngamz. Ohz daz mawn pehz nahz, ihz teur ka an naeh a niz keui meuz keuh maat awlz prih Phraz Pen Caoh ne maat yam.”

**Yesuhz plut raang**

*(Matthe 17:1-8, Markus 9:2-8)*

<sup>28</sup> Moh kraao tahz seu ngihz keu ni Yesuhz raak Petros, Yakop boh Yohn raw lang

<sup>29</sup> rang ngaz suz tawngz. Meuz Hnhz suz tawngz boh ne mael Hnhz kaw pleung,

kreung Hnhz kaw keun ra aasz keum  
<sup>30</sup> yaamz hacz aamz. Meuz diz luat maang ihz keu aarz an naeh Moses boh Eliyas upz taw

<sup>31</sup> Yesuhz. Kaar thaangz tuh z bunz kaang raaoz rae upz taw Yesuhz, lawng Yesuhz ngaz bawnz yam tuh z weng Yerusalem tawiz reung dawh z Phraz Pen Caoh ngaz

<sup>32</sup> keunyz. Petros boh kuanz boh z keui reum lim. Meuz keuh dangz ne keuh awlz bunz Yesuhz boh ihz keu aarz ceng kawmz

<sup>33</sup> Hnhz. Meuz Moses boh Eliyas ngaz praasz Yesuhz ne Petros mony luanz lao Hnhz, “Tahz, rak seum moh baaiz a niz! Eh z ngaz cih siungz keu waiz, hawkz ta Mih, hawkz ta Moses, thaengz hawkz samz ta Eliyas.”

<sup>34</sup> Meuz phangz Petros daz boh ne peu eumz truz reupz keuh, keuh naeh tuh z peu eumz

<sup>35</sup> ne keuh doz baaiz. Reus rawh z tuh z peu eumz daz, “Hnhz an ni naeh Kuanz Ohz, an Ohz ras. Teuk ngarz Hnhz raez.”

<sup>36</sup> Meuz reus ne deukz, kiutz taw Yesuhz pan. Meuz phangz an diz keuh nam yaak lao yaeh nahz lawng an keuh awlz.

**Yesuhz wah thengz phiz  
 an naeh tuh z kuanz ihz**

*(Matthe 17:14-18, Markus 9:14-27)*

<sup>37</sup> Ceun kap siz meuz Yesuhz boh teu paez keu waiz cur truz thaz rang ne ihz wungz

<sup>38</sup> mawh keui truz saanyz Hnhz. Ihz hawkz an naeh tuh z wungz ihz ne raak Hnhz, “Tahz sra, yawt kuanz ohz an naeh taw

<sup>39</sup> hawkz ne. Phiz leh hnhz, cih aez hnhz raak keurz. Cih aez hnhz raw, aez busz lae thaz mony. Kai truz tekz hnhz baaiz, samz lae

<sup>40</sup> kreuk baaiz. Ohz maanyz teu paez Mih wah thengz phiz, keuz daz keuh nam pae.”

<sup>41</sup> Yesuhz daz, “Euz Kheuz ihz an nam mawz yum boh ihz peuk ceuh keui! Ohz ngaz moh

kawmz pehz rae ngaz bawnz nyeun pehz seu naeh?" Yesuhz kaw lao paz kuanz ihz nahz, "Leh kuanz mih truz a niz raez."

<sup>42</sup> Meuz kuanz ihz truz boh ne phiz teuk taz hnhz tuhز keu tehز, cih aez hnhz raw. Keuiz daz Yesuhz nal phiz rae cih aez kuanz ihz moh rak. Hnhz leh kuanz ihz aez mial paz keuh nahz.

**Yesuhz lao teuk aacz  
lawng an Daehz ngaz yam**

*(Matthe 17:22-23, Markus 9:30-32)*

<sup>43</sup> Ihz keui sangz baaiz taanz khoz mawh Phraz Pen Caoh. Ihz keui sangz baaiz an Yesuhz cih klawhز meoz, Hnhz lao teu <sup>44</sup>paez Daehz keui nahz, "Tang tang an Ohz ngaz lao pehz nahz. Kuanz Kingz Ihz ne ngaz talz ihz aapz Daehz tuhز tihز <sup>45</sup>raan su." Keuiz daz keuh nam loz phawmz Yesuhz daz naehz. An diz yeung seun tapz boh keuh, kawp ceun diz nam loz phawmz, keuiz daz keuh nam yaak maanyz lawng mony reu ma an diz.

**Naeh yaeh mawh lak ihz**

*(Matthe 18:1-5, Markus 9:33-37)*

<sup>46</sup> Teu paez Yesuhz keui teur thiangz daehz, tuhز keuh ne yaeh ngaz mawh myaat lak

<sup>47</sup> ihz. Keuiz daz Yesuhz mas an keuh wonz, kawp ceun diz Hnhz raak kuanz ihz hawkz <sup>48</sup>aez ceng rim Daehz. Beuk a wa kaw daz keuh nahz, "Ihз saanyz rap kuanz ihz kawp mus Ohz ne saanyz rap Ohz, ihz saanyz rap Ohz kaw saanyz rap tang an puhz Ohz truz. Ihz kyehez lak ihz tuhз pehz ne naeh an mawh lak ihz."

**Ihз nam khatz pehz ne naeh ihз pehz**

*(Markus 9:38-40)*

<sup>49</sup> Yohn daz Yesuhz, "Tahz, ehз awlz ihз hawkz leh mus Mih wah thengz phiz, ehз kan hnhз kawp daz hnhз nam anz cumz <sup>50</sup>ehз." Keuiz daz Yesuhz lao hnhз, "Yak kan hnhз, ihз nam khatz pehz ne naeh ihз pehz."

**Ihз pruh Samari nam saanyz Yesuhз**

<sup>51</sup> Meuz a wa thatz kraao leh phrawz Yesuhz raw kaang raaоз ne Hnhз klaengz <sup>52</sup>tatz phawmz lan weng Yerusalem. Hnhз puhз ihз teur ka lan aacz pruh Samari, aez keuh raenz peun tan mok ta Daehз <sup>53</sup>klawhз meoz. Keuiz daz ihз keui nam saanyz rap Hnhз kawp daz Hnhз aanz <sup>54</sup>lan weng Yerusalem. Meuz teu paez Hnhз Yakop boh Yohn awlz an diz ne kaar lao



Yesuhz, “Tahz, anz Mih sunz aez ehz raak ngal kaang raaaz klaez teuk kat keuh ceun Eliyas cih?”

<sup>55</sup> Keuiz daz Yesuhz peur wiang rae nae kaar, kawp teu paez keui daz ceun diz.

<sup>56</sup> Keuh kaw lan cu pruh aarz tui boh.

### Ihz sunz tawiz Yesuhz

(Matthe 8:19-22)

<sup>57</sup> Meuz keuh naeh kaai reung dengz ne maang ihz hawkz truz lao Yesuhz daz, “Ohz ngaz lan tawiz Mih ti Mih lan.”

<sup>58</sup> Yesuhz kaw mial daz, “Sohz keu teh maang tuh moh, simz ploiz keui kaw maang haanz, keuiz daz Ohz an naeh Kuanz Kingz Ihz samz nam maang ti tam kingz.”

<sup>59</sup> Yesuhz lao ihz thaengz hawkz nahz, “Lan tawiz Ohz raez.”

Ihz an diz daz, “Tahz, aez ohz bawnz weng saangz keo aacz paz daehz.”

<sup>60</sup> Yesuhz mial daz, “Aez ihz yam keui saangz keo mial ihz daehz yam raez! Mih samz khahz kraai lawng prih Phraz Pen Caoh.”

<sup>61</sup> Ihz thaengz hawkz samz lao Yesuhz, “Ohz ngaz lan tawiz Mih, keuiz daz aez ohz weng seumz aacz ihz kaang daehz naz.”

<sup>62</sup> Yesuhz kaw daz hnhz nahz, “Ihz tawnz ngawn thaiz waaiz yawt thaz puatz ne nam theukz prih Phraz Pen Caoh.”

Yesuhz cao teu paez pulz kawlz aarz lan

**10** Waaiz an diz Yesuhz khaanz thaengz teu paez pulz kawlz aarz rae plawiz lan keuh ihz keu aarz teur tawiz, aez keuh lan aacz Daehz tawiz

<sup>2</sup> weng tawiz pruh ti Daehz ngaz lan. Hnhz leh pung taek daz keuh nahz, “An rak seum woc leh keui heungz baaiz, keuiz daz ihz woc samz lany. Maanyz Tahz aez

<sup>3</sup> phuhz truz ihz woc leh tuh maar. Lan raez, Ohz phuhz lan pehz naeh ceun soz

<sup>4</sup> kyehez plawiz peur lah sohz prawk. Yak khaenz paekz, seu kiz boh cawng khlapz,

<sup>5</sup> yak wias tak ihz tawiz reung dengz. Meuz pehz kut tuh kaang ihz kaw seun teungz

<sup>6</sup> lao daz, ‘Reung dengz nimz aez naeh kaai kaang an ni se kamz.’ Tuhz kaang an diz

beuk maang ihz theukz reung dengz nimz kaw ihz an diz ngaz bawnz. Beuk nam

maang kaw reung dengz nimz an diz ngaz <sup>7</sup> truz cu mial pehz. Thangz kaang ihz an

saanyz rap pehz. Suamz tiangz an keuh raenz aez, kawp daz ihz cih kaanz ne

theukz bawnz boh langz. Yak kraai ti moh <sup>8</sup> cur seu kaang raw seu kaang. Meuz pehz

kut tuh weng an nae kaw, ihz saanyz <sup>9</sup> rap pehz ne suamz an keuh damz. Cih

aez ihz penz keui moh rak, rawz tang ihz nahz, ‘Kraao prih Phraz Pen Caoh a wa

<sup>10</sup> thatz pehz.’ Keuiz daz tawiz weng an nam saanyz rap pehz ne lan cu reung dengz

<sup>11</sup> longz rae daz, ‘Pisz thengz yangz cawng tuh weng pehz an takz cawng ehz, aez

naeh an cih khatz pehz keuiz daz tang tang mok, kraao prih Phraz Pen Caoh a

<sup>12</sup> wa thatz pehz keuiz!’ Ohz daz mawn pehz nahz, kaai seu ngihz tatz traz ne weng an

diz ngaz talz na lak weng Sodom.

Weng ihz an nam mawz yum

(Matthe 11:20-24)

<sup>13</sup> Ihz weng Khorasin keui, pehz bawnz an nam rak, ihz weng Betsaida kaw aez talz

tang daehz. An laak laaiz an Ohz plaez tuhz paarz ne khanz Ohz plaez tuhz weng Taia boh weng Sidon kaw kaar taan daehz caanz reung dengz kaw thaz meu naeh rae kap kreung teur haaaz, keu dez tuhz<sup>14</sup> keum rum. Kaai seu ngihz tatz traz ne paarz ngaz talz na lak weng Taia boh weng<sup>15</sup> Sidon. Weng Kapernaum aez! Mih sunz aez ihz phrawz daehz lang kaang raaaz haz? Nam keuz, mih ngaz talz ihz teuk klaez daehz phraeoz tuhz ngal raai.”

<sup>16</sup> Yesuhz lao teu paez Daehz, “Ihz teuk ngarz pehz ne naeh ihz teuk ngarz Ohz, ihz thiangz pehz ne naeh ihz thiangz Ohz. Ihz thiangz Ohz samz naeh ihz thiangz Phraz an puhz Ohz truz.”

### Teu pae pulz kawlz aarz keui weng phraeoz mial

<sup>17</sup> Meuz teu paez pulz kawlz aarz keui weng phraeoz mial ne seuz phawmz lao Hnhz daz, “Tahz, phiz keuz kaw teuk ngarz ehz, meuz ehz leh mus Mih lao ne.”

<sup>18</sup> Yesuhz daz keuh nahz, “Ohz awlz Satan klaez thaz kaang raaaz naeh ceun laak<sup>19</sup> lawk. Yawt, Ohz aez pehz nahz a na lang kol taanz khoz hacz aamz tang an pae heunyz boh maengz keur ngawz keui. Nam<sup>20</sup> maang naehz cih teuk suhz pehz. Yak seuz phawmz taw phiz teuk ngarz mony pehz, seuz phawmz kawp mus pehz maaiz mok lang kaang raaaz.”

### Yesuhz seuz phawmz

(Matthe 11:25-27, 13:16-17)

<sup>21</sup> Meuz ceun diz Yesuhz seuz phawmz kawp Khuanz Seu Ngamz ne daz, “Paz, Tahz an upz peung lang kaang raaaz boh keu teh,

kez cuz mawh baaiz kawp unz mok phrihz phrahz keu diz thaz ihz mas boh ihz mawz, samz plaez kuanz ihz kyezh keui nahz an diz. Paz, an keu ni penz truz ceun Mih sunz cih kez cuz.

<sup>22</sup> Paz Ohz aez Ohz nahz hacz aamz. Neuz lak Paz, yaeh nam mas Kuanz. Neuz lak Kuanz boh ihz an Kuanz cih aez mas pan, yaeh nam mas Paz.”

<sup>23</sup> Waaiz an diz Yesuhz waaiz lao taw teu paez Daehz keui pan daz, “Ngaai pehz bawnz an rak, kawp daz pehz awlz an taan<sup>24</sup> awlz. Ohz daz pehz nahz, ihz taangz phraz boh khunz keui sunz awlz an pehz awlz kaw nam awlz, sunz ngarz an pehz ngarz kaw nam ngarz.”

### Mony pung taek lawng ihz Samari an rak

<sup>25</sup> Ihz mawz kyaamz hawkz ceng maanyz Yesuhz tang sunz caam yawt daz, “Tahz sra, aez ohz caam phawmz cen cen ne lo cih naehz?”

<sup>26</sup> Yesuhz kaw mial daz, “Tuhz kyaamz lik taemz mok naehz da? Mih rawz maen ceun nae da?”

<sup>27</sup> Ihz an diz kaw daz, “Mih lo rak Phraz Cen Cen, Phraz Pen Caoh daehz kingz keu nuasz hacz aamz, khuanz hacz aamz, keum rang hacz aamz, phawmz hacz aamz. Samz rak ihz rim daehz ceun mih rak toz daehz.”

<sup>28</sup> Yesuhz daz, “Anz, cih ceun diz raez. Mih bawnz caam phawmz cen cen eu.”

<sup>29</sup> Ihz an diz kaw cih ceun daehz naeh ihz cih phrengz rae maanyz Yesuhz, “Yaeh naeh ihz rim daehz hoh?”

<sup>30</sup> Yesuhz mial daz, “Maang ihz hawkz moh weng Yerusalem lan weng Yerikho ne talz conz. Conz keui pucz thengz kreung hnhz,

tiz teuk suhz mawn, meuz raenz yam ne  
<sup>31</sup>lan thengz. Saangz longz seu paz truz  
 tawiz reung dengz rae meuz awlz hnhz  
<sup>32</sup>ne wiar thengz. Moh thaengz nyaenz awh,  
 maang ihz Lewi hawkz truz tawiz reung  
 dengz senz an diz rae awlz thaengz tang  
<sup>33</sup>daehz kaw wiar thengz thaengz. Ihz prih  
 Samari hawkz lan tawiz senz an diz rae  
 meuz hnhz awlz ihz an diz ne maang  
<sup>34</sup>phawmz teur yawng cu hnhz. Lan cu hnhz,  
 thukz aez ihz an diz nahz nam man boh keu  
 daaoz plaehz seu pit, pok aez tang ti suhz.  
 Samz leh tang ihz an diz taangz kaai meu  
 rang mahz liz daehz, lan cu crawl ti ihz  
<sup>35</sup>yaetz preumz rae lum la hnhz a diz. Ceun  
 kap siz ne hnhz aez tahz ti yaetz preumz  
 nahz paekz ron aarz pyaz rae daz, ‘Lum  
 la aez hnhz rak rak naz, beuk paekz nam  
 kumz kaw beuk ohz truz tui aez thaengz.’  
 daz ceun diz rae lae lan.”  
<sup>36</sup> Yesuhz maanyz hnhz, “Keuh keu waiz ne  
 naeh yaeh ihz rim ihz an talz conz a?”  
<sup>37</sup> Ihz mawz kyaamz kaw daz, “Ihz an teur  
 yawng hnhz eu.”  
 Yesuhz lao hnhz, “Lan cih ceun diz naz.”

### Martha kaar Mari

<sup>38</sup> Meuz Yesuhz boh teu paez keui lan  
 tawiz reung dengz ne kut tuhز pruh  
 seu pruh, maang keun nyah hawkz, mus  
 hnhz daz Martha ne, saanyz Yesuhz tuhز  
<sup>39</sup>kaang daehz. Hnhz maang seum bohز  
 keun nyah hawkz mus daz Mari, meuz  
 Yesuhz sawnz ne Mari keu dez teuk ngarz  
<sup>40</sup>a cawng Yesuhz. Martha samz phawmz  
 kawcz tawiz damz khaekz. Hnhz truz cu  
 Yesuhz daz, “Tahz, seum bohز ohz nam  
 kawr ohz, ohz bawnz cih daehz ne ngaz

teungz mah haz? Lao hnhz truz kawr ohz  
 luz.”

<sup>41</sup> Keuiz daz Caoh Phraz lao hnhz, “Martha,  
 Martha! Mih kawcz phawmz, talz seuk ya  
<sup>42</sup>tawiz klawhz ceu klawhz meoz. Keuiz daz  
 an lo ne maang thaengz seu meoz. Mari  
 samz ras leh daehz nahz an rak rae yaeh  
 nam rimz bawnz hnhz eunz.”

### Sawnz aez suz tawngz

(Matthe 6:9-13, 7:7-11)

**11** Naeh seu seu ngihz Yesuhz suz  
 tawngz boh seu ti. Meuz a wa ne  
 teu paez Hnhz hawkz maanyz Hnhz daz,  
 “Tahz, sawnz aez ehz nahz suz tawngz  
 ceun Yohn sawnz aez teu paez daehz nahz  
 luz.”

<sup>2</sup> Yesuhz daz keuh nahz, “Meuz suz tawngz  
 ne daz,

‘Paz ehz an naeh lang kaang raaoz,  
 aez mus Mih naeh ti ro se se kamz.

Aez prih Mih tae se kamz.

<sup>3</sup> Aez ehz nahz seum suamz kumz  
 klawhz seu ngihz,

<sup>4</sup> ceun ehz plawiz lawt reung dengz  
 kawi ihz cih pleung ehz ne  
 plawiz lawt aez ehz se kamz.

Yak aez ehz lan tawiz reung  
 dengz kyaam ya.”

<sup>5</sup> Yesuhz lao thaengz keuh nahz, “Daz  
 yawt ihz hawkz an naeh tuhز pehz ne lan  
 cu kuanz bohز daehz meuz khinz sawmz,  
 maanyz daz, ‘Aez ohz rawm kaaiz mun

<sup>6</sup>keu waiz luz, kuanz bohز ohz lae reung  
 dengz rae taamz phraeoz kaang ehz, ohz  
 samz nam maang seum suamz naehz damz

<sup>7</sup>hnhz.’ Kuanz bohز hnhz kaw moh tuhز  
 kaang daehz ne daz hnhz nahz, ‘Yak krio

ohz! Keur wah a wa peun khatz, kuanz  
ihz ehz kaw yaetz kawmz ohz tuh pahz  
ne. Ohz nam caang rawi leh aez naehz.’  
<sup>8</sup> Ohz lao pehz nahz, kawp daz naeh kuanz  
bohz daehz rae tahz kaang an diz rawi  
leh aez an hnhz maanyz nam anz. Kawp  
yaak maanyz tikz tikz rae tahz kaang an  
diz rawi leh aez an hnhz lo hacz aamz.  
<sup>9</sup> Kawp ceun diz Ohz lao pehz nahz, Maanyz  
raez, ngaz bawnz. Khahz raez, ngaz awlz.  
Khrakz keur wah raez, ngaz lawk aez  
<sup>10</sup> boh pehz nahz. Ihz maanyz keui bawnz,  
ihz khahz keui awlz, ihz khrakz keur wah  
<sup>11</sup> kaw ngaz lawk aez boh. Beuk kuanz pehz  
maanyz kahz ne anz maang paz an leh aez  
<sup>12</sup> heunyz? Beuk maanyz tamz yaerz samz  
leh aez maengz keur ngawz anz maang?  
<sup>13</sup> Pehz naeh ihz nam rak kaw mas boh leh  
aez kuanz daehz nahz an rak, Paz pehz  
an naeh lang kaang raaoz tui baaiz aez  
ihz maanyz Hnhz keui nahz Khuanz Seu  
Ngamz.”

### Yesuhz boh khunz phiz

(Matthe 12:22-30, Markus 3:20-27)

<sup>14</sup> Naeh seu seu ngihz Yesuhz wah thengz  
phiz ahz. Waaiz phiz a wa lae ne ihz  
an diz kaw mawz upz truz. Ihz keui kaw  
<sup>15</sup> sangz. Keuiz daz ihz teur ka daz, “Hnhz  
ceuk naeng khunz phiz Beelsebul rae wah  
thengz phiz.”  
<sup>16</sup> Ihz teur ka samz cao Hnhz plaetz an laak  
<sup>17</sup> laaiz thaz kaang raaoz. Yesuhz mas keuh  
wonz, Hnhz daz keuh nahz, “Ihz prih teur  
deuiz teur kawi daehz kaw prih an diz te  
luh. Ihz kaang kawmz teur kawi daehz kaw  
<sup>18</sup> ngaz luh. Beuk Satan ne tiukz mial daehz  
kaw prih hnhz nam khreumz. Pehz daz Ohz

leh taanz khoz khunz phiz wah thengz phiz  
<sup>19</sup> raai. Beuk naeh ceun diz, kuanz pehz samz  
ceuk naeng yaeh rae wah thengz phiz?  
Kawp ceun diz keuh ngaz naeh lawng tatz  
<sup>20</sup> traz kaai pehz. Keuiz daz beuk Ohz leh  
reum haz tihz Phraz Pen Caoh wah thengz  
ne prih Phraz Pen Caoh a wa truz naeh  
peur la pehz.

<sup>21</sup> Ihz keum rang mawh leh tang kreung  
tawnz pao kaang daehz ne yaeh nam  
<sup>22</sup> leh bawnz phrihz phrahz hnhz. Keuiz daz  
maang ihz keum rang baaiz mawh lak hnhz  
ne pae hnhz, leh thengz kreung tawnz an  
hnhz phawmz mawh rae rimz leh phrihz  
phrahz an hnhz rawmz mok.

<sup>23</sup> Ihz nam naeh plaakz Ohz ne naeh ihz  
thiangz Ohz, ihz nam rawmz tawiz Ohz ne  
naeh ihz sraz sraz.

### Lawng phiz raai mial kut

(Matthe 12:43-45)

<sup>24</sup> Meuz phiz raai lae thaz ihz ne lan tawiz  
ti hawngz, khahz dawmz ti moh. Meuz  
hnhz nam awlz ti moh ne daz mial daehz  
eunz ngaz weng cu mial ti moh trimz.  
<sup>25</sup> Meuz phraeoz weng mial ne awlz piz mok  
<sup>26</sup> phreoz mok laep laep. Phiz an diz raak leh  
phiz an raai lak daehz teu pulz, kut truz  
moh tuh an diz. Reung naeh thaz puatz  
ihz an diz na lak meuz aacz boh.”

### Reung dengz rak an mawn

<sup>27</sup> Meuz phangz Yesuhz daz boh ceun diz  
ne, maang keun nyah hawkz naeh tuh  
wungz ihz ne raak daz, “Mah an keun meur  
Tahz ehz boh damz omz buhz Tahz ehz ne  
maang reung dengz rak.”

<sup>28</sup> Yesuhz mial daz, “Keuiz daz ihz teuk ngarz mony Phraz boh cih tawiz ne baaiz bawnz an rak.”

### **An laak laaiz Yonah**

*(Matthe 12:38-42)*

<sup>29</sup> Meuz wungz ihz keui keur rim Yesuhz ne Hnhz daz, “Ihz seu ni naeh kaap ihz raai, keuh khahz an laak laaiz rak seum sangz. Keuiz daz neuz lak an laak laaiz Yonah, Ohz nam plaез keuh nahz naehz.

<sup>30</sup> Ceun Yonah penz an laak laaiz a ihz weng Nineweh ne, Kuanz Kingz Ihz kaw ngaz

<sup>31</sup> penz ta ihz kaap seu ni nahz. Meuz tatz traz ne naang haw khamz prih Seun Daalz ngaz aez taam a keuh, kawp daz hnhz moh prih yaan tui truz teuk ngarz mony reu ma pinya khunz Solomon. Ohz daz pehz nahz, a niz maang ihz mawh lak khunz Solomon.

<sup>32</sup> Meuz tatz traz ne ihz weng Nineweh keui ngaz rawi ceng aez taam keuh, kawp daz keuh caanz reung dengz kawi daehz meuz keuh ngarz Yonah krai, a niz maang ihz mawh lak Yonah.

### **Ngaai naeh ceun ngal ngawiz toz**

*(Matthe 5:15, 6:22-23)*

<sup>33</sup> Ihz kleoz ngal ngawiz ne yaeh nam leh sroz dupz, nam seun tapz mok hnhz. Mok kaai khrengz ngal rae aez ihz kut tuhز

<sup>34</sup> kaang keui caang awlz thaangz. Ngaai pehz naeh ngal ngawiz toz pehz. Beuk ngaai pehz rak kaw thaangz tang toz. Keuiz daz meuz ngaai nam rak leui kaw

<sup>35</sup> bimz lang tang toz. Seu tih yak cih aez an

<sup>36</sup> thaangz tuhз daehz penz an bimz. Beuk thaangz tang toz kaw nam maang ti bimz rae ceun ngal ngawiz thaangz kaai toz pehz ne aasz tang toz.”

### **Yesuhz nae Pharise boh ihz mawz kyaamz**

*(Matthe 5:15, 6:22-23)*

<sup>37</sup> Meuz Yesuhz a wa lao ceun diz ne, maang Pharise hawkz truz raak Hnhz suamz seum suamz, Hnhz kaw kut keu dez suamz.

<sup>38</sup> Meuz Pharise an naeh tahz kaang awlz

Yesuhz suamz seum suamz nam khez tihz ne sangz. Kawp ceun diz Yesuhz daz hnhz

<sup>39</sup> nahz, “Pharise pehz keui teuk aamz thaz nawk klakz boh sroz, keuiz daz tuhз nao samz neuk taw lawphahz boh an raai keui

<sup>40</sup> pan. Ihz ngeu keui aez! Phraz Pen Caoh phaan cih thaz nawk tang tuhз nao nam

<sup>41</sup> anz haz? Beuk pehz aez ihz phaanz keui nahz an naeh tuhз nao kaw a wa aamz hacz aamz ta pehz.

<sup>42</sup> Pharise keui aez, pehz bawnz an nam rak! Pehz leh imz krim boh keul disz, teungz an kut seu neumz klawhз meoz keui lu seu

kawlz pun seu pun Phraz Pen Caoh nahz kaw pehz nam cih phrengz, nam cih tawiz reung dengz rak Phraz Pen Caoh. An lo lu

kaw pehz bawnz lu, an lo cih ihz nahz kaw pehz bawnz cih phrengz phrengz.

<sup>43</sup> Pharise keui aez, pehz bawnz an nam rak! Pehz dawhз ti keu dez trawng dutz tuhз crawl, sunz aez ihz tak nap suamz daehz

<sup>44</sup> tawiz teur laas. Keuiz daz pehz bawnz an nam rak! Pehz naeh ceun peun lu ihz keui nuar boh lang kol hnhz kaw nam mas tuhз keutz naeh peun lu.”

<sup>45</sup> Ihz mawz kyaamz hawkz daz Yesuhz nahz, “Tahz, beuk naeh ceun diz, Mih daz tang ehz eu.”

<sup>46</sup> Yesuhz kaw daz, “Ihz mawz kyaamz keui aez, pehz bawnz an nam rak! Kawp daz pehz cao ihz baekz an kreuk keui, pehz nam leh tang kuanz tihz daehz teu lam <sup>47</sup>lawh. Ihz an nam rak keui, pehz cih peun lu ihz taangz phraz, an ihz keu daehz <sup>48</sup>keu daepz pehz piamz. Pehz penz phawmz ihz keu daehz keu daepz daehz, keuh <sup>49</sup>tahz piamz, pehz tahz cih peun lu. Kawp ceun diz pinya Phraz Pen Caoh lao mok, ‘Ohz puhz ihz taangz Ohz boh teu maan a keuh, keuz daz teur ka keuh piamz, <sup>50</sup>teur ka keuh pae suamz.’ Kawp ceun diz keuh te talz taam daehz piamz ihz taangz phraz thaz meuz seun teungz tae prih keu <sup>51</sup>tehz, kaanz ihz piamz Abel taw ihz piamz Sekhariah teun khinz khrengz tucz boh ti seu ngamz.

<sup>52</sup> Ihz mawz kyaamz keui aez, pehz bawnz an nam rak! Pehz tawnz mok sawz keur wah pinya rae pehz kaw nam kut, ihz ngaz kut kaw pehz kan.”

<sup>53</sup> Meuz Yesuhz lae lan thaz a diz ne ihz mawz kyaamz boh Pharise keui truz cu Hnhz, khahz reung dengz kawi, maanyz <sup>54</sup>heungz baaiz. Keuh pao yawt ngaz ceu dakz mony reu ma anz Hnhz upz pleung naehz.

### Aez seu tih boh aez keum rang

(Matthe 10:26-27)

**12** Meuz phangz an diz ihz keui naeh penz rengz teur cuhz daehz, paw

ngaz teur paenz talz daehz. Yesuhz seun teungz lao aacz teu paez Daehz keui nahz, “Seu tih yawt toz daehz, yak cih yeung Pharise, keuh naeh ceu, seuk cih daehz <sup>2</sup>naeh ihz rak. Nam maang phrihz phrahz naehz an reupz bawnz, an seun tapz keui ngaz lawk. Nam maang ta ihz nam mas <sup>3</sup>an unz bawnz. An pehz lao tuhaz an bimz ne ngaz ngarz tuhaz an thaangz, an pehz lao keu seoz tuhaz lukz kaw ngaz sawz lang kusz kaang.

### Tahz an lo doz

(Matthe 10:28-31)

<sup>4</sup> Raen, Ohz daz pehz nahz, yak doz ihz piamz bawnz taw toz, waaiz an diz keuh <sup>5</sup>nam caang cih thaengz seu naez. Ohz lao plaehz pehz nahz tahz an pehz lo doz ne naeh Phraz an maang taanz khoz piamz ihz boh caang leh teuk klaehz tuhaz ngal raai. Anz, pehz lo doz Hnhz taw Daehz.

<sup>6</sup> Simz sriapz khantz ne leh paekz tawng aarz metz paez yal nam anz haz? Phraz Pen Caoh nam teur wir keuh teun akz <sup>7</sup>keuz. Hukz kingz pehz kaw Hnhz yeung dawgz. Kawp ceun diz pehz yak doz. Pehz langz mawh lak simz sriapz eu.

### Rap khris boh thiangz khris

(Matthe 10:32-33, 12:32, 10:19-20)

<sup>8</sup> Ohz lao mawn pehz nahz, ihz rap khaam Ohz aacz ngaai ihz ne, Kuanz Kingz Ihz kaw ngaz rap khaam keuh aacz ngaai teu <sup>9</sup>maan kaang raaaz Phraz Peh Caoh. Keuz daz ihz thiangz Ohz aacz ngaai ihz ne,

Kuanz Kingz Ihz kaw ngaz thiangez keuh aacz ngaai teu maan kaang raaaz Phraz Pen Caoh.

<sup>10</sup> Ihz upz pleung Kuanz Ihz ne caang plawiz lawt bawnz reung dengz kawi, keuz daz ihz upz pleung Khuanz Seu Ngamz ne nam caang plawiz lawt.

<sup>11</sup> Meuz ihz leh pehz lan cu tawiz crawl boh aacz ngaai ihz mawh, ihz peur aacz ne yak kawcz phawmz ngaz tawpz daz ceun nae.

<sup>12</sup> Meuz ceun diz Khuanz Seu Ngamz ngaz sawnz aez pehz nahz ngaz lao ceun nae.”

### Ihz maang ngeu

<sup>13</sup> Maang ihz hawkz an naeh tuhaz wungz ihz ne daz Yesuhz nahz, “Tahz sra, lao mai ohz teur baengz aez phrihz phrazh an paz ehz kiutz mok luz.”

<sup>14</sup> Yesuhz mial daz, “Yaeh khaanz Ohz teur baengz aez phrihz phrazh paarz?”

<sup>15</sup> Yesuhz daz wungz ihz keui nahz, “Seu tih, yak lawphahz mawh, phawmz ihz ne nam tae kaai phrihz phrazh an daehz maang keuz.”

<sup>16</sup> Yesuhz lao ihz keui nahz mony pung taek, “Maang ihz maang hawkz, sraakz hnhz ne

<sup>17</sup> bawnz ngohz kaaiz heungz baaiz. Hnhz wonz daz daehz eunz, ‘Ohz ngaz cih seu naez ez? Nam maang ti mok phrihz phrazh

<sup>18</sup> leui a.’ Hnhz daz daehz eunz, ‘Ohz a wa mas kamz ni a, ya thengz taen ngohz rae ngaz cih thaengz mawh mawh keui. Ngohz kaaiz boh kreung laep keui ngaz mok a

<sup>19</sup> diz. Samz daz mial phawmz khuanz daehz nahz, mih maang phrihz phrazh ngohz kaaiz ta damz toz daehz kumz heungz wit baaiz. Moh sa sa, suamz tiangz moh khyaw

<sup>20</sup> khyaw lah!” Keuz daz Phraz Pen Caoh daz hnhz nahz, “Ihz ngeu aez, borz meu ni ngaz leh khuanz phawmz mih, an mih rawmz mok ne yaeh ngaz bawnz?”

<sup>21</sup> Yesuhz siupz lao thaengz, “Ihz maang an rawmz mok toz daehz keui ne naeh ihz phaanz aacz ngaai Phraz Pen Caoh ceun ihz maang an diz.”

### Yak khiz

(Matthe 6:25-34)

<sup>22</sup> Yesuhz lao teu paez Daehz keui nahz, “Kawp ceun diz Ohz lao pehz nahz, yak khiz ngaz suamz naehz ta phawmz daehz,

<sup>23</sup> ngaz kap naehz ta toz daehz, phawmz myaat lak seum suamz, toz myaat lak

<sup>24</sup> kreung. Yawt luk aakz keui. Keuh nam plihz nam buiz, nam woc, nam maang taen ngohz. Keuz daz Phraz Pen Caoh damz

keuh. Pehz myaat lak simz nam anz haz!

<sup>25</sup> Reung dengz khiz ne caang cih aez a saak

<sup>26</sup> hanz thaengz seu keun teungz haz? An kyehez ceun diz daehz nam tang caang cih lawh, caang daz khiz tawiz tang meoz keui

<sup>27</sup> a? Wonz yawt teungz ruk keui cih seu naez daakz truz. Keuh nam cih kaanz, nam peusz nam kez. Keuz daz Ohz lao pehz

nahz, kreung kap khunz Solomon bunz mawh ne aatz nam taan daakz ruk keu

<sup>28</sup> diz. Phraz Pen Caoh yeung kap aez teungz ruk keui nahz kreung, imz tuhaz ruk meu ni bawnz sapz tuhaz ngal kap siz ne kaai pehz

baaiz aez bawnz kap leuz lak ruk keu diz eu. Euz ihz reung dengz yum lany keui!

<sup>29</sup> Kawp ceun diz yak khahz ta suamz ta tiangz. Yak khiz phawmz ta keu diz. Ihz nam yum Phraz keui khahz an keu diz. Paz

<sup>30</sup> tiangz. Yak khiz phawmz ta keu diz. Ihz nam yum Phraz keui khahz an keu diz. Paz

<sup>31</sup> pehz mas pehz lo an keu diz. Khahz aacz prih Phraz Pen Caoh raez, waaiz an diz Hnhz ngaz aez an pehz lo keu diz.

### **Rawmz phan ta lang kaang raaoz**

*(Matthe 6:19-21)*

<sup>32</sup> Wungz soz kyehz keui aez, pehz yak doz, Paz pehz pyaw aez tang prih Daehz.  
<sup>33</sup> Saz phrihz phrahz pehz, leh paekz teur baengz aez ihz phaanz keui nahz. Cih thangz paekz an nam caang teutz caang loz ta pehz, rawmz phan ta aez maang lang kaang raaoz, ti an peun rah nam caang  
<sup>34</sup> rah, ruk raak nam caang ya. Kawp daz phan ta daehz naeh a naez kaw pehz takz phawmz a diz.

### **Peur cao an maang seu tih**

<sup>35</sup> Mat seum mat, kleoz tang ngal ngawiz  
<sup>36</sup> rae peun tan mok raez. Naeh ceun peur cao pao tahz daehz weng truz thaz pawiz kopz ku, meuz hnhz weng khraz keur wah  
<sup>37</sup> ne keuh tan lawk aez luat. Meuz tahz keuh weng truz awlz peur cao daehz peun tan ceun diz ne naeh peur cao an rak. Ohz daz mawn pehz nahz, tahz keuh seuk wat daehz rae cao peur cao daehz keu dez  
<sup>38</sup> a pheunz ne cih damz keuh. Tahz keuh weng awlz ceun diz meuz khinz sawmz, nam anz kaw meuz aacz yaerz keu dawrz ne peur cao keu diz naeh peur cao an rak.  
<sup>39</sup> Pehz mas boh beuk tahz kaang ne mas mok kraao peun rah ngaz truz ne, hnhz nam praasz thengz kaang daehz, yak aez ihz  
<sup>40</sup> kut bawnz. Pehz kaw peun tan mok raez, kawp daz nam mas kraao Kuanz Kingz Ihz ngaz truz maen meuz daehz nam thaang.”

### **Kuanz leng an rak boh kuanz an meukz**

*(Matthe 24:45-51)*

<sup>41</sup> Petros maanyz Yesuhz daz, “Tahz ehz, Mih lao pung taek ne naeh ta ehz pan haz, ta ihz hacz aamz nahz haz?”  
<sup>42</sup> Caoh Phraz kaw lao mial, “Kuanz leng an maang saet ca boh maang pinya ne naeh yaeh? Kaai ihz an diz tahz kaang ngaz aapz hnhz rae aez hnhz teur baengz kuanz leng  
<sup>43</sup> teur deuiz nahz seum suamz. Meuz tahz paz leng truz awlz kuanz leng cih ceun  
<sup>44</sup> diz ne bawnz an rak. Ohz daz mawn pehz nahz, tahz an diz ngaz aapz aez upz kaang  
<sup>45</sup> daehz hacz aamz. Keuiz daz kuanz leng an diz thaang tahz daehz hinz weng rae tiz kuanz leng keur meh tang keun nyah,  
<sup>46</sup> suamz suamz tiangz tiangz cawc boh, tahz hnhz ngaz weng truz seu ngihz an hnhz nam thaang ne, ngaz mak hnhz penz patz aez hnhz nahz taam teur kawmz ihz nam maang saet ca.  
<sup>47</sup> Kuanz leng an mas reung dawhz tahz daehz, keuiz daz nam raenz mok toz daehz ne talz taam kawmz heungz baaiz.  
<sup>48</sup> Keuiz daz kuanz leng an nam mas reung dawhz tahz daehz rae cih pleung ne talz taam kawmz lany. Kaai ihz bawnz heungz ne bawnz phrawz mial heungz, kaai ihz bawnz heungz leuz kaw bawnz phrawz mial heungz leuz boh.”

### **Yesuhz cih aez ihz teuk praasz**

*(Matthe 10:34-36)*

<sup>49</sup> “Ohz truz cih aez ngal kat tuh prih keu  
<sup>50</sup> teh, Ohz sunz aez kat! Ohz bawnz leh teuk sruz an peur teuk, Ohz kreuk phawmz thonz taw reung dengz peur teuk an diz



<sup>51</sup>peun. Thaang Ohz leh truz reung dengz nimz tuhز prih keu tehز haz? Nam anz keuiz, Ohz truz ta ihz teur teuk praasz <sup>52</sup>daehz. Tae leh seu ni lan, ihz kaang khanz ne teur teuk praasz, keu waiz ngaz khatz keu aarz, keu aarz samz ngaz khatz keu <sup>53</sup>waiz. Paz ngaz khatz kuanz, kuanz ngaz khatz paz, mah boh kuanz keun nyah, keunz boh moi keui kaw ngaz teur khatz tang daehz.”

### Lawng an mas kraao

(Matthe 16:2-3)

<sup>54</sup> Yesuhz daz ihz hacz aamz nahz, “Meuz pehz awlz peu eumz raw thaz reu keutz ne pehz caang daz luat ngaz cung kaw cung <sup>55</sup>mawn. Meuz pehz awlz kurz thaz seun daalz truz ne pehz daz ngaz kawcz kaw <sup>56</sup>kawcz mawn. Ihz seuk cih keui aez, pehz yawt keu tehز boh plengz ne mas boh ngaz cung, ngaz kawcz, keuiz daz pehz paw nam raamz bawnz kaap seu ni ez.

### Cih aez teur maen

(Matthe 5:25-26)

<sup>57</sup> Cih naehz pehz paw nam mas daehz an <sup>58</sup>nae naeh an anz a? Meuz ihz cih a muz sapz pehz ngaz lan cu rumz ne cih aez teur maen meuz yeung naeh tawiz reung dengz. Beuk nam cih ceun diz hnhz ngaz leh pehz aapz a ihz mawh tatz traz, ihz mawh tatz traz samz aapz tuhز tihz siukz, siukz samz <sup>59</sup>leh pehz sapz tuhز khawk. Ohz daz pehz

nahz, ka ni maat phre hacz ne pehz nam caang lae thaz khawk.”

### Beuk nam caanz kaw ngaz luh

**13** Meuz phangz an diz ihz teur ka truz cu Yesuhz lao daz meuz ihz Kalile teur ka yeung pukz caw ne Khunz <sup>2</sup>Pilat piamz thengz keuh. Yesuhz daz mial keuh nahz, “Ihz prih Kalile keu diz talz ceun diz ne, anz pehz thaang reung dengz kaw keuh leuz ihz prih Kalile teur ka <sup>3</sup>hiuz? Nam leuz keuiz! Pehz hacz aamz kaw beuk nam caanz reung dengz kaw ne <sup>4</sup>pehz kaw talz luh sumz ceun keuh. Samz thaengz meuz khrengz pao yawt Siloam yaatz tengz yam ihz seu kawlz tahz ne, anz pehz thaang reung dengz kaw keuh <sup>5</sup>leuz ihz weng Yerusalem keui hiuz? Nam leuz keuiz, pehz hacz aamz kaw beuk nam caanz reung dengz kaw ne talz luh sumz ceun keuh.”

### Pung taek teungz laangz wah

<sup>6</sup> Yesuhz lao pung taek an ni, “Maang ihz hawkz peuk seumz teungz laangz wah tuhز sraakz daehz. Hnhz truz yawt plaehz kaw <sup>7</sup>nam awlz plaehz. Kawp ceun diz hnhz lao ihz lum la sraakz nahz, ‘Yawt, teungz laangz wah an ni ohz a wa truz yawt waiz wit, nam awlz plaehz hawkz hawkz. Teunyz thengz lah! Aez khamz ti keu tehز <sup>8</sup>sraakz cih naehz?’ Keuiz daz ihz lum la sraakz ne daz, ‘Teungz mah raez, tahz,

ngawm yawt thaengz seu wit. Ohz ngaz kawngz rim teungz ne sapz aez nahz mun.

<sup>9</sup> Doz caang plaehz. Beuk nam plaehz kaw caang kai teunyz thengz.”

### Yesuhz seuk neum keun nyah nam krang

<sup>10</sup> Kaai seu ngihz sinz hawkz, Yesuhz sawnz

<sup>11</sup> boh tuhز cawp rawz traz ne, maang keun nyah hawkz phiz tekz rae takz penz naeh seu kawlz tahz wit. Butz hnhz khotz, nam <sup>12</sup> caang ceukz keu sangz toz daehz. Meuz Yesuhz awlz keun nyah an diz ne lao hnhz nahz, “Keun nyah aez, mih a wa rak keuz.”

<sup>13</sup> Yesuhz leh tihz Daehz tam kaai hnhz, meuz diz luat toz hnhz kaw a wa ceukz keu sangz bawnz rae lupz phrawz Phraz Pen Caoh.

<sup>14</sup> Keuz daz ihz mawh cawp rawz traz ne sunz ca Yesuhz seuk neum kaai seu ngihz sinz. Hnhz daz ihz keui nahz, “Maang boh kraao cih kaanz tualz seu ngihz, truz seuk neum kaai seu ngihz keu diz raez, yak cih kaai seu ngihz sinz.”

<sup>15</sup> Yesuhz mial daz, “Seuk cih daehz naeh ihz rak keui aez, kaai seu ngihz sinz ne anz maang ihz nam plawiz meuk, nam anz kaw meu rang mahz liz keui lae thaz khawk

<sup>16</sup> tiangz omz hiuz? Keun nyah anni naeh kheuz Abraham, Satan peun pae hnhz seu kawlz tahz wit. Rak seum cih aez bilz kaai

<sup>17</sup> seu ngihz sinz ne nam anz haz?” Mony reu ma Yesuhz cih aez ihz khatz Hnhz keui bawnz keu sehز. Ihz keui seuz tawiz an rak seum sangz an Hnhz cih.

### Pung taek cakz mustart

(Matthe 13:31-32, Markus 4:30-32)

<sup>18</sup> Yesuhz lao, “Prih Phraz Pen Caoh ne naeh seu naez ez? Ohz ngaz leh naehz neung ez?

<sup>19</sup> Naeh ceun ihz peuk seumz cakz mustart kyehz tuhز sraakz daehz ne, mawh truz penz teungz, simz ploiz keui cih haanz tawz kaakz hnhz.”

### Pung taek ceu

(Matthe 13:33)

<sup>20</sup> Hnhz kaw lao thaengz, “Ohz ngaz leh naehz neung plaehz prih Phraz Pen Caoh?

<sup>21</sup> Naeh ceun keun nyah hawkz leh ceu sapz tuhز phangz kaaiz mun waiz khwaaiz ne kaaiz mun keu diz pawkz truz.”

### Keur wah seuk ngiak

(Matthe 7:13-14,21-23)

<sup>22</sup> Waaiz an diz Yesuhz sawnz aez ihz keui nahz tawiz weng tawiz pruh rae

<sup>23</sup> lan boh weng Yerusalem. Ihz teur ka maanyz Hnhz, “Tahz, ihz bawnz reung dengz khyawt ne lany baaiz haz?”

<sup>24</sup> Hnhz kaw mial daz, “Khatz phawmz kut tuhز keur wah seuk ngiak raez. Ihz keui khatz phawmz kut boh kaw nam caang.

<sup>25</sup> Meuz tahz kaang rawi dapz keur wah ne pehz samz ceng boh thaz nawk kaang, khraz keur wah maanyz lawk daz, ‘Tahz, lawk ehz nahz keur wah luz.’ Keuz daz

tahz kaang an diz mial daz, ‘Ohz nam mas pehz, pehz truz thaz naez?’ Pehz kaw mial daz, ‘Ehz suamz kawmz tiangz

<sup>26</sup> kawmz boh mih, mih kaw a wa truz sawnz aez tawiz reung dengz ehz.’ Tahz kaang

<sup>27</sup> kaw mial daz, ‘Ohz nam mas pehz, pehz truz thaz naez? Ihz meukz raai keui, tiunz yaan yaan ohz raez.’ Meuz pehz teuk soz

<sup>28</sup> awlz Abraham, Isaac, Yakop boh ihz taangz phraz keui tuhز prih Phraz Pen Caoh, keuz daz pehz samz ngaz talz wah thengz thaz

nawk ti an pehz bawnz yaam boh teur kak  
<sup>29</sup> raangz. Ihz keui ngaz truz thaz reu lae,  
 thaz reu keutz, thaz seun daalz, thaz keun  
 bongz rae keu dez suamz kaai pheunz tuh  
<sup>30</sup> prih Phraz Pen Caoh. Yawt, ihz klaez thaz  
 puatz keui ngaz tan aacz, ihz tan aacz keui  
 ngaz klaez thaz puatz.”

### Yesuhz phawmz kyehz ta weng Yerusalem

(Matthe 23:37-39)

<sup>31</sup> Meuz phangz an diz Pharise keui truz cu  
 Yesuhz daz, “Mih kraai a niz lan lah, Khunz  
 Herot sunz piamz Mih keuz.”

<sup>32</sup> Yesuhz daz keuh nahz, “Pehz lan lao sohz  
 keu tehz an diz nahz raez, Ohz wah thengz  
 phiz, cih aez ihz moh rak meu ni kap siz.  
 Kaai peuk dakz ne Ohz ngaz teuk wa kaanz  
<sup>33</sup> Daehz. Keuz daz Ohz yeung lo lan seu  
 ngihz meu ni, kap siz boh peuk dakz. Neuz  
 lak weng Yerusalem ne ihz taangz phraz  
 keui nam talz ihz piamz.

<sup>34</sup> Euz, weng Yerusalem, weng Yerusalem,  
 mih piamz ihz taangz phraz keui, leh  
 kawnz reu aangz wiurz ihz phuhz reu oiz  
 Phraz. Ohz sunz aez kuanz mih kai kai teur  
 cuhz baaiz, naeh ceun yaerz tum kuanz  
 daehz tuhz keutz piangz, keuz daz mih  
<sup>35</sup> samz nam aez Ohz cih ceun diz. Yawt,  
 kaang pehz ngaz raam. Ohz daz pehz nahz,  
 pehz ngaz nam awlz thaengz Ohz thonz  
 taw kraao an pehz daz, ‘Tahz an truz tawiz  
 mus Phraz Cen Cen ne naeh an rak.’”

### Yesuhz seuk neum ihz a kaang Pharise

**14** Naeh kaai seu ngihz sinz hawkz,  
 Yesuhz lan suamz kaaiz bimz a  
 kaang ihz mawh Pharise, ihz keui pao

<sup>2</sup> yawt Hnhz thatz baaiz. A diz maang ihz  
 tihz cawng phutz hawkz naeh boh aacz  
<sup>3</sup> ngaai Hnhz. Yesuhz maanyz Pharise boh  
 ihz mawz kyaamz keui nahz, “Seuk neum  
 ihz kaai seu ngihz sinz ne anz tawiz traz  
 Moses haz, nam haz?”

<sup>4</sup> Keuz daz keuh nam rawhz. Yesuhz teu  
 hnhz cih aez moh rak rae plawiz hnhz lan.

<sup>5</sup> Yesuhz maanyz thaengz keuh, “Kaaiz seu  
 ngihz sinz ne beuk pehz maang kuanz ihz  
 nam anz kaw meuk keui klaez tuh lu ne  
 anz maang ihz nam leh lae haz?”

<sup>6</sup> Keuh kaw nam caang tawpz naehz.

### Yak lomz trawng

<sup>7</sup> Yesuhz awlz khaekz truz suamz keui ras  
 leh ti raan trawng ne leh mony pung taek

<sup>8</sup> daz keuh nahz, “Meuz ihz paangz pehz  
 pawiz kopz ku ne yak khahz keu dez ti raan  
 trawng. Doz hnhz caang paangz mok tang

<sup>9</sup> ihz mawh lak daehz. Ihz paangz ne daz  
 pehz nahz, ‘Aez keuh keu dez tawz pehz ne  
 raez.’ Doz pehz bawnz klez ihz, sitz moh

<sup>10</sup> ti raan daelz ne. Meuz ihz paangz pehz  
 ne lan keu dez tawiz ti raan daelz keui  
 raez. Meuz tahz kaang pehz phraeo ne

daz, ‘Raen, truz keu dez ti raan trawng  
 raez.’ Pehz kaw bawnz mawk mael aacz

<sup>11</sup> ngaai khaekz. Ihz mok lomz trawng keui  
 ngaz klaez daelz, ihz mok lomz daelz keui  
 ngaz moh trawng.”

<sup>12</sup> Yesuhz lao tahz kaang nahz, “Meuz mih  
 raak ihz suamz kaaiz bimz ne, yak raak  
 kuanz boh, kuanz mai, ceu kheuz boh ihz  
 maang an thatz daehz. Kawp daz keuh

ngaz paangz mial mih rae tawpz kez cuz  
<sup>13</sup> boh. Meuz mih raenz pawiz ne, raak ihz  
 phaanz, ihz yam seu plaakz, ihz nam krang

<sup>14</sup>boh ihz ngaai lapz keui. Kawp daz keuh nam phrawz bawnz kez cuz mih, Phraz Pen Caoh ngaz phrawz aez mih eunz kraao ihz keu sangz keui meu rae imz tui.”

### **Pung taek pawiz longz**

*(Matthe 22:1-10)*

<sup>15</sup>Ihz hawkz keu dez suamz boh a pheunz ne ngarz Yesuhz lao rae daz, “Ihz bawnz kut suamz tuhز pawiz prih Phraz Pen Caoh ne bawnz an rak.”

<sup>16</sup>Yesuhz mial daz hnhz nahz, “Maang ihz hawkz raenz pawiz mawh longz, paangz

<sup>17</sup>ihz heungz baaiz. Meuz seum suamz keui peun tan mok ne hnhz cao peur cao daehz

<sup>18</sup>khahz raak khaekz daz, ‘Truz leuk raez, a wa peun tan klawhz meoz keuz.’ Keuz daz

<sup>19</sup>keuh hacz aamz cih ti lao mok. Hawkz daz, ‘Ohz a wa yal ti sraakz, lo lan temz yawt,

<sup>20</sup>teungz mah ohz raez.’ Thaengz hawkz samz daz, ‘Ohz a wa yal meuk hanz seungz,

<sup>21</sup>lo caam yawt daehz eunz, teungz mah ohz raez. Thaengz hawkz kaw daz, ‘Ohz taamz

<sup>22</sup>leh yah, ohz nam caang lan.’ Kawp ceun diz peur cao weng lao tahz daehz nahz ceun

<sup>23</sup>diz. Tahz kaang an diz kaw sunz ca, lao peur cao daehz daz, ‘Khahz raak ihz tawiz

reung dengz tawiz prawng keui raamz rip, raak ihz phaanz, ihz yam seu plaakz, ihz

<sup>24</sup>ngaai lapz boh ihz nam krang keui.’ Peur cao mial truz daz, ‘Ehz a wa cih ceun mih

<sup>25</sup>lao, keuz daz lukz keui yeung lawnz.’ Tahz hnhz kaw lao peur cao daehz nahz, ‘Lan

tuhz prih tawiz reung dengz longz, tawiz reung dengz lan sraakz maar keui rae nap

ihz truz raez, aez ihz neuk tuhز kaang ohz. <sup>24</sup>Ohz lao mih, ihz an ohz paangz aacz keu

diz nam bawnz cim yawt seu tuhز kaaiz pawiz ohz keuz.’”

### **Yaeh taan penz teu paez**

*(Matthe 10:37-38)*

<sup>25</sup>Naeh seu laehz wungz ihz heungz keui lan tawiz Yesuhz, Hnhz waaiz cu keuh rae

<sup>26</sup>lao keuh, “Ihz truz cu Ohz keui, beuk keuh rak paz boh mah, yah boh kuanz, mai boh

<sup>27</sup>seum bohز, rak toz daehz leuz Ohz kaw nam theukz penz teu paez Ohz. Beuk nam

<sup>28</sup>baekz lakz klawngz klaengz daehz truz tawiz Ohz kaw, nam theukz penz teu paez

<sup>29</sup>Ohz. Tuhz pehz ne beuk maang ihz ngaz cih khrengz pao yawt mawh longz kaw,

<sup>30</sup>anz ngaz nam keu dez nap yawt teuk aacz langz, ngaz hacz seu naeh? Beuk nam anz

<sup>31</sup>ceun diz, hnhz cih nam omz wa, cih taw ti tam cawng pan ne, ihz awlz keui ngot keulz

<sup>32</sup>hnhz. Keuh ngaz daz, ‘Hnhz an ni naeh taw seun teungz pan, nam caang teuk wa leui.’

<sup>33</sup>Khunz ngaz tiukz siukz ne, anz te nam keu dez wonz yawt teuk aacz, siukz daehz seu

<sup>34</sup>sawngz ne anz ngaz kreng bawnz siukz ihz aarz sawngz? Beuk hnhz nam kiungz pae

<sup>35</sup>kaw hnhz ngaz cao ihz taangz toz daehz lan teuk ngang aacz meuz ihz yeung naeh

yaan ne. Naeh ceun khuz an diz, beuk pehz nam cunz phrihز phrahz daehz hacz aamz

kaw nam caang penz teu paez Ohz.

### **Suakz nam taap**

*(Matthe 5:13, Markus 9:50)*

<sup>34</sup>Suakz rak baaiz. Keuz daz beuk nam taap leui kaw cih seu naez aez hnhz taap mial?

<sup>35</sup>Nam rak seum sapz sraakz nam anz kaw

nam rak seum cih keu tehz. Wiurz thengz thaz nawk pan. Ihz maang keu tiakz keui, aez hnhz ngarz.”

### Soz an bilz

(Matthe 18:12-14)

**15** Naeh seu seu ngihz ihz seutz khawn boh ihz raai keui truz teuk<sup>2</sup> ngarz traz Yesuhz. Pharise boh ihz mawz kyaamz keui saehz daz, “Ihz an ni saanyz ihz raai keui rae suamz kawmz keuh.”<sup>3</sup> Kawp ceun diz Yesuhz lao keuh nahz mony pung taek an ni,<sup>4</sup> “Tuhz pehz ne maang ihz hawkz, beuk maang soz seu peur ya, hawkz samz bilz, hnhz ngaz cih seu naez? Ngaz mok thengz timz kawlz timz tuhz ruk ne khahz dawmz<sup>5</sup> an bilz ka nam awlz nam anz haz? Meuz a wa awlz ne tang seuz phawmz kolz weng<sup>6</sup> truz kaai cawkz pahz daehz, meuz a wa weng phraeoz kaang ne raak kuanz boh boh ihz rim kaang daehz ne daz keuh nahz, ‘Seuz tawiz ohz raez, soz an bilz ne ohz<sup>7</sup> a wa awlz daehz eunz.’ Naeh ceun khuz an diz, Ohz daz pehz nahz, meuz ihz raai caanz reung dengz kawi ne lang kaang raaoz baaiz seuz lak ihz keu sangz timz kawlz timz an nam lo caanz reung dengz kawi.”

### Paekz ron an bilz

<sup>8</sup> “Keun nyah hawkz maang paekz ron seu khanz, samz bilz hawkz. Hnhz kleoz ngal ngawiz, piz tang kaang rae khahz dawmz<sup>9</sup> rak rak ka nam awlz nam anz haz? Meuz hnhz a wa awlz ne raak kuanz boh boh ihz rim kaang daehz keui daz, ‘Seuz tawiz ohz raez, paekz an bilz ne ohz a wa awlz

<sup>10</sup> daehz eunz.’ Naeh ceun khuz an diz, ihz raai hawkz caanz reung dengz kawi ne teu maan kaang raaoz Phraz Pen Caoh keui seuz phawmz.”

### Kuanz an bilz

<sup>11</sup> Yesuhz siupz lao thaengz, “Maang ihz<sup>12</sup> hawkz maang kuanz keur meh keu aarz. An kyehez an diz daz paz daehz nahz, ‘Paz, aez ohz nahz a moi an ohz trohz bawnz keui.’ Paz keuh kaw teur yaang aez kaar nahz.<sup>13</sup> Nam paw moh ceu nawhz, kuanz kyehez an diz leh ron khamz daehz lae lan prih yaan, cih sraz sraz, teuk hacz thengz ron khamz<sup>14</sup> daehz a diz. Waaiz hnhz teuk hacz thengz ron khamz daehz hacz aamz, tawz prih an diz kaw coh nguat baaiz ne hnhz kaw nam<sup>15</sup> maang naehz leui. Hnhz lan cih kuanz leng ihz tuhz prih an diz. Ihz an diz kaw cao<sup>16</sup> hnhz lan damz lek tuhz na daehz. Hnhz nguat baaiz rae coh tang plaehz reu baaiz<sup>17</sup> kaaiz lek keui. Yaeh nam damz hnhz. Meuz ceun diz hnhz wonz daehz eunz, ‘Kuanz leng thaz kaang paz ehz tui seum suamz kumz paw leuz. Ohz cingz coh nguat paw<sup>18</sup> raenz yam! Ohz ngaz weng cu mial paz ehz daz, ‘Paz, ohz a wa pleung mih boh kaang<sup>19</sup> raaoz. Nam theukz raak ohz kuanz leui, mok ohz ceun ihz suamz caangz hawkz.’”<sup>20</sup> “Hnhz kaw caac ceng weng cu kaang paz daehz.

Meuz hnhz yeung naeh yaan kaang paz daehz ne paz keuh teuk soz awlz hnhz rae teur yawng hnhz. Paz keuh wang<sup>21</sup> lan ngan leh hnhz, kuny hnhz. Kuanz an diz daz, ‘Paz, ohz a wa pleung mih boh kaang raaoz, nam theukz raak ohz kuanz<sup>22</sup> leui.’ Keuiz daz paz keuh lao kuanz leng keui nahz, ‘Leh truz kreung laep lak ihz

raamz rip, supz aez mongz koiz a tihz,  
<sup>23</sup>kap aez cawng khlapz a cawng. Leh truz  
 tangz kuanz meuk keu buiz, ngaz cih pawiz  
<sup>24</sup>suamz khyaw. Kuanz ohz ne a wa yam rae  
 seu ni hnhz meu rae imz. Hnhz a wa bilz  
 seu ni a wa awlz mial hnhz.’ Daz ceun diz  
 rae keuh cih pawiz suamz khyaw.

<sup>25</sup> Meuz phangz an diz, kuanz mawh samz  
 cih boh kaanz a maar. Meuz hnhz weng  
 truz ne ngarz reus mawng reus haaiz.

<sup>26</sup> Hnhz raak maanyz kuanz leng hawkz daz,

<sup>27</sup> ‘Cih naehz awh?’ Kuanz leng an diz daz,  
 ‘Seum boh z tahz eh z a wa weng truz mial,  
 paz tahz paz leng eh z awlz hnhz lawt  
 phez weng truz rae tangz meuk keu buiz

<sup>28</sup> suamz khyaw.’ Kuanz mawh ne sunz ca rae  
 nam kut tuh z kaang, paz keuh bawnz truz

<sup>29</sup> khyawz leh daehz eunz kut. Kuanz mawh  
 ne daz, ‘Yawt, ohz cih kaanz mih naeh  
 ceun kuanz leng ne a wa heungz wit, ohz  
 nam ti teuk klaez mony reu ma mih lao.  
 Mih nam aez ohz nahz paehz kye h z hawkz  
 rae suamz khyaw tawiz kuanz boh z ohz.

<sup>30</sup> Kuanz an ni samz keulz yah mak damz,  
 cih teuk hac z phrih z phrah z mih ne tangz

<sup>31</sup> tang meuk rae suamz khyaw!’ Paz keuh  
 kaw daz, ‘Yawt, kuanz, mih moh kawmz  
 se se ohz, phrih z phrah z an ohz maang ne

<sup>32</sup> naeh an mih keuz. Eh z rak seum suamz  
 khyaw kawp daz seum boh z mih ne a wa  
 yam seu ni hnhz meu rae imz, hnhz a wa  
 bilz seu ni a wa awlz mial hnhz.’”

### Ihz tawnz craangz meukz

**16** Yesuhz lao teu paez Daehz nahz,  
 “Maang tahz seu thez hawkz,  
 hnhz maang ihz tawnz craangz. Hnhz  
 ngarz reu oiz ihz tawnz craangz daehz

<sup>2</sup> sraz sraz. Kawp ceun diz hnhz raak lao  
 hnhz daz, ‘Ohz ngarz mih eunz ne naeh  
 seu naez? Mih cih seu naez kaw plaez ohz  
 nahz luz. Kamz ni lan, mih nam bawnz cih

<sup>3</sup> ihz tawnz craangz leui keuz.’ Ihz tawnz  
 craangz kaw daz mial daehz eunz, ‘Ohz  
 ngaz cih seu naez ez? Tahz ohz a wa wah  
 thengz ohz, ohz nam krang lak keu teh z,

<sup>4</sup> maanyz suamz kaw ohz keu seh z. Ohz a wa  
 mas kamz ni a, meuz ohz nam maang kaanz  
 kaw aez boh z raen ohz keui saanyz ohz  
<sup>5</sup> tawiz kaang keuh.’ Hnhz raak ihz khamz

ni tawz tahz seu thez daehz klawh z ihz  
 rae maanyz ihz an truz aacz ihz daz, ‘Mih  
 khamz ni tahz seu thez eh z seu naeh?’

<sup>6</sup> Ihz an diz kaw daz, ‘Nam man seu peur  
 ya pungz eu.’ Ihz tawnz craangz kaw daz,

‘Leh craangz mih rip keu dez maaiz hanz  
<sup>7</sup> kawlz raez.’ Maanyz thaengz hawkz, ‘Mih

luz, lo aez seu naeh?’ Ihz an diz kaw daz,  
 ‘Lo aez ngohz seu peur ya langz eu.’ Ihz  
 tawnz craangz kaw daz, ‘Leh craangz mih

lan keu dez maaiz tahz kawlz langz raez.’  
<sup>8</sup> Tahz seu thez kaw lupz ihz tawnz craangz  
 meukz cih lakz laem. Kawp daz ihz tuh z  
 prih keu teh z keui cih tawiz kaanz daehz  
 ne lakz laem lak ihz an thaangz.

<sup>9</sup> Ohz lao peh z nahz, aez daehz maang  
 boh z ne cao phrih z phrah z tuh z prih keu  
 teh z. Meuz phrih z phrah z tuh z prih keu  
 teh z hac z ne, keuh ngaz saanyz peh z tawz

<sup>10</sup> kaang cen cen. Ihz tawz ti tawiz an kye h z  
 ne tawiz an mawh kaw tawz ti boh. Keuz  
 daz beuk nam tawz ti tawiz an kye h z ne

<sup>11</sup> tawiz an mawh kaw nam tawz ti. Kawp  
 ceun diz beuk peh z nam tawz ti kaai ukz  
 ca prih keu teh z ne, yaeh ngaz aapz aez

<sup>12</sup> peh z nahz ukz ca an caet? Beuk peh z nam  
 tawz ti tawiz phrih z phrah z ihz kaw yaeh

samz ngaz aez pehz nahz aez naeh khangz pehz?

<sup>13</sup> Peur cao an nae kaw nam cih bawnz peur cao tahz keu aarz. Hnhz ngaz ceuh hawkz, rak hawkz, nam anz kaw ngaz nap suamz hawkz, nam saangz suamz hawkz. Pehz nam cih bawnz peur cao Phraz Pen Caoh boh paekz.”

### **Mony reu ma Yesuhz teur ka**

*(Matthe 11:12-13, 5:31-32,  
Markus 10:11-12)*

<sup>14</sup> Pharise an lawphahz paekz keui ngarz Yesuhz lao ceun diz ne ngot keulz Hnhz.

<sup>15</sup> Yesuhz daz keuh nahz, “Pehz kiungz keu sangz boh aacz ngaai ihz, keuiz daz Phraz Pen Caoh mas phawmz pehz hacz aamz. Phrihz phrahz an ihz thaang an mawh myaat ne rak seum ritz ritz aacz ngaai Phraz Pen Caoh.

<sup>16</sup> kyaamz sinz Moses boh kyaamz ihz taangz phraz keui lao reu oiz rak lawng prih Phraz Pen Caoh, taw co Yohn tahz teuk srucz, ihz ngarz keui kaw teur aacz <sup>17</sup> daehz rip kut prih Phraz Pen Caoh. Kaang raaoz boh keu teh ne luh yoh lak sinz traz Phraz Pen Caoh.

<sup>18</sup> Ihz thengz yah daehz, leh thaengz hawkz ne cih pleung kamesuhz, ihz leh yah raat kaw cih pleung kamesuhz.”

### **Pung taek ihz maang boh Lasarus**

<sup>19</sup> “Maang ihz maang hawkz kap kreung eurz langz mawh, moh tuhز reung dengz

<sup>20</sup> khyaw klawhz seu ngihz. Samz maang thaengz ihz phaanz hawkz mus hnhz daz Lasarus lae ngoi raai tang toz, yaetz boh

<sup>21</sup> keu lawrz ihz maang ne. Hnhz pao suamz ihz maang teuk beurz klaez keui. Sohز keui

<sup>22</sup> truz liat boh ngoi raai hnhz. Naeh seu seu ngihz ihz phaanz an diz yam, teu maan kaang raaoz keui leh hnhz lan tawz rim Abraham. Ihz maang an diz kaw yam tang

<sup>23</sup> daehz rae saangz keo boh. Khuanz hnhz samz bawnz lan prih maranahz tui. Hnhz ngaw yawt teuk soz awlz Lasarus naeh

<sup>24</sup> tawz rim Abraham rae, hnhz raak keurz daz, ‘Paz Abraham, teur yawng ohz luz. Aez Lasarus leh kuanz tihz daehz crum

sapz tuhز omz rae teuk car aez taakz ohz luz. Ohz rawhz peur teuk tuhز mukz ngal

<sup>25</sup> an ni.’ Keuiz daz Abraham lao hnhz, ‘Wonz yawt raez, kuanz, meuz yeung naeh prih keu teh ne mih dawhz naehz kaw bawnz, Lasarus samz peur teuk. Seu ni hnhz samz

<sup>26</sup> sa, mih samz peur teuk baaiz baaiz. Neuz lak an diz, peur lah ehz ne maang phraakz truh. Ihz moh a niz beuk sunz lan cu pehz

<sup>27</sup> kaw nam caang. Ihz moh a pehz sunz truz cu ehz kaw nam caang.’ Ihz maang kaw daz, ‘Beuk naeh ceun diz kaw Paz Abraham

aez, aez Lasarus lan kaang paz ehz tui <sup>28</sup> nyaenz awh lah. Aez hnhz lan kan kuanz mai ohz khantz luz, yak aez keuh truz cu

a niz ti peur teuk dutz an ohz naeh ne.’

<sup>29</sup> Abraham daz, ‘Maang boh traz Moses boh traz ihz taangz phraz keui, aez kuanz mai

<sup>30</sup> mih keui teuk ngarz an keuh.’ Ihz maang kaw daz, ‘Nam anz keuiz paz Abraham! Beuk ihz yam meu rae imz lan lao keuh

<sup>31</sup>ne keuh te caanz reung dengz kawi.' Keuiz daz Abraham kaw daz, 'Beuk keuh nam teuk ngarz Moses boh ihz taangz phraz keui kaw ihz yam meu rae imz lan lao keuh kaw keuh te nam teuk ngarz.'"

### Reung dengz kawi

(Matthe 18:6-7,21-22, Markus 9:42)

**17** Yesuhz lao teu paez daehz nahz, "An caang cih aez pleung keui ngaz naeh. Keuiz daz ihz an cih aez ihz <sup>2</sup>pleung ne bawnz an nam rak. Kaai ihz ceun diz nahz, leh reu aangz mawh hawiz kokz hnhz rae wiurz sapz tuhز paang laai ne baaiz rak lak cih aez kuanz ihz keui pleung. <sup>3</sup>Seu tih toz daehz raez.

Beuk kuanz mai pehz cih pleung kaw lao sawnz hnhz, beuk hnhz caanz daehz eunz <sup>4</sup>kaw plawiz lawt aez hnhz. Beuk hnhz cih teuk pleung mih seu seu ngihz pan pulz laehz, samz daz 'Ohz a wa caanz kaw, pehz bawnz plawiz lawt reung dengz kawi hnhz.'"

### Reung dengz yum

<sup>5</sup>Teu maan keui daz Caoh Phraz nahz, "Cih aez reung dengz yum ehz heungz."

<sup>6</sup>Caoh Phraz lao keuh nahz, "Beuk pehz maang reung dengz yum seu cakz mustart kaw lao teungz laangz wah nahz, 'Seuk bawgz tang rias daehz, lan peuk ceukz imz tuhز paang laai raez!' Daz kaw hnhz teuk ngarz pehz."

### Kaanz kuanz leng

<sup>7</sup>"Khanz daz tuhز pehz ne maang kuanz leng hawkz weng truz thaz thaiz maar nam anz kaw weng truz thaz khaenz soz ne, anz pehz ngaz daz hnhz nahz, 'Truz suamz <sup>8</sup>luat raez'? Nam daz ceun diz keuiz. Pehz daz hnhz nahz, 'Raenz pheunz kaaiz damz aacz ohz raez, beuk ohz a wa saakz tui mih <sup>9</sup>caang suamz.' Kuanz leng an diz cih tawiz an tahz paz leng daehz lao mok. Anz tahz paz lengz hnhz lo tawpz aez kez cuz hnhz <sup>10</sup>haz? Nam lo keuiz. Pehz kaw naeh ceun diz, meuz pehz cih teuk wa kaanz an tahz pehz cao ne pehz te daz, 'Ehz naeh ihz cih aez kez cuz kaai tahz ehz nam anz, ehz cih tawiz an hnhz cao pan.'"

### Ihz tut seu kawlz

<sup>11</sup>Meuz Yesuhz lan weng Yerusalem ne lan tawiz peur lah prih Samari boh prih Kalile.

<sup>12</sup>Meuz Hnhz ngaz kut tuhز pruh seu pruh ne maang ihz tut seu kawlz truz saanyz Hnhz.

<sup>13</sup>Keuh ceng raamz yaan, raak usz usz daz, "Yesuhz, Tahz, teur yawng ehz!"

<sup>14</sup>Meuz Hnhz awlz ne daz keuh nahz, "Lan plaez toz pehz tawz saangz longz keui raez."

Meuz keuh lan tawiz reung dengz ne keuh <sup>15</sup>a wa rak. Tuhz keuh ne naeh hawkz, awlz daehz a wa rak rae truz cu mial Yesuhz, raak usz usz lupz phrawz Phraz Pen Caoh.

<sup>16</sup>Hnhz truz kupz rim cawng Yesuhz daz kez cuz mawh. Ihz an diz naeh ihz Samari.



<sup>17</sup> Yesuhz maanyz, “Nam anz ihz seu kawlz haz, an a wa rak meu rae a? Hawz hoh,  
<sup>18</sup> timz a? Naeh taw ihz taang kheuz an ni pan truz cu mial, lupz phrawz Phraz Pen Caoh  
<sup>19</sup> a?” Yesuhz kaw daz hnhz nahz, “Ceng, lan raez, reung dengz yum mih cih aez mih bilz.”

### Prih Phraz Pen Caoh ngaz tae

(Matthe 24:23-28,37-41)

<sup>20</sup> Pharise teur ka maanyz Yesuhz, “Prih Phraz Pen Caoh ngaz tae peuk naeh?”  
 Yesuhz mial daz, “Prih Phraz Pen Caoh  
<sup>21</sup> nam tae kaai an ngaai ihz caang awlz. Pehz nam caang daz, yawt a niz, yawt a tui kawp daz prih Phraz Pen Caoh naeh tuhz pehz.”  
<sup>22</sup> Yesuhz lao teu paez Daehz keui nahz, “Kraao pehz sunz awlz seu ngihz Kuanz Kingz Ihz ne ngaz phraeoz, keuiz daz pehz  
<sup>23</sup> te nam awlz. Ihz keui ngaz lao pehz nahz, ‘Yawt a tui, yawt a niz,’ keuiz daz pehz yak  
<sup>24</sup> lan tawiz. Seu ngihz Kuanz Kingz Ihz ne naeh ceun laak lawk aasz keum yaamz lang  
<sup>25</sup> plengz ceng taw ceng. Meuz maat naeh ceun diz Kuanz Kingz Ihz ne ngaz talz peur teuk heungz rae, ihz co an ni ngaz thiangz  
<sup>26</sup> thengz hnhz. Meuz seu ngihz Kuanz Kingz  
<sup>27</sup> Ihz truz ne naeh ceun co Noah. Ihz keui suamz suamz tiangz tiangz, leh tahz leh yah taw phraeoz seu ngihz Noah kut tuhz ceun luang rae omz lumz teuk yam keuh  
<sup>28</sup> hacz aamz. Meuz co Lot kaw naeh ceun diz, ihz keui suamz suamz tiangz tiangz, saz saz yal yal, plihz plihz buiz buiz, teur  
<sup>29</sup> aacz daehz cih kaang. Seu ngihz Lot lae thaz weng Sodom ne cung ngal kaanz klaez truz thaz kaang raaoz rae teuk yam keuh  
<sup>30</sup> hacz aamz. Kaai seu ngihz Kuanz Kingz Ihz paw truz tui kaw ngaz naeh ceun diz.

<sup>31</sup> Kaai seu ngihz an diz ihz naeh lang yaal keui aez tiunz luat rae yak aez kut leh phrihz phrahz daehz tuhz kaang. Ihz naeh tawiz sraakz maar keui kaw aez tiunz luat  
<sup>32</sup> rae yak aez hnhz weng kaang daehz. Tang  
<sup>33</sup> tang lawng yah Lot raez. Ihz khyawt aez phawmz daehz lawt ne ngaz luh sumz, ihz luh sumz phawmz ne ngaz bawnz khyawt.  
<sup>34</sup> Ohz lao pehz nahz, meuz borz an diz ihz keu aarz yaetz kuz kawmz ne hawkz talz  
<sup>35</sup> leh lan, hawkz samz kiutz mok. Keun nyah keu aarz leui ngohz teur kawmz kaw hawkz  
<sup>36</sup> talz leh lan, hawkz samz kiutz mok.” Ihz keu aarz naeh tuhz na kaw, hawkz talz ihz leh lan, hawkz samz kiutz.  
<sup>37</sup> Teu paez keui maanyz Hnhz daz, “Ngaz penz a naez hoh?”  
 Yesuhz kaw lao, “Toz yam naeh a naez kaw, klaangz ta waet a diz.”

### Pung taek yah keu maaiz boh ihz tatz traz

**18** Yesuhz leh tang mony pung taek daz teu paez Daehz nahz, keuh lo suz tawngz se se, nam lo klaez phawmz  
<sup>2</sup> daz, “Tuhz weng hawkz ne maang ihz tatz traz hawkz nam doz suamz Phraz, nam  
<sup>3</sup> saangz suamz ihz. Maang yah keu maaiz hawkz moh tuhz weng an diz kai lan krio ihz tatz traz daz, ‘Cih aez ohz pae kaai  
<sup>4</sup> ihz maaf ohz.’ Ihz tatz traz an diz mok thengz yah keu maaiz eunz ceu nawhz taan taan. Keuiz daz laehz thaz puatz ne hnhz daz mial daehz eunz, ‘Ohz nam doz  
<sup>5</sup> suamz Phraz, nam saangz suamz ihz. Ohz ngaz moh thaz keun nyah ne tatz aez traz, beuk nam cih aez kaw hnhz truz krio ohz tikz tikz, hnhz cih aez ohz reu.”  
<sup>6</sup> Caoh Phraz lao lan thaengz, “Pehz teuk ngarz yawt mony reu ma ihz tatz traz an

<sup>7</sup> diz lah. Ihz Phraz Pen Caoh ras mok keui beuk keuh raak maanyz seu ngih teuk bimz  
<sup>8</sup> ne anz Hnhz te hinz kawr haz? Hnhz ngaz tatz traz plaakz keuh raamz rip. Keuiz daz meuz Kuanz Kingz Ihz mial truz ne anz Hnhz ngaz awlz reung dengz yum tuhز prih keu tehز?”

### Pharise boh ihz seutz khawn

<sup>9</sup> Yesuhz lao mony pung taek ihz thaang daehz rak rae thaang laerz ihz keui nahz  
<sup>10</sup> daz, “Maang ihz keu aarz lan suz tawngz tuhز wat, hawkz naeh Pharise, hawkz  
<sup>11</sup> samz naeh ihz seutz khawn. Pharise ceng daehz ne suz tawngz daz, ‘Kez cuz mawh baaiz Phraz Pen Caoh, kawp ohz nam naeh ceun ihz teur ka, an naeh conz, ihz meukz, ihz pleung kamesuhz, neuz lak an diz ohz nam naeh ceun ihz seutz khawn an ni.  
<sup>12</sup> Teur wong ne ohz kaerz seum suamz aarz laehz, seu ohz bawnz truz ne, ohz aez seu  
<sup>13</sup> kawlz pun seu pun.’ Ihz seutz khawn samz ceng teun yaan, nam yaak ngaw yawt lang kaang raaoz, phak sapz seu ongz daehz, tang phawmz kyehz ne daz, ‘Phraz Pen Caoh aez, teur yawng ohz, ohz naeh ihz  
<sup>14</sup> maang reung dengz kawi.’ Ohz lao pehz nahz, meuz kaar weng kaang daehz ne, ihz seutz khawn ne keu sangz lak ihz Pharise aacz ngaai Phraz Pen Caoh. Ihz lupz daehz keui ngaz klaez daelz, ihz mok daehz daelz keui samz ngaz raw trawng.”

**Yesuhz aez reung dengz rak kuanz ihz**  
*(Matthe 19:16-30, Markus 10:17-31)*

<sup>15</sup> Ihz keui leh kuanz ihz truz cu Yesuhz, aez Hnhz leh tihz Daehz taangz lang kol keuh rae aez reung dengz rak. Teu paez Hnhz keui awlz ihz keu diz cih ceun diz  
<sup>16</sup> rae nal keuh. Keuiz daz Yesuhz raak kuanz ihz keu diz truz cu Daehz daz, “Aez kuanz ihz keui truz cu Ohz raez, yak kan keuh. Kawp daz prih Phraz Pen Caoh ne naeh  
<sup>17</sup> prih ceun keuh. Ohz daz mawn pehz nahz, ihz an nam saanyz rap prih Phraz Pen Caoh ceun kuanz ihz ne nam bawnz kut.”

### Ihz maang

*(Matthe 19:16-30, Markus 10:17-31)*

<sup>18</sup> Ihz mawh Yio hawkz truz cu Yesuhz rae maanyz, “Sra Rak, aez ohz caam phawmz cen cen ne lo cih naehz?”  
<sup>19</sup> Yesuhz mial daz hnhz nahz, “Kawp naehz raak Ohz Tahz Sra Rak a? Neuz lak Phraz Pen Caoh taw Daehz pan nam maang  
<sup>20</sup> yaeh rak. Mih mas boh sinz, ‘Yak kawi kamesuhz, yak piamz ihz, yak rah, yak khaam saak se an nam anz, ro se mah paz daehz.’”  
<sup>21</sup> Hnhz kaw lao Yesuhz, “Sinz keu diz ohz a wa cih tawiz thaz meuz yeung plung.”  
<sup>22</sup> Meuz Yesuhz ngarz ne daz hnhz nahz, “Mih yeung lo thaengz seu meoz. Saz phrihz phrahz mih hacz aamz, teur phraez

aez ihz phaanz keui nahz, mih ngaz penz ihz maang lang kaang raaaz. Beuk a wa<sup>23</sup> kaw lan tawiz Ohz raez.” Meuz ihz an diz ngarz ne phawmz kyezh baaiz kawp daz hnhz naeh ihz maang longz.

<sup>24</sup> Yesuhz awlz phawmz hnhz pleung rae daz, “Ihz maang keui kut kreuk baaiz tuhz

<sup>25</sup> prih Phraz Pen Caoh! Meu rang maang soz kut tuhz bawngz peun lac ne yoh lak ihz maang kut tuhz prih Phraz Pen Caoh.”

<sup>26</sup> Ihz an ngarz keui kaw maanyz, “Yaeh ngaz bawnz reung dengz khyawt hoh?”

<sup>27</sup> Yesuhz mial daz, “An ihz cih nam penz bawnz ne Phraz Pen Caoh cih penz bawnz.”

<sup>28</sup> Petros lao Hnhz, “Ehz cunz hacz aamz rae lan tawiz Mih.”

<sup>29</sup> Yesuhz kaw lao keuh, “Ohz daz mawn pehz nahz, ihz cunz kaang nam anz kaw cunz yah, kuanz mai, mah paz boh kuanz

<sup>30</sup> ihz kawp prih Phraz Pen Caoh ne bawnz mial heungz baaiz kaai caat ni nam kaz caat te truz kaw bawnz phawmz cen cen.”

**Yesuhz lao teuk aacz kaai waiz laehz lawng an Daehz ngaz yam**

*(Matthe 20:17-19, Markus 10:32-34)*

<sup>31</sup> Yesuhz raak teu maan Daehz seu kawlz aarz rae daz keuh nahz, “Yawt, seu ni ehz lan weng Yerusalem. Ihz taangz phraz taemz mok lawng Kuanz Kingz Ihz hacz

<sup>32</sup> aamz ne ngaz penz a diz. Hnhz talz ihz aapz Daehz kaai ihz an nam anz kheuz Yio, keuh cih peuk pyaak, pae suamz, teuk chuz

<sup>33</sup> sapz Hnhz nahz omz nyaangz. Keuh ngaz

tiz Hnhz, piamz Hnhz, keuz daz moh waiz seu ngihz Hnhz te meu rae imz boh.”

<sup>34</sup> Keuz daz keuh nam loz phawmz mony reu ma Yesuhz daz naehz. Kawp daz ti loz mony reu ma an diz yeung seun tapz keuh nahz rae nam mas Yesuhz lao naehz.

**Yesuhz seuk neum ihz yawn ngaai bimz**

*(Matthe 20:29-34, Markus 10:46-52)*

<sup>35</sup> Meuz Yesuhz phraez thatz weng Yerikho ne maang ihz ngaai bimz hawkz maanyz suamz boh a waar reung dengz.

<sup>36</sup> Meuz hnhz ngarz ihz keui datz lan ne hnhz maanyz ihz cih naehz.

<sup>37</sup> Ihz lao hnhz nahz, “Yesuhz ihz weng Nasaret datz lan.”

<sup>38</sup> Hnhz raak daz, “Yesuhz, kuanz khunz Dawit, teur yawng ohz raez!”

<sup>39</sup> Sangz daz ihz lan aacz keui hiutz hnhz aez moh pras pras kaw hnhz baaiz yeung daz usz, “Kuanz khunz Dawit, teur yawng ohz raez.”

<sup>40</sup> Yesuhz deukz lao aez ihz keui leh truz ihz ngaai bimz cu Daehz. Meuz hnhz a wa naeh

<sup>41</sup> thatz ne Yesuhz maanyz hnhz nahz, “Sunz aez Ohz cih aez mih nahz naehz?”

Hnhz kaw daz, “Tahz, ohz sunz awlz!”

<sup>42</sup> Yesuhz kaw daz hnhz nahz, “Aez awlz! Reung dengz yum mih ne a wa cih aez mih rak.”

<sup>43</sup> Meuz diz luat ihz an diz kaw a wa awlz, hnhz lan tawiz Yesuhz, lupz phrawz kez cuz Phraz Pen Caoh. Meuz wungz ihz keui awlz ne teur aacz daehz lupz phrawz Phraz Pen Caoh.

## Yesuhz boh Sakkhaeus

**19** Yesuhz datz kut tuhz weng  
<sup>2</sup> Yerikho. Tuhz weng an diz maang  
 ihz mawh seutz khawn hawkz, mus hnhz  
 daz Sakkhaeus, hnhz naeh ihz maang.  
<sup>3</sup> Hnhz sunz awlz Yesuhz, keuiz daz hnhz  
 naeh ihz pakz, nam awlz bawnz Yesuhz  
<sup>4</sup> kawp daz wungz ihz heungz. Hnhz wang  
 lan aacz ngaai ihz, raw khaehz laangz  
 wah, pao yawt reung dengz an Yesuhz  
<sup>5</sup> ngaz truz. Meuz Yesuhz phraeoz a diz  
 ne ngaw yawt hnhz rae daz, “Sakkhaeus,  
 cur truz luat raez! Meu ni Ohz ngaz cih  
 khaekz kaang pehz.”  
<sup>6</sup> Sakkhaeus kaw cur luat rae seuz phawmz  
<sup>7</sup> saanyz Yesuhz weng kaang daehz. Meuz  
 ihz keui awlz ne teur aacz daehz saehz  
 daz, “Hnhz an ni cih khaekz ihz maang  
 reung dengz kawi.”  
<sup>8</sup> Sakkhaeus ceng lao Caoh Phraz daz,  
 “Ohz ngaz aez ihz phaanz nahz phrihz  
 phrahz daehz seu khinz, beuk ohz upz leh  
 maen khangz ihz kaw aez mial ponz pun.”  
<sup>9</sup> Yesuhz lao Sakkhaeus nahz, “Seu ngihz  
 meu ni reung dengz khyawt a wa phraeoz  
 tuhz kaang an ni, kawp daz hnhz kaw naeh  
<sup>10</sup> kuanz Abraham. Kawp daz Kuanz Kingz  
 Ihz ne truz khahz khyawt ihz bilz.”

### Pung taek lawng kuanz leng seu kawlz

(Matthe 25:14-30)

<sup>11</sup> Yesuhz lao ihz teuk ngarz traz keui nahz  
 mony pung taek kawp Hnhz a wa naeh  
 thatz weng Yerusalem, kawp daz ihz keui  
 thaang prih Phraz Pen Caoh ne ngaz tae  
<sup>12</sup> luat. Hnhz daz, “Maang caoh waz hawkz,  
 hnhz ngaz lan cih khunz rae lae nawk prih

<sup>13</sup> kaw hnhz weng truz mial. Meuz maat lan  
 ne raak kuanz leng daehz seu kawlz, aez  
 keuh nahz khamz ihz teur pyaz, daz keuh  
 nahz, ‘Leh khamz keu ni khahz ka thonz  
<sup>14</sup> taw ohz phraeoz mial tui raez.’ Keuiz daz  
 ihz prih an ceuh hnhz keui cao ihz taangz  
 daehz lao daz, ‘Ehz nam dawhz hnhz cih  
 khunz ehz.’  
<sup>15</sup> Meuz caoh waz an diz penz khunz weng  
 truz mial ne sunz mas kuanz leng daehz  
 an daehz lao mok, an aez mok khamz  
 keui bawnz a myaat seu naeh rae raak  
<sup>16</sup> truz maanyz keuh. Kuanz leng hawkz truz  
 daz, ‘Tahz, ohz leh khamz mih seu pyaz  
<sup>17</sup> ne bawnz a myaat seu khanz.’ Khunz an  
 diz daz, ‘Kyahz, mih maang saet ca tawiz  
 an kyehz, upz peung mih nahz seu kawlz  
<sup>18</sup> weng raez.’ Thaengz hawkz kaw truz daz,  
 ‘Tahz, ohz leh khamz mih seu pyaz ne a  
<sup>19</sup> wa bawnz a myaat hanz pyaz.’ Khunz an  
 diz kaw daz, ‘Upz peung mih nahz hanz  
<sup>20</sup> weng raez.’ Thaengz hawkz samz truz daz,  
 ‘Tahz, khamz mih naeh a niz, ohz leh pahz  
<sup>21</sup> cet tawmz mok. Ohz mas, kawp daz mih  
 cih kreuk, seutz tawiz ti daehz nam tam  
<sup>22</sup> rae woc tawiz ti daehz nam plihz.’ Khunz  
 an diz daz, ‘Euz, kuanz leng raai, ohz ngaz  
 tatz traz tawiz mony reu ma mih. Beuk mih  
 mas ohz cih kreuk, seutz tawiz an ohz nam  
<sup>23</sup> tam, woc tawiz an ohz nam plihz ne, leh  
 khamz ohz nam aez mok tawz ihz plawiz  
 yangz hoh?’ Beuk mih cih ceun diz ohz  
<sup>24</sup> bawnz tang yangz eu. Khunz an diz lao ihz  
 ceng rim daehz keui nahz, ‘Leh khamz a  
 hnhz ne aez ihz maang seu khanz nahz.’  
<sup>25</sup> Keuh kaw daz, ‘Hnhz paw a wa maang  
<sup>26</sup> seu khanz hoh!’ Khunz kaw daz, ‘Kaai ihz  
 maang ne ohz ngaz aez thaengz, kaai ihz  
 nam maang ne leh thengz tang seu keuh

<sup>27</sup> maang. Seu ni leh truz tang raan su ohz, an nam sunz aez ohz penz khunz daehz keui, piamz keuh aacz ngaai ohz.”

### Yesuhz kut tuhز weng Yerusalem

(Matthe 21:1-11, Markus 11:1-11, Yohn 12:12-19)

<sup>28</sup> Meuz Yesuhz a wa lao ceun diz ne lan

<sup>29</sup> aacz ngaai ihz, lan weng Yerusalem. Meuz ngaz phraez pruh Betphake boh pruh Bethani, rim teungz rang an ihz daz rang

Olip ne cao teu paez Daehz keu aarz lan

<sup>30</sup> aacz ngaai. Hnhz seumz kaar nahz, “Kut tuhز pruh an naeh aacz ngaai paarz, paarz te awlz meu rang mahz liz an yaeh maat ti

tumz ne tukz mok. Khawz nuarz leh truz

<sup>31</sup> a niz raez. Beuk ihz maanyz, cih naehz khawz nuarz mahz liz daz kaw, ‘Tahz ehz lo,’ daz ceun ni.”

<sup>32</sup> Kaar kaw lan awlz ceun Yesuhz lao kaar

<sup>33</sup> klawhz meoz. Meuz kaar yeung khawz nuarz mahz liz ne tahz mahz liz maanyz, “Cih naehz, khawz nuarz mahz liz a?”

<sup>34</sup> Kaar kaw mial daz, “Tahz ehz lo.” Kaar leh truz cu Yesuhz, kaar leh kreung daehz paelz kaai butz mahz liz rae aez Yesuhz

<sup>36</sup> tumz. Meuz Hnhz tumz lan boh ne ihz keui leh kreung daehz paelz tawiz reung dengz.

<sup>37</sup> Meuz Hnhz ngaz phraez rim weng Yerusalem, paerz rang Olip ne wungz ihz an naeh teu paez keui seuz phawmz seun

teungz ngawk lupz phrawz Phraz Pen Caoh usz usz tawiz an keuh awlz taanz khoz

<sup>38</sup> an Hnhz cih plaez hacz aamz. Keuh raak daz, “Tahz an truz tawiz mus Phraz Cen Cen ne naeh an rak. Reung dengz nimz

aez naeh lang kaang raaaz, aez bunz naeh tawz Phraz Pen Caoh!”

<sup>39</sup> Pharise teur ka an naeh tuhز wungz ihz keui lao Yesuhz daz, “Tahz sra, lao teu paez Mih keui moh pras pras!”

<sup>40</sup> Hnhz kaw mial daz, “Ohz daz pehz nahz, beuk keuh moh pras kaw kawnz reu aangz keui ngaz raak keurz boh.”

### Yesuhz yaam ta weng Yerusalem

<sup>41</sup> Meuz Yesuhz thatz weng Yerusalem ne

<sup>42</sup> awlz weng an diz rae yaam daz, “Khanz mih mas kraao seu ni naeh lawng an cih aez penz truz reung dengz nimz ne te rak

baaiz. Keuiz daz seu ni an keu diz yeung

<sup>43</sup> seun tapz mok ngaai mih. Kraao raan su mih keui cih peun lawm rae khangz wit wit

<sup>44</sup> mih ne ngaz phraez. Keuh te ya mih boh ihz an naeh tuhز peun lawm weng mih hacz

aamz keui aez teuk krengz keu tehز, kawnz reu aangz an peun baetz teur sawnz keui

thanz paw nam kiutz hawkz hawkz, kawp daz mih nam mas kraao Phraz Pen Caoh

truz yawt daehz.”

### Yesuhz kut tuhز wat

(Matthe 21:12-17, Markus 11:15-19, Yohn 2:13-22)

<sup>45</sup> Meuz Yesuhz kut tuhز wat ne wah thengz

<sup>46</sup> ihz saz toz satz pukz caw keui. Hnhz daz keuh nahz, “Tuhz kyaamz lik taemz mok, ‘Kaang Ohz naeh ti suz tawngz’ da, keuiz daz pehz cih aez hnhz naeh tham konz.”

<sup>47</sup> Yesuhz sawnz aez tuhز wat klawhz seu ngihz. Beunz caangz keui, ihz mawz

kyaamz keui, tang ihz peur aacz keui<sup>48</sup> kyaam piamz Hnhz. Keuiz daz keuh nam caang, kawp daz maen phangz ihz keui maang phawmz teuk ngarz mawn mawn mony reu ma Hnhz sawnz.

### A na Yesuhz

(Matthe 21:23-27, Markus 11:27-33)

**20** Naeh seu seu ngihz Yesuhz sawnz aez tang rawz aez reu oiz rak tuhz wat, beunz caangz, ihz mawz kyaamz boh ihz peur aacz keui truz maanyz Hnhz daz,<sup>2</sup> “Lao aez ehz nahz raez, Mih leh a na yaeh cih keu ni? Yaeh aez Mih nahz a na an ni?”<sup>3</sup> Hnhz mial daz keuh nahz, “Ohz kaw ngaz maanyz pehz nahz seu meoz, lao Ohz nahz<sup>4</sup> raez. Teuk sruz Yohn ne naeh a na an truz thaz Phraz haz, thaz ihz haz?”<sup>5</sup> Keuh teur deuz teur daz daehz nahz, “Beuk ehz daz thaz Phraz kaw Hnhz ngaz maanyz thaengz cih naehz pehz nam yum<sup>6</sup> Yohn hoh? Beuk ehz daz thaz ihz kaw ihz keui leh kawnz reu aangz wiurz sapz ehz kawp daz keuh mok Yohn naeh ihz taangz<sup>7</sup> phraz.” Kawp ceun diz keuh daz, “Ehz nam mas penz truz thaz naez.”<sup>8</sup> Yesuhz kaw mial daz keuh nahz, “Ohz kaw nam lao pehz, Ohz leh a na yaeh cih keu ni.”

### Ihz khaatz sraakz

(Matthe 21:33-46, Markus 12:1-12)

<sup>9</sup> Yesuhz lao ihz nahz mony pung taek an ni daz, “Maang ihz hawkz peuk seumz sraakz seu pit rae khaatz aez ihz nahz sraakz daehz, hnhz praasz lan prih yaan<sup>10</sup> heungz wit baaiz. Meuz kraao plaehz a wa sinz ne hnhz cao peur cao daehz hawkz truz maanyz langz khaatz sraakz. Keuiz daz ihz khaatz sraakz keui tiz peur cao<sup>11</sup> hnhz, plawiz weng toz maat. Hnhz kaw plawiz lan thaengz peur cao hawkz, ihz khaatz sraakz keui kaw tiz hnhz, cih aez hnhz keu seh z rae plawiz weng thaengz<sup>12</sup> toz maat. Plawiz lan thaengz hawkz kaw keuh tiz thanz paw penz puatz rae wah<sup>13</sup> thaengz. Tahz sraakz an diz kaw daz mial daehz eunz, ‘Ohz ngaz cih seu naez ez? Ohz ngaz cao kuanz an ohz yaw ne lan. Keuh te caang nap suamz boh kuanz ohz<sup>14</sup> keuiz.’ Meuz ihz khaatz sraakz keui awlz kuanz hnhz ne keuh teur daz daehz nahz, ‘Hnhz an ni naeh kuanz tahz sraakz eu, piamz thengz hnhz, beuk ehz cih ceun diz a moi hnhz keui naeh khangz eh z keuiz.’<sup>15</sup> Keuh kaw leh hnhz lae lang nawk sraakz ne piamz thengz hnhz.  
Beuk naeh ceun diz pehz thaang tahz<sup>16</sup> sraakz ne ngaz cih seu naez a keuh? Hnhz

ngaz truz piamz thengz ihz khaatz sraakz keui hacz aamz rae khaatz aez thaengz ihz hawkz nahz boh.”

Meuz ihz keui ngarz an diz ne daz, “Yak aez naeh ceun diz.”

<sup>17</sup> Yesuhz yiang yawt keuh rae daz keuh nahz, “Beuk naeh ceun diz, taemz mok tuh z kyaamz lik daz seu naez?

Reu aangz ihz cih kaang keui  
mok thengz ne

naeh mial reu aangz seu dukz  
thaz cawkz.

<sup>18</sup> Ihz an klaez sapz kaai reu aangz ne ihz an diz ngaz peukz penz patz, kaai ihz reu aangz klaez sapz samz ihz an diz ngaz nyawi.”

### Lawng thaamz khawn

*(Matthe 22:15-22, Markus 12:13-17)*

<sup>19</sup> Ihz mawz kyaamz boh beunz caangz keui kyaam mat luat Yesuhz kawp daz keuh mas Hnhz leh mony pung taek an ni upz pha

<sup>20</sup> daehz. Keuiz daz keuh doz ihz. Kawp ceun diz keuh pao yawt Hnhz, phuhz ihz ceu dakz keui seuk cih daehz naeh ceun ihz rak

rae maanyz Yesuhz, ceu dakz khahz kaai mony reu ma Hnhz pleung rae ngaz aapz tuh z tihz khunz prih Rom an maang a na

<sup>21</sup> taanz khoz. Ihz cung caamz keui maanyz Yesuhz daz, “Sra, eh z mas Mih naeh ihz lao sawnz an anz, nam wiar ngaai yaeh,

sawnz aez traz Phraz Pen Caoh an anz keui. Lao eh z luz, eh z thaamz khawn khunz Kaesar ne anz tawiz traz eh z haz, nam

<sup>22</sup> haz?”  
<sup>23</sup> Yesuhz mas keuh ceu dakz Daehz rae daz

<sup>24</sup> keuh nahz, “Plaez Ohz nahz paekz ron seu pyaz luz, naeh raang yaeh, taemz mok mus yaeh?”

Keuh kaw daz, “Naeh khunz longz Kaesar.”

<sup>25</sup> Yesuhz kaw lao keuh nahz, “Khangz khunz kaw aez khunz raez, khangz Phraz kaw aez Phraz raez.”

<sup>26</sup> Keuh ceu dakz khahz mony reu ma aacz ngaai ihz heungz kaw nam caang cih seu naez, sangz mony reu ma Hnhz lao rae moh pras pras.

### Caat te truz

*(Matthe 22:23-33, Markus 12:18-27)*

<sup>27</sup> Cumz Saduse an nam yum meu rae imz

<sup>28</sup> keui truz cu Yesuhz rae maanyz, “Tahz sra, Moses taemz mok eh z nahz, ihz leh yah nam maang kuanz yam lan ne seum

boh z hnhz bawnz leh mial mawm daehz, yak aez ceu kheuz mai daehz dutz da.

<sup>29</sup> Maang kuanz mai keur meh teu pulz, mai mawh keuh leh yah, maat tan maang kuanz samz yam. Seum boh z hnhz leh mial mawm

<sup>30</sup> daehz kaw maat tan maang kuanz, yam thaengz. Samz seum boh z keuh siupz leh

<sup>31</sup> thaengz kaw yam tang daehz, keuh kuanz mai teu pulz ne an nae kaw nam maang

<sup>32</sup> kuanz, yam hacz aamz. Thaz puatz, keun nyah an diz kaw yam. Kawp ceun diz co

<sup>33</sup> meu rae imz ne keun nyah an diz ngaz penz yah yaeh? Keuh kuanz mai teu pulz ne a wa leh hacz hnhz.”

<sup>34</sup> Yesuhz kaw daz, “Ih z tuh z prih keu teh z keui leh tahz leh yah. Keuiz daz kaai ihz

<sup>35</sup> yam meu rae imz tui nam teur leh daehz, nam kopz ku daehz leui. Keuh naeh ceun teu maan kaang raaaz, nam yam leui. Kawp keuh naeh kuanz Phraz Pen Caoh rae keuh a wa naeh kuanz meu rae imz.  
<sup>37</sup> Tuh z kyaamz Moses, kaai raet yum khaehz ne lao loz rak baaiz lawng ihz yam meu

rae imz. Hnhz naeh Phraz Abraham, Phraz  
<sup>38</sup>Isaac boh Phraz Yakop. Hnhz nam anz  
 Phraz ihz yam, naeh Phraz ihz imz. Kawp  
 daz keuh keu diz imz tuh Phraz Pen  
 Caoh.”  
<sup>39</sup>Ihz mawz kyaamz teur ka keui daz  
 Yesuhz nahz, “A wa tawz baaiz, Tahz sra.”  
<sup>40</sup>Kaanz diz lan yaeh nam yaak maanyz Hnhz  
 nahz naehz.

### **Khris naeh kuanz yaeh?**

*(Matthe 22:41-46, Markus 12:35-37)*

<sup>41</sup> Yesuhz maanyz keuh, “Ihz keui daz Khris  
 naeh kuanz khunz Dawit ne ngaz penz  
<sup>42</sup>bawnz ceun nae? Khunz Dawit lao tuh  
 kyaamz Saam ne daz,  
 ‘Phraz Cen Cen daz Tahz ehz nahz,  
 ‘Keu dez plaakz takz kaaiz Ohz raez,  
<sup>43</sup> thonz taw Ohz leh raan su Mih mok  
 ti tam cawng Mih.’  
<sup>44</sup>Toz khunz Dawit raak Khris naeh Tahz  
 daehz kaw Hnhz ngaz cih seu naez penz  
 kuanz khunz Dawit?”

### **Wiar thengz ihz mawz kyaamz**

*(Matthe 23:1-36, Markus 12:38-40)*

<sup>45</sup> Meuz ihz keui yeung teuk ngarz ne  
<sup>46</sup>Yesuhz lao teu paez Daehz nahz, “Wiar  
 thengz ihz mawz kyaamz keui raez! Keuh  
 song kap seu kaeng hanz khahz lan tawiz  
 aarz diz, sunz aez ihz nap suamz daehz,  
 tak daehz tawiz teur laas, song tangz keu  
 dez laep tawiz crawp rawz traz boh tawiz  
<sup>47</sup>pawiz. Rimz leh kreung kaang yah keu  
 maaiz, seuk cih daehz naeh ceun ihz rak  
 rae suz tawngz plaeh ihz nahz hanz hanz.  
 Keuh ngaz talz taam leuz ihz.”

### **Paekz lu yah keu maaiz**

*(Markus 12:41-44)*

**21** Meuz Yesuhz temz yawt boh ne  
 awlz ihz maang keui sapz paekz  
<sup>2</sup>lu tuh teuk paekz lu tuh wat. Hnhz  
 awlz yah keu maaiz phaanz hawkz sapz  
<sup>3</sup>paekz tawng kyehz aarz khlaepz. Hnhz  
 daz, “Ohz daz mawn pehz nahz, yah keu  
 maaiz phaanz ne sapz heungz leuz keuh  
<sup>4</sup>klawhz ihz. Kawp daz ihz keui phraez leh  
 kaai daehz maang rae sapz, keuz daz yah  
 keu maaiz an phaanz ne leh hacz aamz an  
 daehz maang an lo damz phawmz daehz ne  
 lu.”

### **Wat ngaz luh**

*(Matthe 24:1-2, Markus 13:1-2)*

<sup>5</sup> Teu paez Hnhz teur ka keui daz lawng wat  
 laep baaiz, leh reu aangz an laep boh leh  
 phrihz phraez ihz lu keui cih mok. Keuz  
<sup>6</sup>daz Yesuhz lao, “Pehz awlz boh reu aangz  
 keu ni. Kraao reu aangz keu ni nam baetz  
 hawkz kaai hawkz ne ngaz phraez, ngaz  
 talz ya thengz hacz aamz.”

### **Phez longz**

*(Matthe 24:3-14, Markus 13:3-13)*

<sup>7</sup> Keuh maanyz, “Tahz ehz, ngaz naeh ceun  
 diz peuk naeh hoh? Meuz ngaz naeh ceun  
 diz ne maang an pleung pleung naehz  
 hoh?”  
<sup>8</sup> Yesuhz mial daz, “Pehz seu tih, yak aez  
 ihz upz suamz pehz. Ihz tang heungz keui  
 truz leh mus Ohz daz, ‘Daehz naeh Khris!’  
 Keuh daz, ‘Kraao a wa phraez.’ Keuz daz  
<sup>9</sup>yak tawiz keuh. Meuz pehz ngarz tiukz



siukz boh seuk weur keurz ta mial ne yak ngaat. An keu ni ngaz naeh aacz boh, keuiz daz maat phraez ti dutz.

<sup>10</sup> Ihz seu kheuz boh seu kheuz ngaz teur tiukz, seu prih boh seu prih kaw ngaz <sup>11</sup>teur tiukz. Reu yung keui ngaz kruhz baaiz klawhz ti, an coh nguat boh reung dengz penz keui kaw ngaz naeh klawhz ti. An laak laaiz boh rak seum doz baaiz keui <sup>12</sup>ngaz naeh lang kaang raaaz. Meuz maat naeh ceun keu diz ne, ihz ngaz mat pehz, tekz suamz pehz. Keuh ngaz maap pehz tawiz cawp, leh pehz sapz tuhz thang. Ihz ngaz leh lan pehz aacz ngaai khunz boh <sup>13</sup>ihz mawh kawp mus Ohz. An ni ngaz naeh <sup>14</sup>kraao pehz khaam saak se Ohz. Yak kawcz phawmz teuk aacz ngaz bawnz tawpz mial <sup>15</sup>ceun nae. Ohz ngaz aez pehz nahz mony reu ma, ihz thiangz pehz keui nam caang <sup>16</sup>tawpz caang thiangz. Mah paz, kuanz mai, ihz kaang, ceu kheuz, tang kuanz bohz keui <sup>17</sup>ngaz aapz pehz aez ihz piamz. Ihz ngaz <sup>18</sup>ceuh pehz kawp Ohz. Keuiz daz hukz kingz <sup>19</sup>pehz seu senz kaw nam luh. Pehz ngaz bawnz phawmz kawp pehz nyeun klakz klakz.

### Weng Yerusalem ngaz luh

*(Matthe 24:15-21, Markus 13:14-19)*

<sup>20</sup> Meuz pehz awlz siukz keui wit wit boh weng Yerusalem ne lo mas weng an diz <sup>21</sup>ngaz luh. Meuz ceun diz ihz naeh tuhz prih Yio keui aez tiunz raw kaai rang keui. Ihz naeh tuhz weng keui aez lae lan, ihz naeh tawiz nawk kaw yak aez keuh kut tuhz

<sup>22</sup>weng. Kawp daz kraao seu ngihz an diz naeh seu ngihz aez taam ceun tuhz kyaamz <sup>23</sup>lik taemz mok. Kraao an diz kreuk baaiz ta keun nyah keun meur boh keun nyah maang kuanz buhz. Phez taam longz Phraz Pen Caoh ngaz klaez kaai prih an ni boh tawsahz Phraz ngaz klaez sapz kaai ceu <sup>24</sup>kheuz an ni. Ihz teur ka yam kawp waac. Ihz teur ka keui talz ihz mat lan nawk prih. Ihz an nam anz kheuz Yio keui paenz suamz weng Yerusalem thonz taw kraao keuh neuk.

### Kuanz Kingz Ihz mial truz

*(Matthe 24:29-31, Markus 13:24-27)*

<sup>25</sup> Meuz ceun diz ne kiarz, seu ngihz boh seuk muny lang plengz keui ngaz naeh rak seum sangz. Ihz tuhz prih keu tehz keui doz ngaat, teuk krusz dangz toz kawp reus seuk mar omz boh paang laai raak keurz. <sup>26</sup>Ihz keui doz baaiz rae yam teur wil kawp an ngaz naeh tuhz prih keu tehz. Taanz <sup>27</sup>khodz lang plengz keui ngaz keusz. Meuz ceun diz Kuanz Kingz Ihz ngaz truz tang taanz khodz mawh boh bunz mawh tuhz peu <sup>28</sup>eumz. Meuz an keu diz seun teungz naeh truz ne teur aacz daehz rawi ceng ngaw kingz pehz kawp daz reung dengz khyawt a wa naeh thatz.”

### Pung taek teungz laangz wah

*(Matthe 24:32-35, Markus 13:28-31)*

<sup>29</sup> Yesuhz lao keuh nahz mony pung taek, “Yawt teungz laangz wah boh teungz

<sup>30</sup> khaehz keui raez. Meuz pehz awlz lahz run  
<sup>31</sup> kaw mas a wa thatz kiarz kawcz. Naeh  
 ceun khuz an diz meuz pehz awlz lawng  
 keu ni ne lo mas prih Phraz Pen Caoh a wa  
 naeh thatz baaiz.  
<sup>32</sup> Ohz daz mawn pehz nahz co ihz keu ni  
 maat hacz, an keu diz ngaz naeh hacz  
<sup>33</sup> aamz. Plengz boh keu teh ngaz luh kaw  
 mony reu ma Ohz nam luh.

### Pao yawt rak rak

<sup>34</sup> Seu tih toz daehz. Yak takz phawmz  
 tawiz seum suamz, yak cawc, yak kawcz  
 phawmz ta suamz ta tiangz leuz peun.  
 Meuz naeh ceun diz, seu ngihz an diz  
 doz naeh ceun dakz keu piutz sapz kaai  
<sup>35</sup> pehz. Kawp daz dakz an diz keu piutz sapz  
 teuk khranz kaai ihz tuh prih keu teh  
<sup>36</sup> hacz aamz. Pehz seu tih toz daehz rae suz  
 tawngz pao aez daehz caang lawt thaz an  
 ngaz naeh keu ni hacz aamz, aez daehz  
 caang ceng aacz ngaai Kuanz Kingz Ihz.”  
<sup>37</sup> Meuz seu ngihz an diz Yesuhz sawnz aez  
 tuh teu laangz wat, meuz teuk borz samz  
<sup>38</sup> Hnhz raw lan kaai rang Olip. Ihz keui truz  
 cu tawz teu laangz wat teuk ngup cao cao,  
 aez daehz bawnz teuk ngarz traz Yesuhz.

### Ihz kyaam piamz Yesuhz

(Matthe 26:1-5, Markus  
 14:1-2, Yohn 11:45-53)

ihz mawz kyaamz keui kyaam rah piamz  
 Yesuhz, keuz daz keuh doz ihz.

### Yudas Iskariot saz Yesuhz

(Matthe 26:14-16, Markus 14:10-11)

<sup>3</sup> Meuz ceun diz Satan kut tuh Yudas  
 Iskariot, an naeh tuh teu paez seu kawlz  
<sup>4</sup> aarz. Hnhz lan cu beunz caangz keui, ihz  
 mawh siukz pao wat keui rae teur reu  
 ma daehz ngaz mat Yesuhz ceun nae.  
<sup>5</sup> Keuh seuz phawmz rae prawm ngaz aez  
<sup>6</sup> hnhz nahz paekz. Hnhz kaw prawm, khahz  
 kraao saang trohz aapz Yesuhz meuz  
 wungz ihz keui nam naeh.

### Raenz pawiz kaaiz mun lawt phez

(Matthe 26:17-25, Markus  
 14:12-21, Yohn 13:21-30)

<sup>7</sup> Meuz phangz pawiz kaaiz mun nam  
 maang ceu, naeh kaai seu ngihz piamz soz  
<sup>8</sup> lawt phez ne a wa phraeoz. Yesuhz lao  
 Petros kaar Yohn nahz, “Lan raenz pawiz  
 lawt phez ta ehz suamz raez.”  
<sup>9</sup> Kaar maanyz mial daz, “Mih sunz aez  
 aaz raenz a naez hoh?”  
<sup>10</sup> Yesuhz lao kaar nahz, “Meuz paarz kut  
 tuh weng ne saanyz boh ihz keur meh  
 beusz omz. Lan tawiz hnhz kut tuh kaang  
<sup>11</sup> an hnhz kut, daz tahz kaang ne nahz, ‘Tahz  
 Sra ehz daz, lukz khaekz naeh a naez, ti  
 Ohz boh teu paez Ohz suamz kaaiz mun ne  
<sup>12</sup> naeh a naez?’ Ihz an diz ngaz plaez paarz  
 nahz lukz mawh raan thaz kol an khriungz  
 mok. Raenz mok ehz nahz a diz raez.”

**22** Meuz pawiz kaaiz mun nam  
 maang ceu an daz pawiz lawt  
<sup>2</sup> phez ne ngaz phraeoz, beunz caangz keui,

<sup>13</sup> Petros kaar Yohn kaw lan awlz ceun Yesuhz lao rae kaar raenz mok pawiz lawt phez a diz.

### **Pawiz Caoh Phraz**

*(Matthe 26:26-30, Markus 14:22-26, 1 Korin 11:23-25)*

<sup>14</sup> Meuz kraao a wa phraeoz ne Yesuhz boh teu maan keui keu dez truz suamz kaaiz  
<sup>15</sup>mun kaai pheunz. Hnhz daz keuh nahz, “Co Ohz maat talz peur teuk ne Ohz sunz suamz kawmz pehz baaiz, pawiz kaaiz mun  
<sup>16</sup>nam maang ceu. Ohz daz mawn pehz nahz, Ohz nam suamz thaengz kaaiz mun ceun ni, taw lawng an ni maat keunyz tuh prih Phraz Pen Caoh.”

<sup>17</sup> Yesuhz leh klakz omz seu pit, dawgz kez cuz Phraz Pen Caoh rae daz, “Leh klakz an  
<sup>18</sup>ni, teu phraez tiangz raez. Ohz lao pehz, taw prih Phraz Pen Caoh tae ne Ohz nam tiangz thaengz seu pawk leui.”

<sup>19</sup> Yesuhz leh tang kaaiz mun, lupz phrawz kez cuz Phraz Pen Caoh. Hnhz pekz kaaiz mun an diz aez keuh nahz, “An ni naeh toz Ohz, an ohz cunz aez pehz nahz. Aez  
<sup>20</sup>pehz tang Ohz ne cih ceun ni raez.” Naeh ceun diz, waaiz suamz kaaiz borz ne, Hnhz leh tang klakz omz seu pit, Hnhz daz keuh nahz, “An ni naeh naamz Ohz, an thawkz aez pehz nahz, naeh traz an prawm teun mehz.

<sup>21</sup> Keuiz daz yawt raez, tihz ihz an aapz Ohz ne naeh kawmz Ohz kaai pheunz an ni!

<sup>22</sup> Kuanz Kingz Ihz ngaz bawnz yam ceun a

wa bakz mok, keuiz daz kaai ihz aapz ne an nam bawnz rak.”

<sup>23</sup> Keuh teu deuiz teu maanyz daehz naeh yaeh ngaz cih ceun ni a.

### **Yaeh ngaz mawh myaat lak ihz?**

<sup>24</sup> Teu maan keui teu thiangz daehz daz tuhz keuh ne yaeh mawh myaat lak ihz.

<sup>25</sup> Yesuhz lao keuh nahz, “Khunz an nam anz kheuz Yio keui leh a na upz peung ihz prih daehz, ihz maang a na keui kaw daz daehz

<sup>26</sup> cih kez cuz kaai ihz prih daehz. Keuiz daz pehz yak cih ceun keuh. An mawh lak ihz ne aez naeh ceun an kyehz lak ihz raez, ihz peur aacz kaw aez naeh ceun peur cao

<sup>27</sup> ihz raez. Ihz keu dez a pheunz boh ihz cih damz ne yaeh mawh myaat leuz a? Nam anz ihz keu dez haz? Keuiz daz Ohz naeh ceun peur cao peur lah pehz.

<sup>28</sup> Meuz Ohz talz an kyaam ya ne pehz naeh

<sup>29</sup> kawmz Ohz se se. Ceun Paz Ohz aez Ohz upz peung prih ne Ohz kaw ngaz aez pehz

<sup>30</sup> upz peung. Pehz ngaz bawnz suamz bawnz tiangz kawmz a pheunz Ohz tuhz prih Ohz, keu dez kaai plaang ne ngaz tatz traz kaai kheuz Israel seu kawlz aarz.

### **Yesuhz lao aacz Petros ngaz thiangz thengz Daehz**

*(Matthe 26:31-35, Markus 14:27-31, Yohn 13:36-38)*

<sup>31</sup> ‘Simon, Simon, teuk ngarz raez! Satan maanyz kriung pehz naeh ceun ihz kriung

<sup>32</sup> kaaiz kyung ne. Keuiz daz Ohz suz tawngz aez mih boh, yak aez reung dengz yum mih pleung. Meuz mih waaiz cu mial Ohz ne aez kuanz mai daehz keui nahz keum rang raez.”

<sup>33</sup> Petros mial daz, “Tahz, sangz daz bawnz klaez thang kawmz Mih hiuz, yam kawmz Mih hiuz kaw ohz a wa peun tan mok.”

<sup>34</sup> Yesuhz mial daz hnhz nahz, “Borz meu ni co yaerz maat keu dawrz ne mih ngaz daz daehz nam mas Ohz waiz laehz.”

### Thangz paekz, seu kiz boh waac

<sup>35</sup> Yesuhz maanyz teu paez Daehz keui nahz, “Meuz Ohz cao pehz lan nam khaenz thangz paekz, seu kiz boh cawng khlapz ne anz pehz lo seu ceu seu meoz?”

Teu paez keui kaw daz, “Nam.”

<sup>36</sup> Yesuhz lao keuh nahz, “Seu ni ihz maang thangz paekz kaw aez khaenz, ihz maang seu kiz lae reung dengz kaw aez khaenz, ihz nam maang waac kaw saz kreung <sup>37</sup> daehz aez yal. An taemz mok lawng Ohz daz, ‘Hnhz an ni bawnz nap teur kawmz tang ihz raai,’ an daz ne ngaz naeh mawn.”

<sup>38</sup> Teu paez keui kaw mial daz, “Tahz, a niz maang waac keu aarz.”

Yesuhz mial daz, “A wa bawnz.”

### Yesuhz suz tawngz kaai Rang Olip

(Matthe 26:36-46, Markus 14:32-42)

<sup>39</sup> Waaiz an diz, Yesuhz lae thaz weng rae lan cu rang Olip ceun Hnhz tomz lan klawhz pawk, teu paez Hnhz keui kaw lan <sup>40</sup> tawiz. Meuz keuh phraeoz ne Hnhz daz keuh nahz, “Yak aez pehz klaez tuh reung dengz kyaam ya ne pehz suz tawngz raez.”

<sup>41</sup> Yesuhz praasz keuh lan yaan seu wiurz kawnz reu aangz ne, Hnhz seuk deumz suz <sup>42</sup> tawngz daz, “Paz, beuk caang kaw, kraai thengz klakz an ni thaz Ohz. Keuiz daz yak

aez naeh ceun Ohz sunz penz, aez naeh

<sup>43</sup> ceun Mih sunz penz.” Meuz phangz an diz teu maan kaang raaoz thaz kaang raaoz seu paz plaez toz a Hnhz ne aez Hnhz nahz

<sup>44</sup> keum rang. Hnhz suhz phawmz baaiz rae suz tawngz mawn baaiz, sraangz Hnhz car naeh ceun cakz naamz.

<sup>45</sup> Meuz Hnhz rawi thaz suz tawngz, mial truz cu teu paez Daehz ne awlz keuh yaetz reuk ngeut, kawp keuh phawmz luh onz

<sup>46</sup> reu. Hnhz lao keuh nahz, “Cih naehz lah, pehz yaetz reuk ngeut a? Yak aez pehz klaez tuh reung dengz kyaam ya ne rawi suz tawngz raez.”

### Ihz cawpz Yesuhz

(Matthe 26:47-56, Markus 14:43-50, Yohn 18:3-11)

<sup>47</sup> Meuz Yesuhz daz boh ceun diz ne maang ihz seu wungz phraeoz truz. Yudas an naeh tuh seu kawlz aarz ne aacz truz keuh. Yudas truz cu Yesuhz ngaz kuny

<sup>48</sup> Hnhz. Yesuhz maanyz hnhz, “Yudas aez, mih kuny rae aapz Kuanz Kingz Ihz haz?”

<sup>49</sup> Meuz teu paez Yesuhz keui mas lawng an keu diz ne keuh maanyz, “Tahz, anz

<sup>50</sup> ehz ngaz leh waac mak hiuz?” Naeh hawkz mak aez peur cao ceu beunz, keu tiakz takz kaaiz hnhz paw teutz.

<sup>51</sup> Yesuhz kaw lao, “Paw leuk!” Hnhz teu keu tiakz ihz an diz cih aez rak mial.

<sup>52</sup> Yesuhz lao beunz caangz keui, ihz mawh siukz pao wat boh ihz peur aacz setz an truz cu Daehz keui nahz, “Pehz khaenz

tang kaw n tang waac ngaz mat Ohz ceun  
<sup>53</sup> conz haz? Ohz naeh kawmz pehz tuh z wat  
 klawhz seu ngihz, pehz paw nam mat Ohz.  
 Keuiz daz seu ni naeh kraao pehz, naeh  
 kraao an bimz upz peung.”

### **Petros thiangz Yesuhz**

*(Matthe 26:57-58,69-75, Markus  
 14:53-54,66-72, Yohn 18:12-18,25-27)*

<sup>54</sup> Keuh mat Yesuhz leh lan cu hawz ceu  
 beunz. Petros moh teun yaan lan tawiz.  
<sup>55</sup> Keuh sapz ngal tuh z teun leukz, keu dez  
 teur wong, Petros kaw keu dez kawmz  
<sup>56</sup> keuh. Meuz keun nyah peur cao hawz  
 yawt takz hnhz keu dez a ngal ne daz,  
 “Hnhz an ni naeh ihz tawiz Yesuhz.”

<sup>57</sup> Petros kaw thiangz daz, “Keun nyah aez,  
 ohz nam mas Hnhz keuiz!”

<sup>58</sup> Moh nam paw ceu nawhz, maang thaengz  
 hawz awlz Petros ne daz, “Mih hawz  
 naeh cumz keuh!”

Petros kaw thiangz thaengz, “Nam anz  
 ohz.”

<sup>59</sup> Moh thaengz seu seu na ri ne maang  
 thaengz hawz truz tak mawn baaiz daz,  
 “Hnhz an ni naeh mawn boh z Yesuhz, naeh  
 ihz prih Kalile!”

<sup>60</sup> Petros thiangz thengz thaengz daz, “Ohz  
 nam mas an mih lao!”

Meuz hnhz yeung daz ceun diz ne yaerz  
<sup>61</sup> kaw keu dawrz luat. Caoh Phraz waaiz  
 yawt Petros. Petros samz tang mony reu  
 ma Hnhz lao mok daz, “Borz meu ni co  
 yaerz maat keu dawrz ne mih ngaz thiangz  
 Ohz waiz laehz daz daehz nam mas Ohz.”

<sup>62</sup> Hnhz kaw peun lengz lengz baaiz rae lae  
 yaam lang nawk.

### **Ihz ngot keulz Yesuhz**

*(Matthe 26:67-68, Markus 14:65)*

<sup>63</sup> Ihz pao Yesuhz keui ngot keulz Hnhz,  
<sup>64</sup> tiz Hnhz. Keuh reupz mok ngaai Hnhz ne  
<sup>65</sup> maanyz, “Yaeh tiz Mih, tak raez?” Leh  
 tang mony reu ma tang meoz keui saehz  
 Hnhz.

### **Yesuhz phraeoz aacz ngaai khunz**

#### **Pilat boh khunz Herot**

*(Matthe 26:59-66, Markus  
 14:55-64, Yohn 18:19-24)*

<sup>66</sup> Meuz prih a wa thaangz ne ihz mawh  
 Yio keui, beunz caangz keui boh ihz mawz  
 kyaamz keui leh lan Yesuhz tawz rumz.  
<sup>67</sup> Keuh maanyz, “Beuk Mih naeh mawn Khris  
 kaw lao eh z raez.”

Yesuhz mial daz, “Beuk Ohz lao, pehz te  
<sup>68</sup> nam yum Ohz. Beuk Ohz maanyz kaw pehz  
<sup>69</sup> te nam thaw. Kaanz ni lan, Kuanz Kingz  
 Ihz ngaz keu dez plaakz takz kaaiz Phraz  
 Pen Caoh taanz khoz mawh.”

<sup>70</sup> Keuh hacz aamz kaw maanyz thaengz,  
 “Beuk naeh ceun diz kaw Mih naeh Kuanz  
 Phraz Pen Caoh haz?”

Yesuhz mial tawpz, “Naeh mawn ceun  
 pehz daz.”

<sup>71</sup> Keuh kaw daz, “Ehz lo thaengz naehz  
 leui? Toz eh z a wa ngarz Hnhz lao.”

### **Ihz leh Yesuhz aapz khunz Pilat**

*(Matthe 27:1-2,11-14, Markus  
 15:1-5, Yohn 18:28-38)*

**23** Wungz ihz keui hacz aamz ceng  
 rae leh Yesuhz lan cu khunz Pilat.

<sup>2</sup> Keuh maap Yesuhz daz, “Ehz mat Hnhz kawp daz Hnhz an ni cih aez ihz keui pleung reung dengz, daz tang yak thaamz khawn khunz Kaesar, daz Daehz naeh Khris naeh Khunz.”

<sup>3</sup> Khunz Pilat maanyz Hnhz, “Mih naeh Khunz Yio haz?”

Yesuhz kaw lao, “Naeh ceun mih daz ne.”

<sup>4</sup> Khunz an diz lao beunz caangz boh wungz ihz keui daz, “Ohz nam awlz reung dengz kawi naehz kaai Hnhz.”

<sup>5</sup> Keuiz daz keuh baaiz lao samz samz daz, “Hnhz an ni sawnz aez ihz seuk weur tiukz sirz tuhز prih Yio, tae leh prih Kalile taw phraeoz a niz.”

### Ihz phuhz Yesuhz tawz khunz Herot

<sup>6</sup> Meuz khunz Pilat ngarz ceun diz ne maanyz, “Hnhz naeh ihz prih Kalile haz?”

<sup>7</sup> Meuz hnhz mas Yesuhz naeh ihz eungz khunz Herot upz peung ne phuhz Yesuhz lan tawz khunz Herot, meuz phangz an diz khunz Herot naeh tuhز weng Yerusalem.

<sup>8</sup> Meuz khunz Herot awlz Yesuhz ne seuz phawmz baaiz kawp daz hnhz sunz awlz Yesuhz a wa ceu nawhz. Hnhz mang sunz

<sup>9</sup> awlz an laak laaiz Yesuhz cih plaez. Khunz Herot maanyz Yesuhz heungz baaiz, keuiz

<sup>10</sup> daz Hnhz nam tawpz hawkz hawkz. Beunz caangz boh ihz mawz kyaamz keui ceng

<sup>11</sup> maap mawn Hnhz baaiz. Khunz Herot boh siukz hnhz keui ngot keulz Hnhz, plang Hnhz. Keuh kap aez Hnhz nahz kreung laep

<sup>12</sup> kaw phuhz mial tawz khunz Pilat. Kaai seu ngihz an diz khunz Herot boh khunz Pilat penz kuanz bohز, meuz aacz an diz kaar teur naeh raan su daehz.

### Tatz traz aez Yesuhz yam

(Matthe 27:15-26, Markus 15:6-15, Yohn 18:39, 19:16)

<sup>13</sup> Khunz Pilat raak teur cuhz beunz caangz,

<sup>14</sup> ihz peur aacz boh ihz keui, hnhz daz keuh nahz, “Pehz leh Hnhz truz cu ohz naeh ceun ihz peur aacz seuk weur tiukz. Ohz a wa caetz Hnhz aacz ngaai pehz kaw ohz nam awlz reung dengz kawi naehz ceun

<sup>15</sup> pehz maap. Khunz Herot kaw nam awlz rae phuhz mial tawz ehz. Hnhz an ni nam cih

<sup>16</sup> naehz an theukz yam. Kawp ceun diz ohz ngaz leh kawn nuarz tiz Hnhz rae plawiz

<sup>17</sup> mial.” Kawp daz meuz phangz pawiz ne khunz tomz plawiz ihz wit teun akz.

<sup>18</sup> Ihz keui raak daz, “Piamz thengz Hnhz!

<sup>19</sup> Plawiz ehz nahz Barapbas!” Barapbas samz naeh ihz klaez thang kawp seuk weur tiukz tuhز weng rae piamz ihz.

<sup>20</sup> Khunz Pilat sunz plawiz Yesuhz rae

<sup>21</sup> lao plaez thaengz keuh. Keuiz daz keuh yeung raak daz, “Tawkz piamz Hnhz kaai klawngz klaengz raez! Tawkz piamz Hnhz kaai keun rang!”

<sup>22</sup> Khunz Pilat kaw lao keuh ta waiz laehz, “Kawp naehz? Hnhz cih pleung naehz? Ohz nam awlz reung dengz kawi naehz an theukz yam. Ohz ngaz leh kawn nuarz tiz Hnhz rae plawiz mial.”

<sup>23</sup> Keuiz daz reus ihz maanyz tawkz piamz Yesuhz kaai lakz klawngz klaengz ne raak

<sup>24</sup> bawrz baaiz usz rae pae lan. Kawp ceun diz khunz Pilat kaw tatz traz tawiz ceun

<sup>25</sup> ihz maanyz. Hnhz plawiz ihz an naeh tuhز thang, an seuk weur tiukz rae piamz ihz an ihz maanyz, samz aapz aez keuh nahz Yesuhz teur keuh sunz cih.

**Ihz tawkz Yesuhz kaai  
lakz klawngz klaengz**

(*Matthe 27:31-44, Markus  
15:21-32, Yohn 19:17-27*)

<sup>26</sup> Meuz siukz keui leh lan Yesuhz ne, keuh takz leh Simon an naeh ihz prih Siren an truz thaz pruh rae ngaz kut tuh z weng. Keuh cao hnhz baekz lakz klawngz klaengz, aez lan tawiz puatz Yesuhz.

<sup>27</sup> Ihz wungz mawh keui lan tawiz Yesuhz, pa tang keun nyah phawmz kawcz yaam

<sup>28</sup> krai tawiz Hnhz. Yesuhz waaiz lao keuh nahz, “Keun nyah weng Yerusalem keui aez, yak yaam kawp Ohz! Yaam ta pehz

<sup>29</sup> boh ta kuanz pehz nahz raez. Seu ngihz ihz keui ngaz daz, ‘Keun nyah manz, klungz an

nam ti keun meur boh buhz an nam ti peun buhz kuanz keui bawnz an rak mawn,’ ne

<sup>30</sup> ngaz phraeoz. Meuz phangz an diz ihz keui ngaz daz rang keui nahz, ‘Yaatz sapz ehz,’

<sup>31</sup> daz pukz keui nahz, ‘Reupz ehz.’ Beuk keuh cih kaai khaehz imz thanz teur ni kaw meuz khaehz an diz hawngz ne ngaz naeh seu naez?”

<sup>32</sup> Ihz raai keu aarz kaw leh lan piampz tawiz

<sup>33</sup> Yesuhz. Meuz keuh phraeoz ti Klakz Kingz ne leh Yesuhz tawkz kaai lakz klawngz klaengz, ihz raai keu aarz kaw talz tawkz ihz teur lakz plaakz takz dahz hawkz, takz

<sup>34</sup> kaaiz hawkz. Yesuhz daz, “Plawiz lawt aez keuh raez, Paz! Keuh nam mas daehz cih naehz lawh.”

Keuh pohz ceu kawc teur baengz leh kreung Yesuhz. Ihz keui ceng yawt boh.

<sup>35</sup> Ihz peur aacz keui ngot keulz Hnhz daz, “Hnhz an ni khyawt ihz, beuk Hnhz naeh Khri s kaw aez khyawt mial Daehz raez.”

<sup>36</sup> Siukz keui cih peuk pyaak Hnhz, truz cu Hnhz rae aez Hnhz nahz omz seu pit

<sup>37</sup> praang. Keuh daz Hnhz nahz, “Beuk Mih naeh Khunz Yio kaw khyawt mial Daehz raez!”

<sup>38</sup> Taemz mok lik lang kol Hnhz daz, “Hnhz an ni naeh Khunz Yio.”

<sup>39</sup> Ihz raai hawkz an talz ihz tawkz mok kaw mony Hnhz daz, “Mih nam anz Khri s haz? Khyawt toz Daehz boh khyawt aaiz raez.”

<sup>40</sup> Keuz daz ihz raai thaengz hawkz samz nal daz, “Mih nam doz Phraz haz? Mih

<sup>41</sup> kaw talz taam tang daehz ceun Hnhz. Aaiz kiungz boh talz kawp daehz pleung, keuz

<sup>42</sup> daz Hnhz nam cih pleung naehz.” Hnhz lao Yesuhz nahz, “Tang tang ohz, meuz Mih truz tuh z prih Daehz ne.”

<sup>43</sup> Yesuhz mial daz hnhz nahz, “Ohz daz mawn mih nahz, meu ni mih naeh kawmz Ohz tuh z prih Paradiso.”

**Yesuhz yam**

(*Matthe 27:45-56, Markus  
15:33-41, Yohn 19:28-30*)

<sup>44</sup> Meuz diz naeh kraao seu ngihz keun cang, bimz lang tang prih taw phraeoz

<sup>45</sup> waiz na ri teuk borz. Prih bimz seuk ngih, pahz kangz tuh z wat ne seuk siarz lae aarz

<sup>46</sup> plaakz. Yesuhz raak keurz daz, “Paz, Ohz leh kuanz Daehz aapz tihz Mih.” Hnhz daz ceun diz kaw plotz phawmz Daehz.

<sup>47</sup> Meuz ihz mawh siukz awlz an naeh keu diz ne lupz phrawz Phraz Pen Caoh daz, “Hnhz an ni naeh mawn ihz keu sangz.”

<sup>48</sup> Meuz wungz ihz hacz aamz an yawt boh lawng a wa naeh keu diz kaw beutz seu ongz daehz, phawmz kyehz weng kaang

<sup>49</sup> daehz. Ihz tomz Yesuhz boh keun nyah tawiz puatz Hnhz thaz meuz prih Kalile samz ceng teun yaan teuk soz an keu diz.

### Yosep saangz keo Yesuhz

(*Matthe 27:57-61, Markus 15:42-47, Yohn 19:38-42*)

<sup>50</sup> Meuz phangz an diz tuhز prih Yio, weng Arimathe ne maang ihz mawh rumz hawkz, mus hnhz daz Yosep, hnhz naeh ihz rak ihz <sup>51</sup> keu sangz. Hnhz naeh ihz mang prih Phraz Pen Caoh rae hnhz nam prawm tawiz ceun <sup>52</sup> keuh tatz traz boh an keuh cih. Hnhz kut maanyz toz yam Yesuhz tawz khunz Pilat. <sup>53</sup> Waaiz an diz, hnhz leh teuk klaez thaz lakz klawngz klaengz, wian nahz banz khyawz teun mehز. Samz lan mok tuhز tham peun lu reu aangz, an yaeh maat ti saangz keo <sup>54</sup> seu pawk. Seu ngihz an diz maen kaai seu ngihz phit, a wa thatz seu ngihz sinz. <sup>55</sup> Keun nyah an truz tawiz Yesuhz thaz prih Kalile keui lan tawiz Yosep, yawt toz yam <sup>56</sup> Yesuhz mok ceun nae tuhز tham. Keuh weng raenz nam man hawm boh meoz an hawm keui.

Kaai seu ngihz sinz ne keuh preumz tawiz traz.

### Yesuhz meu rae imz

(*Matthe 28:1-10, Markus 16:1-8, Yohn 20:1-10*)

**24** Kaai seu ngihz aacz tuhز wong, teuk ngup cao cao ne keun nyah keui lan peun lu, khaenz tang meoz an <sup>2</sup> hawm an daehz raenz. Keuh awlz reu aangz an bitz tuhز peun lu ne peun kling

<sup>3</sup> plaez mok. Keuh kut tuhز diz, keuz daz <sup>4</sup> nam awlz toz Tahz Yesuhz. Meuz keuh ceng meun boh ne maang ihz keu aarz <sup>5</sup> kap kreung aasz ceng boh rim keuh. Keun nyah keui doz baaiz kupz taet tuhز keu tehز. Kaar maanyz keuh, “Pehz khahz ihz <sup>6</sup> imz peur lah ihz yam cih naehz? Hnhz nam naeh a niz leui. Hnhz a wa meu rae imz. Tang mony reu ma Hnhz lao mok pehz meuz yeung naeh prih Kalile ne daz, <sup>7</sup> ‘Kuanz Kingz Ihz talz ihz aapz Daehz tuhز tihz ihz raai, keuh ngaz tawkz piamz kaai lakz klawngz klaengz. Keuz daz moh waiz seu ngihz meu rae imz.’”

<sup>8</sup> Keun nyah keu diz kaw tang mony reu ma <sup>9</sup> Yesuhz. Meuz keuh weng truz thaz peun lu, keuh lao plaez keuh seu kawlz disz nahz <sup>10</sup> boh ihz keui nahz lawng an diz. Keun nyah keu diz naeh Mari Makdalen, Yoanna, Mari mah keuh Yakop boh keun nyah an naeh tawiz keuh, keuh lao plaez teu maan keui <sup>11</sup> nahz lawng an diz. Teu maan keui nam yum keuh lao, mok naeh ceun mony nam anz <sup>12</sup> naehz. Keuz daz Petros ceng wang lan cu peun lu. Hnhz kuiz dawmz yawt tuhز peun lu ne awlz taw banz maat pan. Hnhz sangz an naeh keui rae weng kaang daehz.

### Reung dengz lan pruh Emmaus

(*Markus 16:12-13*)

<sup>13</sup> Kaai seu ngihz an diz teu paez Hnhz keu aarz lan pruh Emmaus. Pruh an diz yaan <sup>14</sup> weng Yerusalem pulz lakz, kaar teur daz daehz nahz lawng an a wa naeh peun. <sup>15</sup> Meuz kaar yeung teur daz teur upz daehz ne toz Yesuhz lan thatz kaar, nuar tawiz <sup>16</sup> kaar. Kaar nam mas naeh Yesuhz, kawp



<sup>17</sup> daz ngaai kaar seun tapz mok. Yesuhz maanyz kaar, “Tawiz reung dengz ne paarz teur daz daehz nahz lawng naehz?”

<sup>18</sup> Kaar kaw ngaai kawcz rae deukz. Tuhz kaar ne an mus naeh Kleopas daz Yesuhz nahz, “Khaekz thangz boh tuhz weng Yerusalem ne naeh taw mih pan doz, nam mas lawng a wa peun aarz waiz seu ngihz a?”

<sup>19</sup> Yesuhz maanyz kaar, “Naeh naehz awh?”

Kaar kaw mial daz, “Naeh lawng Yesuhz ihz weng Nasaret eu. Hnhz naeh ihz taangz phraz, an Hnhz upz, an Hnhz cih keui maang taanz khoz aacz ngaai Phraz

<sup>20</sup> boh aacz ngaai ihz hacz aamz. Keuiz daz beunz caangz boh ihz peur aacz ehz keui aapz Hnhz aez talz taam yam kaai lakz

<sup>21</sup> klawngz klaengz. Ehz mang Hnhz naeh ihz thutz leh kheuz Israel. An naeh ceun

<sup>22</sup> ni ne a wa bawnz waiz seu ngihz. Meuz teuk ngup cao cao ne keun nyah tuhz ehz teur ka keui lan yawt tawz peun lu, keuh

<sup>23</sup> kaw sangz. Keuiz daz keuh nam awlz toz Yesuhz. Keuh weng lao ehz nahz lawng an keuh awlz, teu maan kaang raaaz keui paw

<sup>24</sup> truz lao daehz daz Yesuhz imz boh. Keur meh ehz teur ka lan yawt tawz peun lu, awlz naeh ceun keun nyah keui lao, keuh kaw nam awlz toz Yesuhz.”

<sup>25</sup> Yesuhz daz kaar nahz, “Paarz naeh ihz klukz, baai hinz yum baaiz an ihz taangz

<sup>26</sup> phraz keui lao mok. Khris bawnz talz peur teuk ceun ni rae bawnz caam tuhz bunz

<sup>27</sup> Daehz, nam anz haz?” Yesuhz kaw krai plaez kaar nahz lawng Daehz an naeh tuhz kyaamz Moses boh tuhz kyaamz ihz taangz phraz keui.

<sup>28</sup> Meuz kaar lan a wa thatz pruh ne Yesuhz cih ceun Daehz kyaam peun lan pruh kaar.

<sup>29</sup> Kaar raak Yesuhz tikz tikz daz, “Yaetz preumz kawmz aaiz raez, seu ngihz a wa keutz, prih kaw a wa reu nyeum.” Yesuhz

<sup>30</sup> kaw lan thangz tawiz kaar. Yesuhz keu dez suamz kawmz kaar. Hnhz leh kaaiz mun, lupz phrawz kez cuz, pekz kaaiz mun aez

<sup>31</sup> kaar nahz. Meuz diz luat ngaai kaar a wa thaangz rae a wa tang Hnhz. Keuiz daz

<sup>32</sup> Yesuhz bilz lan aacz ngaai kaar. Kaar teur daz daehz nahz, “Meuz Hnhz lao plaez aaiz nahz kyaamz lik tawiz reung dengz ne aaiz seuz phawmz thanz paw kawcz seuk rawi, nam anz haz?”

<sup>33</sup> Kaar ceng lan luat weng Yerusalem, awlz teu maan seu kawlz disz boh teu paez keui

<sup>34</sup> wong teur kawmz daehz rae daz, “Tahz a wa meu rae imz mawn. Plaez Petros nahz toz.”

<sup>35</sup> Kaar kaw lao plaez lawng an naeh tawiz reung dengz boh meuz pekz kaaiz mun ne taamz mas naeh Hnhz.

### Yesuhz plaez toz tawz teu paez

*(Matthe 28:16-20, Markus 16:14-18, Yohn 20:19-23, Teu Maan Caoh 1:6-8)*

<sup>36</sup> Meuz keuh yeung teur daz boh ceun diz ne toz Yesuhz truz ceng teun khinz keuh, daz keuh nahz, “Aez reung dengz nimz naeh kaai pehz se kamz.”

<sup>37</sup> Teu paez keui thaang daehz awlz phet

<sup>38</sup> rae teur aacz daehz khranz ngaat. Yesuhz daz keuh nahz, “Cih naehz pehz caang khranz a? Cih naehz maang phawmz nam

<sup>39</sup> yum Ohz a? Yawt tihz cawng Ohz raez,

naeh toz Ohz eu. Beutz yawt Ohz raez mas boh. Phet nam maang lomz naamz, nam maang ceun aangz ceun pehz awlz Ohz.”

<sup>40</sup> Waaiz Hnhz lao ne Hnhz plaiez keuh

<sup>41</sup> nahz tihz cawng Daehz. Meuz keuh yeung sangz, yeung seuz boh ne keuh maat yum lawh, Yesuhz daz keuh nahz, “Anz pehz

<sup>42</sup> maang seum suamz?” Keuh aez Hnhz nahz

<sup>43</sup> kahz purz seu patz. Hnhz leh suamz aacz ngaai keuh.

<sup>44</sup> Samz lao tang keuh nahz, “An ni naeh mony reu ma an Ohz lao pehz, naeh an Ohz yeung naeh kawmz pehz meuz aacz, lawng Ohz an taemz mok tuh z kyaamz Moses, kyaamz ihz taang phraz, boh kyaamz Ngawk keui a wa penz keunyz klawhz meoz.”

<sup>45</sup> Hnhz kaw plaakz aez ngaai kingz keu nuasz aez keuh loz phawmz kyaamz

<sup>46</sup> lik. Samz lao thaengz keuh nahz, “Tuhz kyaamz lik taemz mok ceun ni, Khri s ne talz suhz rae bawnz yam, moh waiz seu ngihz meu rae imz thaz reung dengz yam

<sup>47</sup> boh. Pehz ngaz bawnz lao plaiez lawng traz caanz reung dengz kawi boh traz plawiz lawt reung dengz kawi kaai mus Ohz, tae leh kaanz weng Yerusalem taw phraeoz ihz klawhz kheuz an naeh tuh z prih keu teh z.

<sup>48</sup> Pehz samz naeh ihz awlz tawiz lawng keu <sup>49</sup> ni. Ohz ngaz puhz aez pehz nahz keu tih Paz Daehz. Pehz bawnz moh tuh z weng Yerusalem, thonz taw taanz khoz kaang raaoz cur cu a pehz.”

### Yesuhz raw lang kaang raaoz

(Markus 16:19-20, Teu Maan Caoh 1:9-11)

<sup>50</sup> Yesuhz aacz lan teu paez keui pruh Bethani, leh phrawz tihz Daehz rae aez

<sup>51</sup> keuh nahz reung dengz rak. Meuz phangz yeung aez reung dengz rak ne leh raw

<sup>52</sup> Hnhz lang kaang raaoz. Teu paez keui waiz Hnhz, seuz phawmz baaiz rae weng cu mial

<sup>53</sup> weng Yerusalem. Keuh lupz phrawz se se kez cuz Phraz Pen Caoh tuh z wat.

Kyaamz Lukas a wa dutz.